

1

2

KHANGHAM SABBATH SANG LAICIMBU

MANGMUHNA LAIBU

Laigelh: Ranko Stefanovic

January, February, March
2019

Sabbath School Lesson

wlwečsi ſbmoč

yEgþol

0þleſElli (00354)

refae*sm

uiſapmi yEgþwlf

206 a&þpömr? &efuiſrlé, f
&efuleſrlí

xlwá0ol

0þapmxrao (00589)

0uik

jrefriyñnbwlaeþybt oifawm

68 0þpm&vr?

&efuleſrlí

tlyfa& - 1200

"r®ę

yxrtlfut

THULU OMTE

1. Patmos Pan Lungdamna Thu	6
2. Meivak Khuamte Lakah	14
3. Pawlpi Sagih Te Tungah Thupuakte	23
4. A Kilawm Tuuno	32
5. Seal Sagihte	40
6. Seal Tupsa Pasian' Mite	49
7. Pengkul Sagihte	58
8. Satan, Zawhcipsa Galpa	68
9. Satan Leh A Pawlte	77
10. Pasian' Tawntung Lungdamna Thu	86
11. A Sagihna Gimna Nunung	95
12. Babylon Tung a Thukhenna	105
13. Na Khempeuh A Thakin Ka Bawl Hi	114

THU MASA

A beisa kum tulnih lai in, thuman tak a lungdamna thu a tangkopa Sawltak John pen, Aegean tuipi sung, suangbek a om tuikulhneu khat tungah kikoic平 hi. A khangham sawltakpa in, Rome te bawlsiatna hksa khempeuh thuakzo mahmah hi. Sabbath nikhat in, ama haksat thuaknate thapia dingin i Topa Zeisu hong hawh hi. Mangmuhna tawh, Pasian' mite phuutkhak ding, pawlpi tangthu piandan dingtang Zeisu in lak diudeu hi.

A muhteng khempeuh, laizialpi sungah, "Zeisu Khazih Pulaak Thute" ci in ciamteh hi. Ama' laigelte in, Kidona Lianpi sungah, Tapidaw te in Khazih hong ompihna leh hong kipsakna thu te hong theisak hi.

Tu quarter sungteng in, hih laibu, kuhkal takin i en ding hi. A zai mahmah hih thute' a deihna bulpite i en ding hi. A deihna bulpi a hi, Zeisu nuntakzia, a sihna, a thawhkikna leh ei a ding Siampilian a sepna te i sin ding hi.

1. Laisiangtho in Pasian hu-muap hi cih bulphuh in, thupuakte, Pasian kiangpan hong pai a, kammal te bel mi' kammal te mah hi cih, leh kammal leh limte zangin, Pasian' mite tangthu teltheih na'ngin hong hilh hi.

2. Mangmuhna laibu i sin ciangin, Daniel laibu te mahbangin, Kamsangte hun pan kipan leitung beidong, tangthu picinna suut suksukna in; Pasian thuman taktak hong lak hi. Mailam thute, sehsa a om lel hi zawlo a, eimah tekin hanciam a sepkhiat a kulna hong lak hi.

3. Hih mangmuhna laibu pen, khenpi 4 in i sim ding hi.

a. Mangmuhna 1:9-3:22 in, John hunpan kipan, a hunzui a pawlpi omdan limlak hi.

b. Mangmuhna 4:1-11:19, Leitung beidong pawlpi omdan dingte limtawh hong lak hi.

c. Mangmuhna 12:1-14:20, a laibu' deihna bulpi hi in, Zeisu pianma pan kipanin hong kumkik dong huamin, kidona lianpi hong lak hi.

d. Mangmuhna 15:1-22:5, hun nunung thu bulphuh hi.

4. Zeisu bulphuh in kiciantakin khiatkul hi. A bu buppi in, Khazih hong musak hi. Khazih tungtawn bekin, limte leh a khatna ki telzo bek hi. Hun nunung naizo a hih manin, Mangmuhna laibu sim, ngai a, a hanthotna a zui mite hampha uh hi ci hi. Hih laibu thute i tel ciangin eite lakah khanlawhna lianpi hong om ding hi. A vekpi'n kitelsiang zolo hi. **E G White, Testimonies to Ministers and Gospel Workers, p. 113.** Zeisu khazih hong kumkik ding i ngak kawmin, eimau ciat zaakding leh zuihding, zong kawmin simsuksuk ni.

Ranko Stefanovic, Ph. D in Andrew University ah SDA Theological lam Professor pa hi.

Laigelh: Ranko Stefanovic
January, February, March 2019

Lesson 1

Dec.29 - Jan.4

PATMOS PAN LUNG DAMNA THU

Sabbath Nitaklam

Dec. 29

Tukaalsung sim ding: Mang 1:1-8; Johan 14:1-3; Thu-hilhkikna 29:29; Johan 14:29; Rom 1:7; Phil 3 : 20; Daniel 7:13,14.

KAMNGAH: “Hih laibu a sim mite mi hampha hi a, hih thu kigente ngai in, hih laibu sung a kigelh thute a zuite zong mihampha mah a hi uh hi. Banghangiam cihleh, hihthu kigente a tunding hun naita hi a ci hi.” Mangmuhna 1:3.

Mangmuhna genkhohlha thute pen, Aegean tuipi sung a, suangbek tawh a kidim Patmos a kici tuikulh neu tung a, John a thongkiat lai in, Pasian in mangsungah a piak a hihi. Mangmuhna 1:3,9 in zong, hih laibu sim, za a zui mi te thupha sang hi ci hi. Luke 4:47,48 tawh enkak in. Hih laisiangtho munin biakinn sungah thungai ding a kikhawmte a cihnopna hi. Sim leh zaakbek hilo-in, thu a mang mite hi lai hi (Mangmuhna 22:7).

Mangmuhna sung a genkhohlha te pen, Pasian in a mite a kepdan lakna vive hi. Zeisu hong gupkhiatna thute tangko dingin, i lei nuntakna ginatloh dan hong lak hi.

Laisiangtho genkhohlha te pen, khumial sungah a taang meivak tawh kibang hi (Peter Nihna 1:19). Tuni i nuntakna hong makaih a, mailam, lametna hong guan hi.

Zeisu hong kumsukkik in, Pasian tawntung gam hong phuh nidong hih genkhohlna te'n hong makaih ding hi.

SUNDAY

A Laibu Min

Mangmuhna 1:1,2. A laibu min i gualtungtuan na bang hiam? Tua minin a sung a ompa thu hong bangci hilh hiam?

Mangmuhna 1:1 ah, Zeisu Khazih Thu Pulaakna ci hi. Thu Pulakna cih kammal in, Greek laimal *apocalypse* hi a, *kisiinlo*, *kituamlo* cihna hi. Zeisu in ama' thu siin nawnlo, tuam nawnlo, cihna hi. Pasian kiangpan Zeisu tungtawn (Mang 22:16) hong kipia hi a, Zeisu thu bekmah kibulphuh a hihna a laibu in tec i pang hi. Amah mahmah a mite hong kepna hong pulaak hi.

Mangmuhna laibu thu laigilpi in Zeisu hi a, Amah tawh kipan (Mang 1: 5 - 8) a, Amah kihel (Mang 22:12- 16) den hi. "Daniel leh Mangmuhna in thuman pulaaksak ni. Thu khempeuh a kipulaakna ah, David suan, a taang Zingsol Aksi " ci hi. ***E G White, Testimonies to Ministers and Gospel Workers, p 118.***

Apocalypes cih pulaakna ah Zeisu in Lungdamna gospel ah Zeisu mah hi. Lungdamna laibu te sungah a omsa Ama' thu tengmah Mangmuhna sung ah pulaakkik hi. Mangmuhna laibu in bel, Zeisu nasepnate muhdan tuamtuan tawh lak hi. A diakdiakin, lungdamna laibu tawpna leh Zeisu thawkikna leh vankahtohna pan Mangmuhna kipan to hi.

Hebrews laikhak tawh tonkhawmin Zeisu' vantung nasepzia te thupisak phadiak hi. Vantung a tuntoh ciangin, vanbiakbuuk ah Siampi nasep kisemsak hi. Mangmuhna leh Hebrews lai lo peuhmah tawh, Khazih' vanbiakbuk

Dec. 30

nasepna te ki telcian zolo hi. Tua banah, Hebrews lai lobuang, Mangmuhna lai bekin, eite a ding Zeisu hong nasepsak nate hong lak hi.

John 14:1-3 simin. Zeisu in vantungah eite a dingin tu mahmah in na hong sepsak a hihna hih laisiangtho kamciamliapi in hong bangci lak hiam? Hih kamciamna pan in bang lametna i nei thei hiam?

MONDAY

Laibu I Deihna

Dec. 31

Mangmuhna 1:1 in, tua hunpan kipan, mailam thupiang dingteng cipah hi. Tua laibu a simpha mi te'n, a genkhohlna thute a tamzaw tangtung takpi cihzong tel ding hi. Laisiangtho genkhohlna te i et ciangin, bangthu bangla piang ta leh, Pasian in uk hi cih thu hi. Mangmuhna in bel, a lauhuai thupiangte lakmah ah Zeisu in hong kem, cih hong tellak hi.

Mangmuhna lai in deihna namnih nei hi: tuni bangci nuntak ding cih hong hilh khit teh mailam a ding kiginkholh theih ding zong, hong hilhlai hi.

Thuhilhkikna 29:29 simin. Hong kilaklo thu pawlkhat te i tel theih na'ngin, hih laisiangtho munin hong bangci huh hiam? Hih laisiangtho munbang hi leh, hong kilak thu te banghang in hong lak hiam? Mang 22:7 simbeh in.

Mangmuhna sung a hun nunung genkhohlna te pen, eima lawpna tawh ut thu peuh a, kaihgawp ding hi lo hi. A piang ding thute i theih ding thupi a hihna hong lak hi. A piang ding thute i theih ciangin, Pasian tungah i kingap ding leh a thu i man ding dan hong hilh hi.

Kum zalom tampi sungin, upmawhthu peuh tawh hun nunung thu ding gen mawkhawk uh hi. Hun nunung a piangding thute gen in sumbawlna in anei zong omphial mah ta leh, a tangtunloh ciangin, mi tampi lungkiatna piangsak hi. Pasian hong piaksa tua thupha te, mi tampite in zangkhial thei uh hi.

Johan 14 :19 simin. Hih laisiangtho mun panin, genkhohlna deihna thukhun bang i mu hiam?

TUESDAY
Limla Kammal

Mangmuhna 13 : 1, Daniel 7 : 1 - 3, Ezekiel 1:1 - 14, simin. Hih mangmuhna khempeuh a kibat kiman bang hiam?

Jan 1

Mangmuhna 1 : 1 in zong, “*Amahin, a vantungmite sawlin, a nasempa John kiangah hih thute kilangsak hi*” ci hi. Tua laibu sungah a thupi mahmah kammal khat i mu hi. Kilangsak cih ciangin Greek kammal **semaino, Lim tawh lak** cihna hi. Daniel in, Kumpi Nebuchadnezzar mangmat, mailam thupiang ding a genkhohlna ah, kham, ngun, tau leh siikte tawh kibawl milim ii khiatna a genlai in, hih laimal na zang hi (Daniel 2:45). Tua mah bang in, John kiangah mailam thupiang ding te, limtawh a lak ciangin hih kammal zang leuleu hi. John in zong, thuman takin, Khasiangtho makaihna tawh, tua limte hoihtakin ciameh hi (Mang 1:1).

Mangmuhna sung a kammal te pen, a kammal bang linlian a khiat ding hilo hi. Laisiangtho i sim ciangin, lim

tawh alak kei nakleh, akammal bang in kikhia a hihi. Himah ta leh, Mangmuhna laibu pen, laimal om bang a cih kei nak leh, limlakna tawh khiat ding a hihi. Thu piang dingte phadiak pen limlahna tawh khiat ding hi phadiak hi.

Hih Mangmuhna bu sung a lim leh genkhohlna te pen, mikhatpeuh ngaihsutna bang in khiat ding hilo hi. Mangmuhna sung a kilak limte pen, laisiangtho luibu sung pan in kila tampi om a hih manin, a budangte sung a limte tawh saikaak dending kul hi. A beisa hun a, gupkhiatna nasepdan te mahbangin mailam hongpailai ding hunah gupkhiatna nasep te kibang ding cih Pasian in i theih ding deih hi. A beisa hun a, a hih bangin mailam ah zong hih lai ding hi. Mangmuhna sung aa limte teltheihna dingin, Laisiangtho lui etphat kul hi.

WEDNESDAY
Lutang Pasian

Jan 2

Mangmuhna zong, Paul laikhak te mahbangin, muakna kammal tawh pan hi. Tua laibu pen, Asia gamneu te tungah laikhak, a kikhak a hihi (Mang 1 : 11). A hihhangin, amau a ding bek in kigelh hilo a, khang tawntung Tapidaw te a ding a hihi.

Mang 1 : 4,5 leh Rome 1 : 7 simin. A nih un bang muakna kammal neikhawm tuak uh hiam, kua'n muakna pia hiam?

A nih tuak un “Hehpihna leh kilemla hong tung taken” cih muakna piatuak uh hi. Greekte kimuakna *Charis* (hehpihna) leh, Hebrew kimuakna *Shalom* (kilemla)

cih kammal te zang hi. Tua hehpihna leh kilemna a pia pen **Thumgawm Lutang Pasian** ci hi.

Pa Pasian in, a omkhin, tu'n zong a om, leh a omlai ding pa ci hi (Mang 1:8; 4:8).A minpi pen Yahweh, "Keimah" (Paikhiatna 3:14) a hihi.

Khasiangtho pen, "Kha Sagih" (Mang 4:5; leh Mang 5:6) enkak in. Sagih cih zong picing nambat hi. "Kha Sagih" a cihteh Khasiangtho in pawlpi sagih te hunsung khempeuh nasem cihna hi. Hih Kha lim in, Pasian mite lakah na sem, tawntung Khasiangtho a cihnopna hi pah hi.

Zeisu zongpen, min thum kivawh hi : A citak tecu, sihnalakpan gah masa, Kumpi te Kumpipa (Mang 1:5) kici hi. A sihna, a thawkikna leh vantungah a maanna te a cihnopna hi. Ei hong it a, a sisan tawh hong tan, Pa Pasian mai ah kumpi leh siampi hong suaksak hi (Mang 1:5,6).

Ephet 2:6 leh Philippi 3: te'n, gupngah te pen, vantung ah hong hawhto sak hi. Mawhna kidim leimi i hih laimah in, kumpi leh siampi te hong suaksak cihen hi t hei ding hiam?

THURSDAY
Mangmuhna Thu Laigil

Mangmuhna laibu thupatna tawpna lamah, laibu buppi thu laigilpi : Vangletna minthanna tawh Zeisu hong paikik ding thu om hi. A thukhupna lamah zong thumvei stset om hi (Mang 22:7,12, 20).

Mang. 1:7,8 simin. A kammal pawlkhat te, Daniel (7:13,14); Zechariah (12:10); Matthew (24 : 30) cihte pan a zatpih zong om hi. Hihte in, Zeisu hong paikik ding bangci bangin kipsak hiam?

.....

Mangmuhna lai sungah, Zeisu hong kumsuk ciangin leitung tangthu tawpding hi. Kumkik ni ciangin, leitung tangthu tawpin, Pasian tawntung gamnuam kipanta ding a, siatna, launa, natna, sihna cihte khempeuh pan i suakta ding hi.

Mang 1:7 in zong, Zeisu a pumpi teekmah tawh hong paikik teek ding cizaw hi. A pang a dawt mite tektek in zong mu ding ci hi. Amah a that mite mitmuh mahin, Amah a ngak mite tungah gupna pi ding a, A hehpihna a nial mite tungah thukhen ding hi.

Khazih hong pai ding a kiciatdan John in, "*Hong piang takpi ding hi, Amen*" na ci hi (Mang 1:7). Hong piang takpi ding" cih kammal pen, Greek lai in 'nai' hi a, 'Amen' bel Hebrew te thu kipsakna hi.

A beisa kum 1800 lai peklai in, hong paikik ding thu hong kamciam zo hi. Tua pan kipan, kum zalom tampi sungteng, thu um mite'n tua kammal te tawh lungmuang uh hi. Tua kamciamte tungkim nailo hi. Misi te a photna aw ging nailo hi. I upna tha kiamsak keini. A sawtlo in Kumpipa i mu ding a, mittang khempeuh pan khituite hong kinulsak ding hi. A ma mai ah thuman in, lungdamin om ni. ***EGWhite, The Advent Review and Sabbath Herald, Nov. 13, 1013.***

Kamciam khat pen, a piapa thupitna tawh kizui in, kipin tangtung hi. Kumkikna vai, Pasian in, hong bangci kamciam hiam? A beisa hhunsungah, a kamciamte bangci tangtun a, Khazih kumkikna kamciam zong, bangzah kip ding ci hiam?

FRIDAY
Ngaihsut Beh Ding

Testimonies to Ministers and Gospel Workers laibu sungah “Daniel leh Mangmuhna Laibu Sinna” laimai 112 -119 dong simin.

Tapidaw te hunsung khempeuh ah, Mangnuhna in, hong makaih toto hi. Topa’n a thuthuk te, i theihkim na dingin, hong lakkhatna a hihi. John hunlai a mite pan kipan, tulai mite khempeuh aa ding a hihi. Pawlkhat tungkhin, pawlkhat tungsaan, pawlkhat hong tunbeh lai ding hi.

“Tua limte’ khiatna gentel thei ke’ng, phattuamna bangmah omkei, ci in kuamah’n ngaihsun kei tahan. Lungsim takpi tawh na zon leh, Topa’n, vantung nate hong lak ding hi. Lungsim takpi tawh na zon leh, ‘tua thute za a, a zui mite’ sanding thuphate nasang ding hi” **E G White.**

The Acts of Apostles, 583-585.

Jan 4

Lesson 2

January 5-11

MEIVAK KHUAMTE LAKAH

Sabbath Nitaklam

Tukaalsung Sim Ding: Mang 1:9-18; Sawl 7:54-60; Matt. 12:8; Pai 20:11; Dan 10:5; Mang 1:20; Mang 2:1-7.

KAMNGAH: “**Zakna ding bil anei te in, Kha Siangtho in pawlpi te kiangah a gen thute naza un.**” (Mangmuhna 2:7).

Late 73 na in, Pasian theilo mite kiphatsakna hang a lung noplohma thu pulaak hi. Midikte thuaksiat laitakin, amau te’n nuamsa hithiat uh hi. Tua kikimlohma in laphuakpa lung noplohma piangsak hi, (Late 73:2-16). Tua banghun ciangin, biakinn ah vapai hi, (Late 73:16,17). Pasian mai ah, a ki-ap ciangin, a thukzaw lai in telbeh lai hi.

Kum za tampi khit teh, a thumaan nungzuipa khat, suangdim tuikulh tungah thongkia in om hi. A pawlpi et-te, gentheih thuak mahmah cihthu za hi. Tuabang lungkham laitakin, athokik Zeisu in, van biakbuk sungah siampi nasem cih mangmu hi. Laphuakpa muhdaan in, John kiangah, nuntak haksat zia, Topa’n lak hi. Van biakbuk tungawnin, Pasian in, a pawlpi a kepna, a khang a khang in, leitung beidong kem toto a hihna hong lak hi.

Van biakbuk sung a Khazih nasepna teng leh, Asia gam a, pawlpi sagih te a dingin thupuak sagih teng, tu kaal sungin i sin ding hi.

KIKUP DING DOTNA TE

1. Mangmuhna in Zeisu hong lak a hih leh, banghang in leitung beihun ding a lum a let in ki um hiam? Tapidaw te’n, mangmuhna bang ci muh uh hiam? Banghangin mangmuhna in kihta cih kammal zang den hiam?
2. A beisa kum 20 pan kipan , leitung hun nunung thu, mi pawlkhat genkholl, a tangtung lote ngaihsun kik in. Tua a tangtung lote hangin, bang thuteng a lum a let in piangzaw hiam? Tua a tangtung lote, a thei a mu Tapidaw te, bang ci daan suaksak haim?

15

SUNDAY
Patmos Ah

**Mangmuhna 1:9 simin. A mangmuhna lai a saan
laitak in a omdaan, John in, bang hong gen hiam?**

Patmos pen, Aegean tuipi sung a om, suang a dim, tuikulh a hihi. Tai 10 sau in, a zai penna munpan, tai 6 zai hi. Gamvai a mawhna lian neite thongkhiat na in, **Rome** te leh, a vengnai gamte in zong, tuabangin zang uh hi. Rome kumpi te in, lungdamna thu tungah a thuman mahmah John zong, tua tuikulh tungah thongkhia uh ci hi. Haksatna tampitakte John in thuakin kantan zo hi. Mawhna lian nei migilo khat bangin a mah sikkol kibulh a, an kikhamlo, nasepham kisemsak in, hehpihna omlo in kisatgawpgawp hi.

Suangbek a kidim, tuikulh kolhpi pen, Rome te in, migilo te thongkiat na'ng in teelmah ta leh, Pasian nasempa a dingin vantung kongpi na hizaw hi. Leitung lungkhamna nasepna khempeuh tawh kipelh in, Pasian leh Zeisu tawh nisim kithuah in, hong pai ding hun a thupiang dingte mangmuhna tawh saang hi. EGWhite, Sawltak te Nasep 570, 571.

Laisiangtho sungah, midang, John bang a thumaan a om lai hiam? Daniel 3:16 -23. Sawltak 7:54-60.

Khazih nungzui te in, John bangin, haksatna a phutkhak uh ciangin, hong ki nusia ciplo cih phawk taken.

15 16

Jan 6

Patmos ah, John, haksatna a phut laitak a, lametna thapiakna a neipa in, tu mahmah in, a mite ompih tawntung lai hi.

Khazih a ding thuakna leh thudang hang a thuakna, eima khentat khialhna hang khawng a thuakna te, bangci ki lamdang hiam? A hangthu i theih zawhloh a thuakna a om teh, Pasian muan ding bangci kisin ding hiam?

MONDAY
Topa' Ni In

Jan 7

**Mangmuhna 1:10, Paikhiatna 31:13; Isaiah 58:13;
Matt 12:8 cih teng sim khawm le cin, Topa' ni bang ni
hiam? John in, a haksat thuak laitak in, hih Laisiangtho
mun te, bangzh thupi ding hiam?**

Sawltak John kiangah, Sabbath ni in, Topa hong kilang hi. John in, Judea gamah, Sabbath ni siangthotak a, a zat mah bangin, Patmos ah zong siangtho takmah in na zang hi. Tua ni pen a ma ading a manpha tak a piaktuam bangin nei liang hi. **EG White, Sawltakte Nasepte 581.**

Mang 1 : 10 ah, John mangmuh ni pen Sabbath ni hih tuakzaw hi. Zeisu hong paikik dong thupiang dingte et ciangin (Mang 1 : 7), Topa ni na ci hi (Isaiah 13 : 6 -13; 2Peter 3:10). John in a mangmuhni thu a gen hi a, Sabbath ni hi pah hi.

Haksatna tampi te lakah, a mangmuhna in, ama a dingin gimna pan tawldamna hi a, Zeisu hong kumsuk khit teh eite ngahding tawldamna etkholna a hihi. Jew mite

17

in zong, Sabbath niper **Olam haba** ci in “**hong paiding leitung**” ciapkholhna ci uh hi. Pasianin Eden huanpek pan a hong piak Sabbath pen, John a dingin, Patmos ah manpha mahmah hi. Mundangah, Zeisu tawh hibangin kimu ngeilo, Zeisu’ thu hibangin sinkha ngeilo hi. EGWhite, SDA Bible Commentary vol. 7, 955.

Paikhiatna 20:11 leh Thuhilhkikna 5:15 sung a om, thukham lina saikaak in. Hihmun ah Sabbath in, piensakna phawkna leh, gupkhiatna phawkna ci hi. Hong piangsak a, hong gumkhia laipa, Sabbath kepcinna tawh, i phawk semsem thei ding hiam?

TUESDAY

Patmos ah John in Zeisu Mu

Mangmuhna 1:12-18, simin la, Daniel 10:5, 6 sung a, Zeisu tawh saikaak dih in. John mangsungah Zeisu bangci kilat a, bang hih hiam?

Jan 8

18

Siampi te nasep a hihi. Sathau beite thunkik ding, tangpha sak ding hi.

Mang 2 : 2, 9,13, 19; 3 : 1, 8, 15 simin. “**Kong thei hi**” cih Zeisu kammal in, a mi siangtho te tawh a kizopna bangci hong lak hiam?

.....

Zeisu in amah pen, Pasian kammal, “amasa leh a nunung” kici hi, (Isaiah 44:6; 48:12). Greek pau in ‘a nunung’ cihipen eschatos hi a, escathology kici (hun nunung thu sinna)kammal hong paina hi. Amahpen a nungtapa, sihna gam tawhtang neipa, kici hi, (Mang 1:18). A sihna leh a thawhkikna in, hankong hontheihna thu a ngahna hi,(Job 17:16; Late 9:13). A um khemnpeuh, sihna pan a thokik ding uh hi,(Korin Masa. 15:21-23). Misi sa te nangawn a kemcingpa a hih manin, Zeisu nungzui thuman te bangmah lauding omlo hi. (1 Thess. 4:16,17).

WEDNESDAY

Tu leh Tu a ding Khazih’ Thupuak

Jan 9

.....

Zeisu in Siampipuan silhin, meivakte lakah avak, John in mu hi. Tua in, Israel te tung a, Pasianin a kamciam, note lak ah kavak ding a, note Pasian ka hi ding hi a cihna kawk hi, (Siampi 26:12). Mangmuhna sungah, meivak-khuam in, Asia gam a om pawlpi sagih te limla hi, (Mang 1:20). Zeisu in a Kha Siangtho tawh, a pawlpi vantung inn a tundong ompih tawntung ding cih lahna a hihi.

Tua banah, Zeisu in meivak khuamte lakah Siampi sem cihipen, Jerusalem biakinnpi sunga, ngeinate pan in ki la a hihi. Meivakte tang sitset a koih tawntung ding pen,

Mangmuhna 1:11,19,20, simle cin, pawlpi sagih a dingin, thu nam sagih mah, Zeisu in vaikhak pah hi. Tua gamhuam sungtengah pawlpi sagih sang tamzaw om taleh, gentehna lim a hih manin, Tapidaw te a dingin bang ngaihsut ding om hiam?

.....

Zeisu in John a piak, pawlpi sagih te a ding thupuakte pen, Mang 2 leh 3 sungah kiciamteh hi. A khiatna cialthum om hi :

Tangthu: Tua thupuak te pen kum zalom masa lai a Asia gam mihau te omna khua teng a om, pawlpite tungah kipia hi. Christian te'n tona lianpi maingat uh hi. Khuapi pawlkhat te'n, a kumpipa uh biakloh phamawhin bia uh hi. Mipi te zong tua te sungmah ah kihelsak nuam hi. Christian te'n tua thu zuizolo uh a hih manin, haksatna bawlsiatna te thuaklawh, sihlawh lianguh hi. Tuate a thapiakna in John tungtawnin thupuak pia hi.

Genkhohna : Mungmuhna laibu in genkhohna hi a, thupuak zong pawlpi sagih bekmah kiteelkhia hi. Tua pawlpi sagih te dinmun tengpen, a khang a khang a Pasian pawlpi dinmun limla a hihi. Kum zalom khatna pan kipan hun bei dong, pawlpi dinmun teng hong pulaak khatna a hihi.

Vannuai Khempeuh: Laikhak khatbek, pawlpi khempeuh ah sim ding hi a, (Mang 1:11; 22:16); thupuak nam sagih te'n zong, khangtawntung a Christian te huam gai hi. Hun tuamtuan, mun tuamtuan a om Christian tuamtuan te limlakna hi a, tuhun Christian te zong, Laodicea pawlpi tawh ki limlak hi. Eite hamphatna khat in, “a puuk mihing’ dinmun khempeuhah Pasian in tonpih tawntung hi,” EGWhite, Selected Messages bu khatna laimai 22.

Pawlpi sagihte tungah laikhak banglian in, nang omna pawlpi tungah thuakna tuamtuan leh khalam tawh kisai, Topa'n lai hongkhak ding hileh, bangteng a ci diam?

THURSDAY

Ephesus Pawlpi Tungah Thupuak

Ephesus khuapi pen, Rome uksungah khua lianpen hi a, kizopna lam khawmpi ah om hi. Asiagam tuilam kizopna phualpi zong a hihi. Sumbawlna phualpi

Jan 10

leh, biakna lam phualpi zong hi lai hi. A khuapi sungah biakinpi te, pawi innpite, kimawlna innpite, tuibualna mun te, numei gilo innte tawh kidim hi. Zulhtatna namkim leh, dawivai in minthang mahmah hi napi, Christian pawlpi lakah zong Ephesus mah minthang zel hi.

Mang 2:1-4 simin. Zeisu in Amahmah bangci ki pulaak hiam? Bang thu a phat a, bang deihsakna nei hiam?

.....

A cillam in, Ephet mite in, a thuman na leh itna minthanpih uh hi, (Eph.1:15). Sunglam pualam pan, haksatna tampi kawmkal ah, Ephesus pawlpi kip in thuman hi. nasep hanciam a, a tawpdong kip uh hi. Zuau kamsang peuhmah amau lakah phallo uh hi. Tua kawmkal ah a ki itna lui uh kiamsak uh hi. A mipite bel thuman in kip tentan uh hi. Khazih lo peuhmah tawh itna meivak zong a mit ding lauhau hi.

Mang 2:5-7 simin. Khazih tungah leh, pawlpi mi khat leh khat ki itna a thaksuak theihna dingin, Zeisu in, bang thu thum hanthawn hiam? Tua thuthum te bangci kizom dimdiam uh hiam?

.....

Hih genkhohna in, AD 31 - 100 sungteng a om pawlpi i khalam dinmun a hihi. Nungzui pawlpi in ki itna leh cihtakna tawh kidim hi. Kum zalom khatna beikuatin a ki itna meikuang kiamsak uh a, thuman panin lampial kipan uh hi.

Ki itna a kiam pawlpi khat a, pawlpimi dingin kingaihsun in. Pawlpi mite'n akilang mawhna neisamlo ci ni. Thuman tek phot mah leh : ngeina neih in, om hithiat ci leng, Zeisu in bangteng hong thuhilh thei tam?

FRIDAY

Jan 11

Ngaihsut beh ding : Acts of Apostles 568 -577 sung “Patmos” thulu tawh EGWhite laigelh sim in.

John a ki bawlsiatna in hehpihna’ zawi hizaw phial hi. Patmos tuikulh in, Topa’ vangliatna tawh tangpempam hi. John in, Topa, mihing pumpi in, a khut a khe meimapawn te mah tawh a mit in mu hi. Mihing etzawh dingciang vangliatna tawh kituamin John in mu hi. Khazih in John kiang a kilakna pen, sihna zo thokikpa i neihna kipsak hi. Tuamah in pawlpi nuntakna tha hong piaksak hi. Haksatna te in, amau valhtum dingbang ahih laitak in, i Topa vahawh hi. Thong sungah vahawh a, meihalna khuamte gei-ah va ompih hi. Khuamial pen zan laitak in aksipi a taan mahbangin, Pasian vangin haksat mahmah laitak in hong kilang zel hi.

KIKUP DING THUTE

Mang 2:1-4 simin. Zeisu in Amahmah bangci ki pulaak hiam? Bang thu a phat a, bang deihsakna nei hiam?

1. John in, Patmos a, a muh te hong hawmsawn hi. Mang 1:12-20 na sim teh, bang ki mu in ki za hiam? Bang hanhotna kammal, hih santakpan na mu hiam?

2. Mang 14 : 7 na ah, a khatna vantungmi in, “van leh lei, tuipi leh ciktui a piangsakpa bia un” a cih pen, Paikhiatna

20:11 pan a kila a hihi. Vantungmi khatna thupuakin, hun nunung ah, Sabbath bangci bangin thupi sakin lamto hiam?

3. Tapidaw te lakah a lum a let in thu kigen hi. Pawlpi sung ah sawt om semsem leh, a upna uh kiam in sih ding baih semsem hi. Tua tawh kilehbulh a piangding thu in, Zeisu tawh ton leng Ama’ thu leh hong itna i thei semsem ding hi. Bangci bangin i upna meikuang te i taang semsem sak thei ding hiam?

Lesson 3**January 12 - 18****PAWLPI SAGIH TE TUNGAH THUPUAKTE****Sabbath Nitaklam****Jan 12**

Tukaalsung sim ding : Mang 2: 8-11; 2:12-7; 2 : 18 -29; Mang 3:1-16; 3:7-13; 3:14-22; Isa 61:10

KAMNGAH: “Keimah zong gualzo in, ka Pa tokhom ah ka tutkhawm uh mah bang in, a gualzote khempeuh keimah tawh ka tutkhawm theih na ding in, thu ka pia hi.” (Mangmuhna 3:21).

Patmos tuikulh tungpanin, Zeisu in, John tungtawnin, thu nam sagih eite a dingin hong khak hi. John hunlai a, Asia gam pawlpi te a kawk mahbangin, tukhang tawntung pawlpi te zong hong kawk hi. Tua thupuak te, in kibatna nam guk nei uh hi. A masa in, Zeisu in, pawlpi khatkhat in minlo masa hi. A nihna ah, “hih bangin ci hi” cih in zui hi. A zomin, a hunzui a om pawlpi kisapna dandanin, Zeisu in, Amah kua cih kigen leuleu hi. Tua khit teh pawlpi khat i thuakna te, Zeisu in bangci gualzawhpih cih in zuisak hi. A nga na ah tua pawlpi phatna leh, haksatna pan suahtak na’ng lampi hilh hi. A tawpna ah, Khasiangtho hilhkhohlna leh, a zote thupha san ding kamciam tawh thukhup hi.

Nung kaalsung a pawlpi masa Ephesus pawlpi thu i sinsa mahbangin, tu kaal sungin zong, pawlpi sim i kisapna leh, tulai eihun kisapna te i mu suksuk ding hi.

SUNDAY**Jan 13****Smyrna leh Pergamum a ding Khazih' Thupuak**

Smyrna khuapi pen hoihna leh hauhna tawh a kidim kumpipa tung biakpiakna bulpi khua hi a, tua a nial mite thuakna leh sihna dong tung thei hi.

Mang 2 : 8 : 11 sim lecin, tua hun pawlpi dinmun zui in, Zeisu in, Amah bangci kigen hiam? Pawlpi bang dinmun a om hiam? Zeisu in hong tungding thu bangci genkhohlh hiam?

.....

Smyrna pawlpi tung a thupuak pen, nungzuite beikhit, Rome kumpi in, Christian te nasia tak a bawlsiat vai a hihi. Mang 2:10 sung a “ni sawm” cih zong, AD 303 pan 313 dong, Diocletian i bawlsiatna hunteng hi a, Constantine in Christiante, suahtakna a piak dong a hihi.

Pergamum khuapi in, gulpi lim a nei, Greekte taang biakna Asclepius a ki ci, cidamna leh gumpa pasian biakna bulpi khua a hihi. Asclepius tattung omna ah, mun khempeuh pan cidam ngah dingin Pergamum ah hong pai uh hi. Smyrna khua mah bangin, kumpipa biakpiakna zong khaupai hi. Tua lai thu umte in “Satan’ tokhom” ah teeng a cih zong thumaan hipah lel hi.

Mang 2 : 12 - 15 simin. Zeisu in, Amah bangci kigen hiam? Pawlpi, kha lamah bangci phat hiam?

.....

Pergamum hunsung Tapidaw te citak uh hi mahleh, “Nicolaitans” a kici mi pawlkhatin, bawlsiatna omloh na’ngin milim biate tawh kilemna bawl uh hi. Balaam in Israel te mawhna ah a zol mahbangin, Nicolaitans te in zong, ‘milim a kipia na te’ leh ‘zualzanna” te panpih uh hi. Tua a hih manin, Pergamum a ding thupuak in “Kisik in” (Mang 2:16) cih hiziau hi. Pergamum pawlpi hun pen, AD 313 pan 538 hunsung a hihi. Mi pawlkhat kip mahmah napi, pawlkhat nungtolh uh hi.

MONDAY**Thyatira A Ding Khazih’ Thupuak**

Khuapi dangte tawh i etkaak ciangin, Thyatira khua in thupiitna lua neilo hi. Gam buppi sumbawl kipawlna om a, sumbawl nuamte’n, tua kipawlna sungah lut kul hi. Tua ki pawlna lut te’n, pawi tuamtuam leh paktatna te zang uh a, Thyatira zong tua lamah kidawk veve hi.

Mang 2:18-29 sim in. Zeisu in, hih pawlpi tungah, Amah bangci ki pulaak hiam? (Daniel 10:6 zong enin) Zeisu in bang thu hilh a, bangin buaina pia hiam?

Pergamumpawlpi mah bangin, **Ahab’ zi, “Jezebel”** in, Israel te, mawhna lam a paipih bangin (Kumpi masa 16;31-33) Thyatira in zong paipih ci hi. Zeisu in, “**khalam ah zualzang uh hi**” na ci hi. Thyatira pawlpi in AD 538 pan 1565 hunsung Tapidaw te cihna hi. Lauhuaina in, pawlpi pualampan hong lutlo a, pawlpi sungpan hong kipan hi. Laisiangtho’ mun ah, ngeinate kikoih in, Khazih Siampi dinmunah, mihing siampi kikoih in, gupngah na’ng na

semsak hi. A sangtheilo te bawlsiat leh sih thalawh uh hi. Thu ummi tampite, gamlak ah buu uh hi (Mang 12:6,13,14). Zeisu in, Thyatira pawlpi te’ upna, ki itna leh laisiangtho lam ah hong ciahkik a, puahphatna a kipat nate phat mahmah hi.

Mang 2:25 simin. “Na saansa thu lenkipin” cih sawlna, eite a dingin bang khiatna nei hiam? I letkip dingin, Zeisu kiangpan bang i sang hiam?

TUESDAY**Sardis A Ding Khazih’ Thupuak****Jan 15**

Sardis in, a minthang mahmah tangthu khat nei mah taleh, Rome kumpite khut sungah a minthanna mansuah hi. Hau mahmah in, a khua pen, mualdawn keendang ah kilam a, kuamah’n sim theilo ahih manin, khuapi cingte’n gina cinlo uh hi.

Mang 3:1-6 leh, Matt 24: 42-44, Thessalonian 5:1-8 cihte simkhawmin. Zeisu in, Sardis hunsung Christian te khalam cidam na’ngin, bang hilh hiam? Khuapi tangthu tawh kisai in bang “**vil**” ding ci hiam?

Sardis pawlpi ah, Tapidaw tawmno te’n citak mahleh, a tamzaw khalam ah sikhin uh hi. Pergamum leh Thyatira te bangin, minlawh ding mawhna bel nei samlo napi un, khalam thaneem mahmah uh hi.

Sardis tung a thupuakte in, pawlpi kipuahphat khit AD 1565 pan 1740 sung hun a Tapidaw te i khalam thakiam

27

a nuntakna neilo taang ngeina te a zuihna te pulaak hi. Pawlpi in, leitung tawh kizom a, leitung paidaan te zawsiam mahmah a hih manin, nungta ding bang napi'n, khalam si gige hi.

A khang a khang a Tapidaw te a dingin, a beisa a thumaanna te gen kikkik mah ta leh, tutatak a thumaanna a gen ding omlo hi. Amau biakpiakna in ngeina hi lel a, lungsim takpi hilo hi.

Gupkhiatna pen Khazih upna tungtawnbek cih theihkawm in, i nasepna te Pasian mai ah, picing zolo cih i tel hiam? Pasian mai ah bangci leng i picing thei ding hiam? Mate 5:44-48.

WEDNESDAY**Jan 16****Philadelphia A Ding Khazih' Thupuak**

Philadelphia in, pawlpi gukna hi a, "unau ki itna" cihna hi. A khuapi pen, sumbawlna lampi dungah om a, mualdawn zaangtampi tung a hihi. Tanglai khua to-kik te muhna ah, cidam na dingin mi hong pai uh ci hi. Zinling nasia a hih manin, khuamite gamlakah buk nono te tawh teenguh hi.

Mang 3:7-9 simin. Zeisu in, hih pawlpi tawh a kizopna bangci gen hiam? "Tha tawmbek na nei hi" a cihna (Mang 3:8) in, pawlpi dinmun bangci lak hiam?

.....

Hih pawlpi in, Britain gam leh America gam a protestant te khanlawh hunsung AD 1740-1844 ciangdong

28

Tapidaw te huam hi. Tua hun a Pasian' mite in "Pasian Kammalte" kemcing (Mang 3:8) ding hi. Pasian thuhkham kemcing a, siangtho nuntakna a nei te hong khang a, "kong kihong" cihin, "Pasian biakinnpi" lut na lampi hi (Mang 3:12; 4:1,2).

Mang 3:10-13 simin. Hun tomta, Zeisu hong pai ding naita cih bangin hong lak hiam? Pasian min, amite' tungah bangci kigelh hiam? (2 Tim. 2:19). Min in mikhat' gamtatna limla a hih leh, Pasian'min a pua te bang a cih nopna hiam? (Paikhiatna 34:6).

Atlantic tuipi langnih tuakah, biakna khanlawhna nakpi takin om hi. 1844 kum kiim khawngin, Zeisu hong kumsuk dingthu, leitung mun khempeuhah ki tangko hi. A zo mite' tungah Pasian min kigelh cih ciangin, Pasian nuntakdaan lak cihna hi. Zeisu hong paikik ding a thupit zah mahin, a mite mawhna maisak in, tua ni a ding kigingsak, leh, a lungsim sung vuah, a thukhamna te gelhsak ding hi, (Phil 1:6; Hebrew 10:16,17).

Zeisu hong paibah ding thu, nang a dingin bang khiatna a nei hiam? Zeisu in, Ama' nasep picingsak ding cih kamciamin, nang, bang tha hongpia hiam?

THURSDAY**Jan 17****Laodicea A Tapidawte**

Laodicea pawlpi in a nunungpen hi a, sumbawlna lamdung tung mahah omin hau mahmah hi. Tuu-mul puan bawlna khuapi hi a, sumkholna ah kham tampi khol uh a, zatui zatang sangpi om a, mitza ki bawlna khua zong a hihi. Hau kisa in bangmah awlmawhlo uh hi. AD 60 kiim

in zinling nasia in a suksiat gawpkhit nungsang, na kisam te Rome khuapan vive a ki vaihawmsak hi. Tui haksa a hih manin, **Hierapolis** kici **tuisa cik** panin tui la uh a, gamla pian a hih manin Laodicea a tun hunin, a tui sazo nawnlo in lumbek ta hi.

Mang 3 : 14 - 17 leh Hosea 12 : 8 simkhawm in. Laodicean khuapi hauhna in, Tapidaw te sung bang lutsak hiam?

.....

Laodicea pawlpi mite' mawhna, Zeisu in taai khollo hi. Amau buaina pen, khalam thanemna hi. A tuinek in, a khua a phakma in, vot manlo, sa nawnlo, lumlai bek hi. Amau hau kisa mahmah ta leh zawng uh a, pil a kisak mahmah hangun kha mittaw uh ci hi. Tua Laodicea pawlpi in, hun nunung a Tapidaw te limla hi. Khalam tangguak omna ah, "Khazih puanpaak"(Mang 16:15), Zeisu' puampaak a silh uh kul hi,(Mang 3:18).

Mikhat in Armageddon khagalpi a dozawhna dingin, tangguak hilo in, Khazih puanpaak a silh kul hi. Tua puanpaak kingah zawh tuaklo hi. Hehpihna kong zong kikhak ta hi. Puanpaak kepcin ding zongpen, gimna gukna leh Armageddon a ding kigin theih ding, Laodicea pawlpi a kiginkholh theihna ding, Zeisu hong pai ni ciangin, tangguak om a zumloh na'ng cihte hilhkhon hi, (Mang 3:17,18; 1 John 2:28 - 3:3).

Zesi in, Laodicea pawlpi a itna pulaak hi. Kisikkik ding hanthawn hi(Mang 3:19). Solomon la 5:2-6 sung a, itna neipa leh, Mang 3:20 sung a 'kongbiang a ding a kiupa'

a hihi. Kong ahon mi peuhmah, lut ding a, Amah tawh nekhawmin Amah tawh maangkhawm ding hi, (Mang 20:4).

Mang 3 : 18 - 22 simin. Zeisu in Laodicea te bang ngaihsutna pia hiam? Kham, puanpaak leh mitzaa te in bang acih nopna hiam? (1 Peter 1 : 7; Isa 61 : 10; Eph 1 : 17,18). SDA te'n, Laodicea in i ki muh leh, hihte in bang khatna nei hiam?

FRIDAY

Jan 18

Ngaihsut Ding: E G White gelh Sawltakte Nasep sungpan "Mangmuhna" laimai 578 - 592 dong simin.

Pawlpi sagih a ding thupuak sagih te in, khalam kiamsuk na vive lak uh hi. Ephesus pawlpi in citaklai napi, a itna masa khahsuah hi. Smyrna leh Philadelphia te in thumaan citak uh hi. Pergamum leh Thyatira te in, mipi nung zuihna tawh upna siangtho nusia uh hi. Sardis pawlpi a hih leh, a tamzaw upna pan lampial uh a, Philadelphia te bel a citak tawmbek om hi. Laodicea pawlpi bel, hoih cihna ding khat zong omlo hi.

Ephesus in, kamciam sang masa a, pawlpi te hong tun tohtoh ciangin kamciam dang san behbeh uh hi. Laodicea in kamciam sang nunungpen hi napi'n, Kamciam Lianpen Zeisu Tokhom luah ding ci hi.

KIKUP DING DOTNA TE

1. Khalam kiasuksuk hi napi, mawhna a tamciangin hehpihna khang (Rom 5 : 20) a cih mahbangin, banghang in, kamciam khangkhang hiam? Pawlpi in thanem,in kisia ta leh, Khazih in vannuai khempauh, a awlmawh penpen a hih lam phawk ni, EGWhite Selected Messages bu nihna, Liamai 396.

2. Christian te in, vanbawlna munpite, sumbawlna munpi te leh khuapilian te ah Christian hih ding haksa hi, ci uh hi. Asia gam khuapi haumahmah te a om Christian te kimkot ah milimbiate tampi om mah taleh, amau thumaan mahmah leh na muhuh ciangin, bang thuthak na muhbeh hiam? Zeisu thugetna (John 17:15-19) sungah, “leitungah ka om uh hangin, leitung a ka hi kei uh hi a cihna kammal in khuapi sung teng mite a ding a hithei diam?

3. Ei SDA te in, Laodicea tungtawn a hong kipia kammal te, bangci awlmawh thei ding i hi hiam?

Lesson 4 :
January 19 - 25
A Kilawm Tuuno
Sabbath Nitaklam
Jan 19

Tukaalsung sim ding : Mang 4; Ezek 1:5-14; Mang 5; Eph. 1:20-23; Hebrew 10:20-23; Sawltak 2:32-36.

KAMNGAH: “**Kap kei in. Judah sungpanin Humpinelkai, David suan sungpan in a lianpa, gualzo khinta a, tua laizial ciaptehna sagihte lakhia in, a laizial phelthei ding hi.**” Mangmuhna 5:5.

Nung kaal in, leitung a ding Khazih thupuakte i mu khinzo hi. Tu'n, tuate hi nawnlo in, “Hih thu teng khit ciangin, a piangding thute” (Mang 4:1) hi ding hi. Mang-muhna a lian 4 leh 5 sung thute in, vantung a piang thute hi a, tangthu khempeuh leh, gupkhiatna tangthu, Pasian in uk a hihna thu pulaak hi. Mailam thupiang dingte a genma in, Khazih Siampi Lianpa in, gupkhiatna nasep i thu laigilpi a hihna pulaak hi.

Mangmuhna i sim totoh ciangin, limlaakna vive tawh ki pulaak a hih manin, telhak mahmah hi. A kammal te zong, laisiangtho luisungpan a laaktohtoh kammal pawlkhat kihel a, a khitna maan taktak theihtheihna dingin, laisiangtho limlak te, telphot kul hi.

SUNDAY
Jan 20
Vantung Kumpi Innsung Ah

Mang 4:1 pan kipan, Zeisu in, Ama' hong paikik dong tangthu piang dingteng mangmu sak hi.

Mang 4:1-8, Eze 1:26-28 leh Mang 5:11-14 simkaak in. Hihte in vantung kumpi innsung omzia bang honglak hiam?

.....

Sawltakpa in, vantung kumpi inn tawlet pan a sung a et ciangin, Pasian tokhom mu hi. Tua Kumpi tokhomin, Pasian ukzawhna aana leh, sakhituihuup in, Pasian in Amite tungah a thumaanna limpua hi,(Pancil 9:13,16; Isa. 54: 9,10). Satan pen, Pasian ukzawhna aana a sutnuam galpa hi a, Pasian ukna nial kinken hi. Kidona Lianpi ah, a kituh thu laigilpi in, ‘kua in ukna aana nei takta hiam’ cih thu a hihi. John in, Pasian tokhom a muhna pen, Pasian in ukna aana takta nei cih i theihna ding a hihi,(Mang 4:1-8; 5:11-14).

Mang 4:8-11 leh 5:9-14 simin. Biakpiakna maantaktak bang hiam? A lian 4 sungah, Pasian biaktaak cinna banghang hi a, Mang 5:9-14 na ah, Tuuno biaktaak cinna banghang hiam?

.....

Mangmuhna 4 na ah, Pasian tokhom leh, biakpiakna omden a hihna hong lak hi. A lian 4 ah, Pasian’ piansak theihna vaang leh, a lian 5 na ah, a kigo Tuuno gupkhiat zawhna vaang hong lak hi. Ni guk sung, na khempeuh a bawlzopa in, A mite khempeuh puapha in, a kamciamsa tawntung innpi ah ciahpih kik ding hi.

Mang 5:12 na ah; Vannuai leitung khempeuh a bawipa in, “a kigo Tuuno” hi ci hi. Tua thu in, gimna, natna kidim hih leitungah bang lametna hongpia hiam?

MONDAY

Kumpi Innsung ah Vantung Kikhopna

Jan 21

Mang 4:4 sung a upa te pen, vantung mite hilo hi. “**Upa**” cihciang laisiangtho in, mihing tung a zat hizaw hi. Vantung mite pen, Pasian mai ah ding ci zel a, hih Upa te in, kumpi tokhom tungah tuu uh ci hi. A silh uh puanpaakte zong, a thumaan, Pasian’ mite’ puanpaak hi, (Mang 3:4,5). A lutung vuah galzawhna lukhu (*Greekpau in Stephanos*, Mang 4:4), te zong, galzo misiangtho te ading a kikoihkhol (James 1:12) sa ci hi. Hih Upa 24 te pen, galzo misiangthote cihna hi.

Nambat 24 in zong limlak hi : 12 nihvei hi a, laisiangtho sungah, Pasian’ mite cihna hi. Upa 24 a cih ciangin, laisiangtho lui hunpan leh, laisiangtho thak hun a misiangtho te a cihnopna hi. Siampi 24 in, nikhat sung a nasephun a kikhopna zong limlak a hihi, (1 Khang 24:1 -19). Tua Upa 24 te pen, Zeisu, sihna zo a, a thawkik lai (Mate 27:51-53) a thokik te hi kha ding hi. Tua hileh, hih Upa 24 te in, mipi’ ai-awh in, Pasian’ gupkhiatna nasepna te thumaan thutang a hihna tec pang dingin, van a kahto uh a hihi,(Mang 4:5,9). **Upa** 24 te leh **Ganhing nuncta** 4 (aneu 8) te in, Tuuno mai ah bokin bia uh hi. “Nangmahin, kigo in a thokik, na sisan tawh minam khempeuh, paunam khempeuh hong lei in, Pasian mai ah siampi leh kumpi nong suaksak hi” ci in lathak sa in, Tuuno bekin biaktaakcing hi ci in phat uh hi,(Mang 5:8-10).

Mang 4:6-8 sungah anungta Ganbing 4 te thu gen hi. Ezekiel 1:5-14; 10:20-22 leh Isaiah 6:2,3 sung, “a nuncta 4” a cihte tawh saikaak in.

.....

Ganhing nungta 4 te in, Pasian' sawltak leh tokhom cing te hi,(Late 99:1). A kha te un, manlaanna lak a, a mit te un, pilna limlak hi. Upa 24 te leh vantung mite tawh, a omkhopna uh in (Mang 5:11), vannuai leitung khempeuh, Pasian maiah om hi cih ong lak hi.

TUESDAY
A Kiciamteh Laizial

Mang 5:1-4 sung simin. Isa. 29:11,12 tawh enkhawm leng laizial in bang khiatna nei a, John, banghangin kap hiam?

.....
Greek lai sungah, tua laizial, Pasian ziatlamah kiphah ci hi. "A ki ciamtehna, a phelzo ding mi" a kizong hi,(Mang 5:2). EGWhite genna ah, tua laizial sungah, "Pasian nasepna tangthu, minamte leh pawlpi, a ukzawhna, a thukhamna te, gamte, minam te, paunam khempeuhte a huzaap zawhna tangthu te kigelh hi" E G White, Manuscript Release vol. 9, laimai 7. Tomlak leng, a puuksa mite a photkik na'ng thusim teng omna hi a, Zeisu hong paikik niciang kitelpha ding hi, (Mang 10:7).

Mang 5:5 -7 simin. bang hangin, vannuai leitungah tua ciamtehna hongzo ding, Zeisu bek omthei hiam?

.....
Vantung kumpi innsung buaina in, Satan' langdona hang hi. Hih leitungin, Pasian bawlsa hi napi, Satan in sut hi. John' kahna in, Adam pan kipan, a khang a khang a,

misiangthote' mawhna kolpan suahtak na'ng kahna te limpua hi. A kiciamteh laizial in, mawhnapan suahtak na'ng thute omna hi. A puuk leimi te'n, gupkhiatna dingin, galzopa Zeisu, tua laizial hongzo dingpa kisam uh hi.

I Tapidaw nuntakna sungah, a masa penpen in Zeisu, bangci i koih thei ding hiam?

WEDNESDAY
A Kilawm Tuuno

Mang 5:8-14, Eph. 1: 20 - 23 leh Heb. 10 - 12 simin. Tua tengin, bang lametna leh hahnepna hong pia hiam?

.....
Khazih in kumpi tokhom naih in, laizial la hi. Tua in, ukzawhna aana khempeuh nei cihna a hihi, (Mate 28:18; Eph. 1:20-22). Tua hun laitak in, vannuai leitung bupin, Khazih' ukzawhna aana hong tel uh hi. Adam in a mansuah sa, Khazih in ngahkik hi. Khazih in laizial la cihciangin, hongpai ding hun khempeuh, Amah'n len, cihna hi. Ganhing 4 leh Upa 24 te'n, Ama' maiah kun in bia uh a, "**Nangmahin laizial la a, ciamtehna a hong dingin, na kilawm hi; A hangthu in, na si zo a, na thokik hi**" ci uh hi, (Mang 5:9).

Ganhing 4 leh Upa te, vantungmite'n honpi te'n hong pawmuah a, Pasian tokhom kiimah dinguh in, "**a kigo Tuuno, a hingkikpa, a puuksa mite tankhiapa**" ci in phat uh hi, (Heb 7:25). Tokhom kiim aa ding khempeuh in zong, "**a kigo Tuuno in, vangliatna, minthanna, hauhna, pilna thahatna, zahtakna thupha te nei tawntung ta hen**" ci in

phat uh hi, (Mang 5:12). Tua a tung a phatna awging khempeuh khit ciangin, Ganhing 4 te leh Upa 24 te in, "Amen" ci uh hi.

Mipil te'n, hih leitung pen, khatvei kaangtum ding a hih kei leh beimang ding hi ci uh hi. Pasian thu tawh saikaak leh kilamdang mahsi! Hong ngak gige mailam thu piangding te, eite a dingin bangzah lungdam huai hiam?

THURSDAY
Pentecost Thupiitna

Pentecost ni a, Kha Siangtho a kibuak lai in (Sawlt 2:1-4), gupkhiatna ngiimna te sungpan a thupi mahmah khat a hi, Khazih in, vantung biakbuk sungah Siampi lianpa leh kumpipa in kipsakna a hihi. Pasian' ziatlam ah om in (Mang 5:6,7), gupkhiatna ngiimna te a sem thei hi. Ama tungawnin, mite in, Pasian tawh direct kizomin, mawh maisakna i ngah thei hi.

Sawlt 2:32-36 leh John 7: 39 simkhawm in. Zeisu in vantungah Siampi lian leh Kumpi a hih manin, eite' a dingin bang lametna om hiam?

.....

Khazih, vantungah a kisaan manin, a nungzuite tungah zong Khasiangtho hong kibuasuk hi. Mang 5 : 6 ah, Kha sagih, "leitung khempeuhah kisawl hi" ci hi. tua Kha sagih te in, leitungah, Khasiangtho nasepna a picinna limpua a hihi. Khazih in Kumpi a suak ciangin, Khasiangtho leitungah hong sawlsuk hi. Tua zong, Khazih' nasepna masapen hipah hi. Khasiangtho hong kibuakna in, Zeisu,

mihingte a ding, a kipumpiakna, Pasian in saang cihna a hihi.

Khazih, vankahto a, van kongpi ah a lut ciangin, vanmi honpi te'n, pahtawi in pawipi khaam uh hi. Tua khit ciangin, Kha Siangtho zong mite tungah hong kibuaksuk pah a hihi. Pentecost ah Kha hong kibuakna in, Zeisu hangin, vantung leh leitung kizopna kipta cihna a hihi. Khazih in, Amah, vantung Kumpipa suak takpi, ukzawhna aana nei takpi a hihna tellahna in, Amite' kiangah a Kha hong sawl a hihi, EGWhite, Sawltakte Nasepte laimai 38, 39.

Hebrews 4:16 leh 8:1 simkhawm in. Zeisu in, vantung Kumpipa leh Siampipa a hih manin, nang a ding bang lametna lian om nasa hiam? I mailam bangmah muanhuailo kawmkaal ah, tua thumaante upna in, na nisim nuntakna bangci hong huh hiam?

FRIDAY
Ngaihsut beh ding

EGWhite lai, Desire of Ages laimai 829 - 835 sungah "Ka Pa leh, Note' Pa" leh: Sawltakte Nasepte laimai 47 - 56 sungah "Kha Silpiak" cih te simin.

Mang 4 - 5 sung thupuakte in hun nunung a om mite a ding hi phadiak hi. Pentecost a Kha hong kibuakna in, leitung khempeuhah lungdamna thu kipuak, a kipatna a hihi. A thu laigilpi in, Pa ziatlam a om, Siampi leh Kumpi a suak Zeisu mah hipah hi. Christian masa te' upna bulpi (Heb 8:1), leh innkiu suang (Sawlt 2:32-33; 5:30,31). A upna thu guipi leh haksatna sungah a thangahna pen uh (Sawl 7:55, 56; Rom 8:34) hi. Mi tampi mahin mu in, Pasian gam zong, amau nasepna tungawnin ki phutzo hi.

Mihingte puahpha a piangthaksak zo, Pasian kihta a bia dingin a huupzo thu in, Khazih hang a gupkhiatna lungdamna thupha bek a hihi (Mang 14 : 7). Eite lametna in, i Kumpi leh i Siampipa Zeisu bekmah hi a, hunbei dongin hong tonpih dinghi (Mate 28 : 20).

KIKUP DING DOTNA TE:

1. **Vantungah, Pasian phat a bia dingin, nikhat i tung teitei ding hi. Pasian in eite a ding a hong sepsak sa te khempeuh hangin, lungdamna leh pahtawina tawh bangci i phat thei ding hiam?**
2. **Mang 4 : 11 leh 5 : 9 simin. Hi tengah, Pa leh Tapa i bangci muh hiam? A nihgel mahun, biaktaakcing a hihna bangci kilang hiam? A lamdang Pasian thumaan thu nih honglak Sabbath in bang hong hilh hiam?**

Lesson 5

January 26 - February 1

SEAL SAGIHE

Sabbath Nitaklam

Jan 26

Tukaalsung sim ding: Mang 6:1-14; Siampi 26:21-26; Eze 4:16; Paikhiatna 32: 43; 2 Thess 1:7-10.

KAMNGAH: “Nang Tuuno, tua laizial a lakhia ding leh, a seal te a lakhia dingin, Na kilawm hi. Nang hong kigokhin a hih manin, mi namkim leh pau namkim a paute sungpanin, na sisan tawh, Pasian a dingin, mite na leikhin a; Pasian na a sem dingin, siampi za leh kumpi za na pia a, amaute in leitung a uk ding uh hi.” Mangmuhna 5:9-10.

Mangmuhna 6 in 4 - 5 sung a om thu, sihna tungah galzawhna hangin, Adam mansuah sa dinmun, a ngahkik thu mah zomto hi. Tua laizial hong a, ciamtehna lakhia in, gupkhiatna ngiimna teng zomtoto ding hi. Pentecost pan a kipan Khazih gam lungdamna thu hilh hong kipatna in, tua laizial ciamtehna honna a hihi. Seal sagihna a hon ciangin, leitung tangthu a tawpna hi ding hi.

Mang 3:21 in, seal sagihe a khiatna hong musak hi: “Keimah zong gualzo in, ka Pa tokhomah ka tutkhawm uh mah bangin, a gualzo te khempeuh zong, Ka tokhom tungah hong tutkhop theihna dingin thu ka pia ding hi.” A lian 4 leh 5 in zong, Khazih gualzawhna pahtawina, a lian 7

41

tawpna lamah, a gualzo mite Khazih tokhom mai ah om hong lak hi. A lian 6 na in, Pasian' mi a gualzo te, Zeisu in a tokhom hawmding cih hong lak hi.

SUNDAY
Seal Masa Honna

Mang 6:1- 8; Siampi 26:21- 26 leh Mate 24:1- 14 te simin. A gen kibangte lunggai in. Seal masa lam 4 teng na bangci muh hiam?

.....

Siampi laibu 26:21 - 26 sung a, namsau, kial, natsia leh sa gilo lauhuai na te tawh enkaak leng, seal sagihte kitel pha deuh ding hi. Ezekiel in zong (14: 21) thukhen na lian **4** na ci hi. Israel a thuhilhna leh khalam khanlawhna a neihtheihna ding a, Pasian in, tua gimnate tungsak zel a, tua mah bangin, Zeisu hongpai ding ngak kawmin, khanlawhna om theihna dingin, seal sakol 4 teng zang hi. Mate 24:4- 14 sung a gimna te zong, tua sakol **4** gimna teng mahtawh ki zavitawn hi. Hih leitungpen i inn taktak a hihlohma theihna dingin, sakol masa **4** tengtawh, Pasianin hong lak hi.

Mang 6:1,2 ah gualzawhna hi. Mang 19:11- 16 ah, Khazih sakolkaang tuang a, van galkaphon a makaih, puankaang silhpa in Khazih hi a, nihvei kumkik ciang misiangtho te gum ding cihna hi. A kaangin siangthona hi a, thaltawi in kumpi lukhu khu hi, (Mang 6:2). Hab. 3:8 -13 leh Late 45:4,5 sung a, Sakol tuang, thaltawi a, galzopa a cihpen hong phawksak hi. Tua lukhu (Mang 6:2) pen Greekpau in stephanos hi a, (Mang 2:10 leh 3:11) sung a,

42

gualzawhna lukhu cihpen hipah hi. Amah in gualzo a, gualzo lai ding hi.

Seal masa in, lungdamna thu tangkona, Pentecost pan kipan a, gualzo a Pasian gam keeuna hi a, gamtampi te, Pasiangam suaktoto lai ding hi. Ephesus pawlpi hun sung a lungdamna thupha manlang tak a, kizeelgawp un, nungzuite' hun hiphadiak hi, (Col. 1:23).

Tu laitak a i thuakna te ngaihsun lo in, Zeisu tawh a gualzo lam i panna banghangin theihhuai hiam?

Monday
Seal Nihna leh Thumna

Jan 28
Mang 6:3,4 simin; Sakol san leh a tungtuangpa thu, lungdamna thu tawh kisai bang kici hiam?

.....

A san in sisan limciing hi. A tungtuangpa in namsaupi khat tawi a, leitungpan kilemna lakhia in, mi kithahna lampi honsak hi, (Mate 24:6). Seal nihna in, lungdamna thu nialna hun, kum zalom nihna kipat hun a hihi. Khazih in khagal a do kipatlai in, gallamte zong khauh mahmah uh hi. Bawlsiatna te hong kipan hi. Sakol tuangpa in, mi a thahloh hang, leitungpan kilemna lakhia a hihmanin, bawlsiatna in hong zui pah hi, (Mate 10:34).

Mang 6:5,6; Siampi 26:26 leh Eze 4:16 cihte sim-khawmin. Sakol vom leh a tungtuangpa thu, lungdamna thu tangkona tawh bangci kizop hiam?

.....

Sakol vom tuangpa in **an-tawikhaina** khat tawi a, “mangbuuh lawhta khat in, nikhat thaman a, mangbuuh lawhta thumin, nikhat tha mah man hi (Mang 6:6) ci hi. Tua munah, mangbuuh, sathau leh lenggahzu cihte pen, nuntakna a hihi (Thuhilhkikna 11:4). Mangbuuh teh ngiatngiat a neekna in, kial nasia cih na hi (Siampi 26:26; Eze. 4:16). John hunlai in denarius dangka tangkhat in mi’ nikhat thaman hi (Mate 20:2). Nikhat thaman tawh innkuuanbup nikhat neekding lei zo hi. Seal thumna cihnopna in, nikhat thaman tawh mikhat a ding nikhat neek ding bek ki leizo cihna hi.

Sakolkaang in, lungdamna thu tangkona hi a, sakolvom in lungdamna thu omlo, mite’ ngeina kizui cihna hi. Mangbuuh in, Pasian thu hi a (Luke 8:11), kialtung cihin, lungdamna thu kinial cih na hi leuleu hi (Amos 8:11).

TUESDAY
Seal Li na

Mang 6 : 7,8 simin; Hih sung a bang kimu a, zanni a tawh bangci kizop hiam?

Jan 29

Seal 4 na, Sakol **puang** hi a, Greekpau in chloros (vut-puang) hi in, misiluang meel hi. Sakol tuangpa min **sihna** hi in, **han** leh **sihna** in amah zui hi. Hite gelin, namsau, gilkialna, sihna leh gamsa gilo te tawh, leitung khenli suah khenkhat a, mite a that ding hi (Mate 24: 7,8). Seal 4 na in, natsia leh sihna a sam hi. Lungdamna thu a kinial manin, Pasian’ thu kialtung a, khalam sihna tunghi. Lungdamthu khat ah, han leh sihna tungah, leitung khenli suah khenkhat

bek thahtheih na thu ciangtanh kipia hi. Zeisu in, han leh sihna tawhtang ka nei hi (Mang 1:18) ci hi.

Mangmuhna 2 sung a, Ephesus, Sardis, Pergamum leh Thyatira pawlpite thu enkik in. Ciamtehna 4 dong sung a thu te tawh i etkaak ciangin, bang kizopna nei uh hiam?

.....

Seal sagih te in, pawlpi’ mailam thute vive hi. Pawlpi sagih a om mah bangin, seal sagih mah om a, pawlpi tangthu mah tawh kizom uh hi. Nunguite hunlai in, lungdamna thu kizel manlang mahmah hi. Tua khit teh, kum zalom khatna beikuan pan kum zalom 4 na kipat dong, Rome kumpi i bawlsiatna in hong zomto pah hi. Seal thumna in, “**khuamial hun**” i cih kum zalom ngana sung, thuman gilkialna hun om hi. Kum tulukhat dektak sungbang Tapidaw te “**khalam sihna**” hong omsak hi.

Mangmuhna 6:6 na ah, “sathau leh lenggahzu” pen, seal thumna kialpi tawh kizomlo hi. Sathau in “Khasiangtho” (1 Samuel 16:13; Sawlt 10:38) cihna hi a, lenggahzu in “Zeisu’ hong gupkhiatna” (Maku 2:22) hi. Pasianthu gilkial laitak in, Khasiangtho in nasem veve lai cih, hih limciing te’n, bang a cihnopna hiam?

WEDNESDAY
Seal Nga na Kihong

Mang 6:9,10 simin; Hih sung a bang thu piang hiam?

Jan 30

.....

Laisiangtho in “**Kha**” a cihteh, mihing pumpibup a gen hi (Pian 2:7). Pasian’ misiangtho te’ bawlsiat thuakna

sisan te in, biakbuk sung biakpiakna sisan (Paikhiat 29:12; Siam 4:7) te tawh lim kipuasak hi. Pasian' mite in a thumaanna uh hangin a diklo bawlsiatna te a thuak uh ciangin, awngin, Pasian kiangah huhna ngen uh hi.

Mangmuhna 6:11; Thuhilhkik 32:43 leh Late 79:10 cihte sim lecin, thahna a thuak Pasian' mite kahna aw bangci ki dawngkik hiam?

.....

Thahna thuak misiangtho te, Khazih dikna a hi puanpaak kipia hi (Mang 3:5; 19:8). Mang 6:11 sung ah a siding zah nambat pialo hi. Pasian mite pen, amau' hoihna hang hilo, Khazih' dikna puanpaak bekmah tawh, ki picingsak ci hi (Mang 7:9,10). Thahna a thuak misiangtho te in, kumtul maanna kipat ding Zeisu hong tuaksuk ciangin thokik ding uh hi (Mang 20:4). Ciamtehna ngana pen, biakna kipuahphat hun laitak, mi awn tampi takin, thumaanna hangin thahna a thuaklai hun (Mate 24: 21) a hihi. Taanglai Abel pan kipan (Pian 4:10), Pasian in "a nasemte sisan thukkikna" a piakni dong, Pasian mite' thuakna te huamgai hi (Mang 19:2).

"Aw Topa, bangtan sawtlai ding hiam?" ci in misiangtho te in, a khang a khangin awng uh hi. Diklopi a mawhsakna tawh a kipelh a om kha hiam? Khatvei teeiteei, thumaan thukhenna hong om ding a hih teh ci in, seal ngana tungtang, bang thangahna na nei hiam?

THURSDAY
Seal Gukna Kihong

Seal ngana ah, Pasian mite'n a thuaksiatna uh, Pasian ko in, hong huh meng in ci a otna aw i sinzo hi. Pasianin a mite' thungetna a dawn hun hong tung ding hi.

Jan 31

Mang 6:12- 14; Mate 24: 29,30 leh 2 Thess 1:7-10 te simin; Bang thu piang hiam?

.....

Seal gukna i a nunungpen lim thumte Matt. 24:29,30 sungah Zeisu'n genkhol zo hi. Tuate in, nihvei kumkikna, a madawk in "**gimna lianpi**" te tawh kinai, 1798 khit deuh in (Mang 7: 14) in hong tung hi. Mate 24 sung a Ni, Kha, Aksi te in limla hilo, a taktak vive hi. **Ni** hong mial in, **Kha** sisan bang ding, **Aksi te thei pulh** bangin pulh ding ci hi. Nitumna gamlam te'n, tuate a picin mu uh hi. 1755 kum Lisbon **zinliing**; 1780 kum May kha 19 ni, Newyork leh New England ah - **Ni mial**; 1833 kum, November 13 ni, Atlantic tuipi tungah **Aksi pulh** cih te, kumkikna a naina lim vive hi.

Mang 6:15- 17; Isa. 2:19; Hosea 10:8; leh Luka 23:30 nate simkhawm in. Khazih hong kumkikni ciang a, patau a, bukna a zongdingte omdan hong lak hi. Mualte suangte kiangah, "tokhom tung a tu pa maitang pan suahtak na'ngin hong vuk un" ci in kap in tau ding (Mang 6:16) uh hi. Misiangtho ta ding "thumaan thukhenna hun" (2 Thess 1:10) hong tungta hi.

Migilo te a dingin, "Ama' hehna ni hong tung a, kua in thuakzo ding hiam?" (Mang 6:17; Nahum 1:6; Mal 3:2), cihni hong tung hi. Tua ni ciang, a dingzo ding mite pen "Pasian' mite" (Mang 7:4) bekmah hi.

"Ama hongpai ni in kua in thuakzo ding hiam?"
(Malachi 3:2). Hih dotna, bangci dawn ding na hiam?
Na dawnna khanpih te hawmin.

FRIDAY**Feb 1**

Ngaihsut Beh Ding: E G White lai, Testimonies to Gospel Workers, laimai 457-460 sung a, “**Leitung in a Kisap**” cih thu simin.

Seal sagihte in, Pasian in a mite hong khal hong hilhna lim hong lak hi. Kenneth A Strand in hih bangin ci hi:

“Laisiangtho sungah, Pasian in a mite a kepna: khang tawntung a ompihna: thuaksiatna te a dingin zong, thuhkikna picing leh tawntung nuntakna tawh pahtawina te omgai hi. “Sihna leh han” tungah a gualzopa “a nungtapa” (Mang 1:18) in, a thumaan a mite, cikmah hunin nusia ngeilo hi. Amau thuakna zong gualzawhna (Mang 12:11) hizaw a, nuntakna lukhu in, amau ngak (Mang 2:10; 21:1-4; 22:4) gige hi.

KIKUP DING DOTNA TE

1. Seal sagihte honna pan bang pilna na ngah hiam? Leitung ah bangzah siatna tamta leh, Pasian maang lai a, Khazih sungah a kamciamte picing teitei ding cih na bangci up thei hiam?
2. A nuai a thu nihte ngaihsun in: “Pawlpi pen, midangte gupkhiatna dingin, Pasian in a teeltuam ngiat hi.

Nasem dingin pawlpi a koih a hihi. EGWhite, Sawltakte Nasepte, laimai 9. Na khuatual pawlpi ngaihsun in. Lungdamna thu tawh, bangci dan in vapha thei ding i hi hiam?

3. Zanni a dotna te Sabbath Sang khan sungah dawngun, Kuate in, banghangin, Zeisu hong kumkik ni dong thuakzo ding hiam? Topa hong kumkik ding ni a dingin, tuni i nuntakna sungah, bangci kigin theih ding hiam?

Lesson 6**February 2-8****SEAL TUPSA PASIAN' MITE****Sabbath Nitaklam****Feb 2**

Tukaalsung sim ding: Mang 7:2; 2 Peter 3: 9 -14; Thuhilhkik 8:11-17; Mang 14:4,5,12; 17:5; Rom 3:19-23.

KAMNGAH: “**Hih mite pen, bawlsiatna lianpi thuakin, a hong suakta mite a hi uh hi. Amaute in a puanuh sawpsiangin, Tuuno sisan tawh a paaksak uh hi.**” Mangmuhna 7:14.

Seal sagihte thupuak sungah, Zeisu a um peuhmah, thumaanna hangin thupha leh, thumaanlo te samsiatna om hi. A msasa 4 teng pen, Israel te a thuhilhnaleh, khalam thanem na pan khanlawhna leh gualzawhna ngahsak hi. Pasian' mite in haksatna bawlsiatna thuak uh hi. Seal gukna a hon takciang in, Pasian kiangpan, thukkikna hong pia ding hi ta hi.

Mangmuhna 7 na penbel, seal 6 na leh 7 na kikal hunsungteng hi a, Zeisu hong paikik dong hong makaih ding hi. Migilo te'n, thukhenna a thuakuh ciangin, hongpai ni ciang, kua'n thuakzo ding cih dotna dawnna hi pah dinghi. Seal a kitumte 144,000 pha hi. Amau nuntakzia pen, Mang 14:1-5 sungah om hi (Mang 14:1-11:14). Christian pawlpi a nihveina khanlawhna leh Adventist te hong piankhiet hun laitakpen, hih Mangmuhna 7 sung a, seal 6 leh 7 kikal hun sungteng a hihi.

SUNDAY**Huihte Lencip****Feb 3**

Mang 7:1-3; 2 Peter 3:9-14 te simin. John in bang mu hiam? Vantung mite'n, huih, bang tanvei len ding uh hiam? Sealtupna kizo leh bang piang ding hiam?

.....

Laisiangtholui hunlai in, Pasianin, migilote thukhenna a piak ciangin, huihnungsak (Jere. 23:19 - 20; Dan. 7: 2) ci hi. “Vantung mite in, minamte heh mahmahna huih a khah peuhpeuh ciangin, leitung na khempeuh kikhahkhia in suakta dinguh hi” E G White, Kidona Lianpi laimai 614. Hi suksiatna lianpi pen, Pasian in a misiangthote seal a tup sungteng kilencip lai ding hi.

Taanglaipanin, seal tum cihpen, neihna hi. Laisiangthothak sung a seal pen “**Pasianin ama' mite thei**” (2 Timothy 2:19) cihna hi. Pasianin, ama' mite tel sinsen in, Khasiangtho tawh sealtum (Eph 1:13,14; 4:30) hi. Pasian thukham zui, a thumaan a mite taltang tungah a sealtum (Mang 14:1,12) ding hi. Taltang tungah muhtheih a seal khawng hilo in, “amau theihna sungah, thuman thutak guansak in, lampial nawnlo” cihna hizaw hi. E G White, Hun nunung thute laimai 220. Mangmuhna 13:16,17 sung a, **Sapi ciamtehna** tawh kibang vetlo hi.

Pasian sealtupsa mite thumaanna pen, a khang a khang in ki zia-et a, Pasian thukham zuihna mah (Mang 12:17; 14:12) hi pah hi. Thukham 4 na in, Pasian thu manleh manloh etcian na (Mang 14:7) hong hipah hi. Laisiangtho hulai in, Sabbath in, Pasian mite kitheihna ‘**Lim**’ a hih

mahbangin (Eze. 20:12,20; Heb. 4:9,10), hongpai ding hunte a zong, Pasian in, ettelna mah in zanglai hi. Hun nunung ciangin, tua seal in, gimna sagihte lakpan in hong kemcing lai ding hi (Eze. 9:1-11; Mang 7:1-3). Mangmuhna 6:17 na ah, kua dingzo ding hiam cih dotna, a dawnna in, Pasian' misiangtho te dingzo ding hipah hi.

Paul in, Seal hong tum Khasiangtho dahsak khakloh ding (Eph. 4:30) hong hilhkhol hi. Bang a cihnopna hiam? Khasiangtho bangci kidahsak thei hiam? Dahsak-lohna ding bang cih ding hiam?

Monday
Seal Tupsa Pasian' Mite

Mang 7 : 4 - 8 simin. Seal tupsa Pasian' mite bangzah pha hiam? Tua nambat in bang khiatna nei hiam?

Tua nambat in, seal tupna nasep kizo siang cihna hi. Israel te lakpan 144,000 pha hi ci in John in za hi. Hih nambat bel, a taktak hilo zaw a, limpua hibek hi. Israel te nam 12 pha uh a, pawlpi zong, nungzui 12 te tungtawn (Eph. 2: 20) a kiphut hi. Nambat 12 in Pasian' mite limpua hi. Nambat 144,000 icih in, hun nunungpen ah, Pasian' mite picingkhin, Khazih hong kumkik na ding, sihna ciam khalo a kiteel khin (Rom. 11: 26; 1 Kor. 15: 51- 53) cihna a hihi. Mangmuhna 7 sung a minam 12 a cihzong, tulai hun Israel te om nawnlo a hih manin, amau kici thei tuanlo hi. Saklam gam, nam 10 te pen, Assyria te'n sal a man a, minam kihelzau ta mai a hih manin (2 Kumpite 17:6 - 23), Israel nam 12 te kici thei nawnlo ta hi.

Mangmuhna 7 sung a, Israel nam 12 te zong pen, mundang (Gamlak 1: 5 -15; Eze. 41:1- 29) tawh kibanglo a, Reuben tangin (Gamlak 1: 5), Judah sam masa (Mang 7: 5) pah lian hi. Gamlavakna 1 leh Eze. 48 in, Dan leh Ephraim helmah ta leh, Mangmuhna 7 ah om nawnlo a, Joseph leh Levi (Mang 7:7,8) tawh laih hi. Laisiangtho lui a om, Ephraim leh Dan pen, milim biakna ah zualzanguh (1Kumpi 12: 29,30; Hosea 4: 7) a hih manun, Mangmuhna 7 ah, kihel nawnlo ta hi. Mangmuhna 7 na a pen bel, behphungvai hi lo a, khavai hi ta hi. Ephraim leh Dan te in, zualzanguh a hih maniun, Pasian sealtupna sungah kihel khalo uh hi. Laisiangtho thak in zong, Pasian' sealtup dingte pen leitung khempeuh a ki thehthang Israel leh Gentile te hi (James 1:1) ci hi.

Haksat gimna sung a nungta mite a dingin, Pasian in bang kamciam hong pia hiam?

TUESDAY
Mi Honpi
Feb 5

Mang 7:9,10 simin. John in, bangci dan mite mu hiam? Bangci gen a, koipan hongpai ci hiam? Pasian' mai ah, bangci ot uh ci hiam?

John in "kuamah sim zawkloh ding, mihonpi, gimna lianpi pan a suakta, Tuuno sisan sungah a puan uh a sawpsiang" (Mang 7:14) te mu hi. Amaute in, thuman citak a, Zeisu dikna puanpaak a silh, teeltuam mite a hi uh hi. "Gimnalian" cih zong, thu um mite'n, thuman thutak hang a

thuakna te uh (Paikhiatna 4: 31; Late 9:9; Mate 24:9; John 16:33; Rom 5:3) cihna hi. Hih munsan ah, Adventist pawlkhat te in, “**Mihonpi**” cih pen, 144,000 te mah ci a um zong om mah ta leh, gupngah mipite mah a cihna hi zaw hi.

Khatveilai in, Satan a dingin hanciamtak a nasem, meikuangkhuk sungpan singkhuah bang a kiteen khia mi te’n, Pasian tutphah tawh a kinai penpen in omkha ding uh hi. A zomin, mimawh mikhial tampi in, thukham omkei ci in a otot laitak, Pasian thukham kemcing a citak mite, om ding hi. Tuate zom-ah, kuama simzawhloh, gam khempuh, nam khempeuh, pau khempeuh pan a gupkhiat mihonpi te, puanpaak silh, nisuh-hiang tawi in, Pasian mai ah ding uh hi (Mang 7: 9). Gal kizota, beita, a taai ding zah taai khinzo ta, a khut vuah, gualzawhna nisuh-hiang tawi a, Khazih i siangthona in amau siangthona hi ta hi. *EGWhite, Kidona Lianpi laimai 665.*

Eite upna hangin, Khazih dikna i ngah a, tua upna bangci kipsuak sak thei ding i hi hiam? Hauhna, nopsakna te lakah, upna leh thumanna bangci lenkip zo ding i hiam? Thuhilhkikna 8:11-17.

WEDNESDAY
Tuuno a Zuite

Feb 6

Mang 14:1- 5. 144,000 te nuntakzia thum in bangteng hiam? Mang 14:12 na a, hun nunung misiangtho te nuntakzia tawh bangci kizop na nei hiam?

Mang 14:4,5 ah, 144,000 te leh, 14:12 ah hun nunung a mite in “Pasian thukham zui a, Zeisu upna a nei te” ci hi. Satan’ hehna haksatna teng khempeuh a

thuakuh hang, Zeisu tawh kinai cinten, a kip tentan mite a hi uh hi.

Mang 17 : 5, 144,000 te’n numei tawh kininsak lo cihpen bang a cihnopna hiam? Amau sianthona pen, leipan a kitankhia “Pasian tungah gah masa” (Mang 14 : 4) a cih tawh bangci kizop hiam?

Zualzanna pen, Pasian tungah thumaanlohma limpua hi. Mang 17 : 5 na ah, numei gilo nu Babylon leh, a tanu te in, leitung mite tawh a mawh uh hi (18: 3) na ci hi. Hi mah taleh, 144,000 te’n, tua mawhna tawh, amau pumpi kininsaklo in thumaan citakin “Tuuno paina khempeuh ah zui kawikawi uh hi; Mite lakpan, ki tankhia a, Pasian mai leh Tuuno mai ah gahmasa a hi uh hi” (Mang 14:4).

Tanglai, Israel te’n, gah masa pen a hoihpen, Pasian pia (Gamlak 18:12) uh hi. James 1:18 ah bel, gupngahte pen “gah masa” in gen mah leh, 1 Kor. 15:50- 52 ah bel, sihna ciakha lo, a hingtang a laktohna ngahte, tuate mangmuhna in 144,000 te na ci hi. a khang a khang pan a, gupna ngah mite, Pasian mai a gah masa te (Mang 14:14-16) ci hi.

I theihlohsa in, khalam mawhna i bawlkak theihdan bangte hiam? I lungmuan mawkmawknna in bangzah lauhuai zaw hiam?

THURSDAY
Eite Pasian Leh Tuuno Tungah Gupkhiatna

Feb 7

Mang 14 : 5; 2 Peter 3 : 14; leh Jude 24,25 cih te na sim lecin, hun nunung, Pasian’ mite in “mawhna neilo hi” ci hi; a piangthei diam?

A nunungpen amau' kam ah mawhna banglo (Mang 14:5) hi ci hi. Leitung mite in, khemna lampi a teelzawk laitakin, Pasian mite in, thumaan itna sung (Thess 2: 10,11) bekah om uh hi. "Mawhneilo" cihpen, Greekpau in 'amomos' hi in, mawhna banglo, mi siangthote, (Siampi 19:2; 1 Peter 2: 9) na ci hi. Abraham leh Job te zong, mawh neilo hi (Piancil 17:1; leh Job 1: 1) ci hi. Tua mah bangin, Tapidaw te zong mawhbanglo, a siangtho dingin hong sam hi (Eph 5: 27; Phil 2: 15).

Rome te 3:19- 23 sim le cin, hih thuman i letkip ding bang hang thupi hiam?

Leitung hun beikuan ciangin, 144,000 te in, Khazih lim kilangsak ding uh hi. Amau hoihna sangin, Khazih in, amau a ding bang hihsak cih kilangsak zaw ding uh hi (Eph. 2:8-10). Tuuno sisan tawh amau' puan uh sawp a (Mang 7:14), Pasian mai ah "pau-banglo" (2 Peter 3:14) in om uh hi.

Leitung' nate khempeuh tawh kipelh in, hong gumpa i sutdong, kipuahphat kul hi. "Hih haksatna te a bei ciangin, Pasianin, a misiangthote a pahtawi ciangin, mawhbanglo in hongkigum takpi cih i lung-muang ta ding hi." E G White, Selected Messages book 3, Laimai 355,356.

Asiangtho nuntakna nungta in, ei leh ei kisianthosakna, kiphatsakna pan bangci i suakta thei ding hiam?

FRIDAY
Ngaihsut beh ding

E G Whhite lai Selected Messages bu 3 na laimai 353 -357 sung ah, "mawhna kipelhna leh gupkhiatna" cih thulu sim in.

1440,000 te thupen, kinialna tamthei mahmah hi. Mangmuhna sungah bel, haksatna, gimna te khempeuh sungpan keptuam huttuamna a ngah, Pasian' misiangtho te hihtuak hi (Ps Late 91:7- 16; Mang 7:15 -17). Amau te in, a piang ngeilo sittelna te kantanzo uh hi. A kihel dingte a mimal in genna bel omlo hi. Pasianin, amaute kemtuam khinkhian (Thuhilhkikna 29:29) ci hi. I manawh hunte bekin kua kihel theiding khentat ding hi.

"Zeisu' genkhohlna ah, Pasian in, thuman thutak hong pia napi in, mihing te'n, upmawh thu, phuaktawm thu khawngtawh a lungsim uh kidimsak uh hi ci hi. Mite in tuabang a kul-lo thute a up uh ciangin, Pasian in amaute makaihlo pah hi. Pasian' thu a hilo phuaktawm thu tetawh kihilh ding, Pasian in deihlo hi. A kua'n 144,000 te teelding hiam, cihbang lungkhamna te in, mailam gimna te kantan zawh na'ng hong huhlo dingpi khawng lungkham mawkmawk ding, Pasianin deihlo hi. Dotdot kullo in, Pasian' misiangtho te in, a hunciang thei veve ding uh hi." E G White, Selected Messages bu 1 na, laimai 174.

KIKUP DING DOTNA TE

1. A nuai a hanthotna te ngaihsun in. "144,000 te lakah i kihel theihna dingin, nasia takin hahkat ni."

EGWhite, SDA Bible Commentary, bu 7 na. laimai 970.
 Hih kammal i bangci nuntakpih thei ding hiam?
 Nisim nuntakna bangci in hong huzaap zo tammaw?

2. A thupi mahmah, 144,000 te hamphatna khat in, kuamah in a saktheihloh, gimna lianpi sungpan suahtakna (Mang 14:3,4 leh 15:2,3) lathakte, amau te in sa ding uh hi. Tu a na nuntakzia na ki et ciangin, Pasian tawh na kinaihna om nasa hiam? Khazih theihna leh, theihtel taktakna bang kilamdang nasa hiam? Mi khat in “Khazih pen a bangci daan hiam” ci’n hong dong leh, na dawnkik ding daan gen dih in.

Lesson 7

February 9 - 15

PENGKUL SAGIHE

Sabbath Nitaklam

Feb 9

Tukaalsung sim ding : Mang 8:1-13; Gamlak 10:8-10; Eze. 10:2; Mang 10:1-11; Daniel 12:6,7; Siampi 16.

KAMNGAH: “A sagihna vantungmi in a pengkul a tum ciangin, ama nasem kamsangte tungah a gensa bangin, Pasian in ama ip thusim a geelte hong semkhia ding hi.” Mangmuhna 10 : 7.

Seal ngana lai in, a thuman Pasian mite’ bawlsiat thuakna kahna te i muzo hi. Tua kha te in, biakna tau nuai a omin, “**Topa aw, bangtan sawtlai ding hiam?**” (Mang 6:10), ci in a kiko uh hi ci hi. Vantungpan aw in, ngak tentan lai un, Topa thukkikna ni hong tung ding hi ci in hanthawn hi. Mang 6:15-17 na ah, Zeisu hong kumsukkik in, migilo te tungah thu a khenna hong lak hi.

Seal ngana, misiangtho te thuakna cih teh, Abel pan kipan hunbei dong misiangtho khempeuh i thuakna te hangin, “Ama’ nasemte sisan phu a la kik hi” a cihte (Mang 19: 2) a hihi. A thuaksia Pasian mite in, a thungetna uh Pasianin za cih thei in kiptakin om ding uh hi.

Pengkul sagih te in, a misiangtho te a bawlsia migilo te tungah, Pasian in thukkikna a piakna leh a thukhenna te a hihi. Pengkul sagih te i deihna bulpi in, Pasian mite’ thuaksiatna te tungah, vantung in awlmawh selo a om a hihlohma hong lak hi.

SUNDAY**Misiangthote' Thungetna**

Mangmuhna 8 patna lamah, vantungmi sagihte Pasian maiah dingin a pengkulte mutding kigingsa in omna lim i mu hi. Pengkul te a mutma in, ngaihsutting thudang khat om hi. Pengkulte a khatna i telding kisam hi.

Mangmuhna 8:3,4 sungteng simin, Jerusalem biakinnpi sungah biakbuk nasepte tawh tehkak ni. Jew Laisiangtho hilhcianna laibu khatin, nitak biakpiakna tuuno pen meihal biakna tau tungah kikoh in, a sisan te biaknatau bulah kibua hi. A kiseh siampi khatin paknuamtui hai tawi in biakbuk sung siangthona mun khamtawh kibawl biaknatau tungah paknamtui hal hi. Siampipa hong pusuak ciang in, a tawi paknuamtuihai leiah a pahna aw ging hi. Tuaciang in vantungmi sagihte in a pengkul te uh mut a, tua ni ading biakbuk nasep te a kizo hi.

Mangmuhna 8:3-5 sung a zat kammal te ngaihsut huai hi. Vantungmi in Pasian' tokhom mai a om khamtawh kibawl biaknatau (Mang 8:3) mai ah paknuamtui a sang hi. Paknamtui in Pasian' misiangtho te' thungetna lim la a, amau thungetna Pasian in a dawng cihna hi.

Mangmuhna 8:3-5 sung ah Pengkul thu mangmuhna om hi.

- Pengkul sagih te khatna in, bawlsiat thuak misiangthote' thungetna dawng in Pasian in a langpang migilote tung thu a khenna hi.
- Pengkul sagih te in, "Zeisu in tuuno bangin hong sihna thu" Tanglai hunpan kipan Zeisu a nihvei hong kumkik dong a huam hi (Mang 11:15-18).

Feb 10

Mang 8:5 leh Eze 10:2 simkhawm in. Ezekial' mangmuhna sung a, Pasian langpang Jerusalem mite' tung mei-am a thehna te in, Mangmuhna sung kigelh pengkulte thu bangci'n hong hilhcian hiam?

.....

Vantungmi in biaknatau tung a mei-am te la in, leitung ah thehsuk hi. Hih mei-am/meikuang te pen, misiangtho te thungetna biaknatau tung a mei-am te ahi hi. Akhian in, Pasian in a misiangtho te' thungetna sangin, leitung mite tungah thukhen ding hi. Tuahun ciang Pasian in a misiangtho te' lam pangin nasem ding hi. Mei-am kuang/paknuamtui halna kuang lei ah paaikhia cihna in zong, tua hun ciang Zeisu in mite' mawhna ading a thumsakna te khawlding cihna hi. Hehpihna kong hong kikhak tading hi (Mang 22:11, 12).

MONDAY**Pengkulte' A Khatna****Feb 11**

Pasian in, a misiangthote' lam pangin na a sepna te, Mangmuhna Laibu in thukhunlui hunlai pengkul zatte tawh genteh hi. Pengkul cihpen tanglai Israel te' nisim nuntakna ah aki zangh mahmah khat hi (Gamlak 10:8-10; 2 Khang 13:14, 15). Pengkul aw te in, Israel mite ading in biakpiakna hunte, galdo hunte, anlak hunte, leh pawi thupi te phawksakna a hihi.

Pengkul mutna in thungetna tawh ki zawitawn hi. Tua aw in biakpiak laitak leh pawi thupi te ah Pasian leh a mite' kiciamna phawksak hi. Pasian' ni (Joel 2:1) ading kiginsak na zong hilai hi. Galdo hunsung pengkul mutna

in amau tatzia ding hilhna zong hi a, Pasian' huhna khut a sapna uh zong hipah hi. Hih thute mah bulphuh in Mangmuhna laisiangtho in pengkul tawh thu hong genteh hi.

Mangmuh 8:13; 9:4, 20, 21 sung simin. Pengkul sagihte in, kuate tungah thukhen hiam?

Mangmuhna sung kigelh pengkul te in, Pasian in tanglai a misiangtho te' thungetna sangin na a sepna te ahihi. **'Seal'** cih pen Pasian lampang ding a khensat te a hi a, pengkul awging in, leitung lampang mite tung ah thukhenna hi (Mangmuh 8:13). Leitung mite kisikkik na'ng a ziakai ma in, theihkhohk sakna zong a hihi.

Pengkul sagihte in, John hunpan kipan, leitung beidong hun khempeuh huam (Mang 11:15 - 18) hi. Tua pengkulte a kitum hun in, vantungah mawh thumna a kibawl laitak (Mang 8:3 - 6), leitungah lungdam thu a kihilh laitak (Mang 10:8 - 11:14) a hihi. Pengkul thukhenna te in khen thum suah khenhat tungbek a hihi. Pengkulte hunin, pawlpi sagihte' hun leh seal sagihte hun tawh a kibang mah hi a, pengkul sagihsna in, Pasian ukzawkna aana a lakkik hun hong tungta cihna a hihi.

- a. Pengkul khatna leh nihna te in, Khazih singlamteh ah khai a, pawlpi masa a bawsia, Jerusalem leh Rome kumpi tungah thukhenna a hihi.
- b. Thumna leh lina pengkul in, hun laizang hun a, a zualzang Tapidaw pawlpi tungah thukhenna a hihi.

c. Ngana leh gukna pengkul in, pawlpi kipuahphat hunlai a, biakna galdona te lak hi. Tua gal kidona te in, Armageddon galpi sung a, Satan' nasepna te hong musak hi.

Tangthu in, sisan leh dahna tawh na kidim mah taleh, tua te in, Zeisu hong kamciamna te sungah bangzah hong thahat saktuam hiam?

TUESDAY

Vantungmi Leh A Kihong Laibu

Feb 12

Pengkul gukna in hunbeina hong lak hi. Tua hun laitakin, Pasian mite in bang hih uh hiam? Pengkul sagihsna a tum ma in, hun nunung ciangin Pasin' mite hih dingte, kihilhna khat om ding hi.

Mangmuhna 10:1- 4 simin. Bang thu piang hiam?

"Tua a thahat vantungmi pen, a dang hilo, Zeisu mah hi pah hi." E G White, SDA Bible Commentary vol. 7, laimai 971. A khete tuitung leh leitungah koih a, leitung buppi zak dingin thu tangko hi. Humpinelkai hawkbang in awng hi. Pasian awpen humpi nelkai aw tawh genteh (Hosea 11:10; Mang 5:5) hi.

Mang 10:5 -7 simin la, Daniel 12: 6,7 tawh saikaak in. Kammal kibang a zat bang om hiam?

Vantungmi in, "hun om nawnlo hi (Mang 10: 6) a cihpen, Greek pau in chronos hi a, hunkhat limlim a

cihnopna hi. Daniel 12:6,7 a, misiangtho te thuakding bawlsiatna in hunkhat hun te leh hunlang ci a, AD 538 - 1798 kikal kum 1260 sung, Pope in a mi bawlsiat hun ding teng a hihi. Daniel leh Mangmuhna sung “Ni” a cih teh kumkhat limpua (Gamlak 14:34; Eze. 4:6) a hih mahbangin, ni 360 in kum 360 mah hi pah; hun thum leh a lang a cih teh, ni 1260, aih ke’h kum 1260 hi pah a, tuakhit teh, beina hong tung ding hi.

Daniel 8:14 a, ni 2300 (457 BC - AD 1844) khit ciangin, tuabang ni leh kum kikhel genholna om nawnlo ding hi. EGWhite in, “vantungmi in kamciam kip tawh hong gen Topa hong pai na ding ni te thu agenna a hihi. Hih hun ciangtanh khit teh, a dang hun ciangtanh om nawnlo ding hi. 1842 pan 1844 dong a sawt hun ciangtanh khit nungah, hun ciangtanh dang om nawnlo ding hi. A saupen hun ciangtanh in, 1844 kum, phalbi kuan dong huamto hi.” EGWhite SDA Bible Commentary vol 7. laimai 971.

**Ei leh ei a ni ciangtanh khawng bawl mawkhawk
ding a hoihlohma banghang hiam?**

WEDNESDAY
Laizial Neekna

Feb 13

Mangmuhna 10:8- 11 simin. Laisiangtho sungah “ne” cih limlim, mipi tung hawpsawn ding, Pasian kiangpan kam sang, thu sang (Eze. 2:8 - 3:11; Jer. 15:16) hi. Kam a sanlai in, thuhoih hi napi, a gensawnkik ciang, mipi hehna leh nialna piang thei hi. John mangsung a khum/kha laizial pen, Daniel laibu hi a, hun nunung thu tampen hi. Tawntung lungdamna thu tangko ding pen, “a beibang” pawlpi (Mang 14:6,7) hi ding ci hi.

Tua banah, a khum/kha khat pen, kum 2,300 beikuau a, Miller pawlte in, 1844 kumin, Zeisu hongpai

ding cih upna a neih laitakin khum mahmah hi. Zeisu hong pai takpiloh ciangin, lungkiatna dahna thuak uh a, kha mahmah leuleu a, laisiangtho limsim mahmah kik uh hi.

**Mangmuhna 11 : 1,2 simin. John bang hih ding
kisawl hiam?**

Mangmuhna 10 tawh a kizomto a hihi. Biakinn, biakna tau, leh biakna piate teh ding kisawl hi. Laisiangtho in “teh” a cih ciangin, thukhen (Matt. 7 : 2) cihna hi. A kiteh ding biakinn pen, vantung biakinn hi a, Zeisu’n eite a ding “palai” hong sepsak hi. Biakinn, biakna tau leh biakna pia te cih in, **Mawhphel Ni** (Siampi 16 : 16 - 19) cihna hi. Tua ni pen, “teh ni” hi in, Pasian in, a mite’ mawhna thu a khen ni a hihi. Mang 11 : 1 a thukhenna zong, Zeisu hong pai ma in om ding hi. Hih thukhenna pen, biakna piate, Pasian mite a ding vilvel a hihi.

Mang 11:1 na ah, vantung biabuk thu pen, lungdamna thu laigilpi hi cih hong lak hi. Pasian nasepna tengzong hong musak hi. Leitung mite’ a ding in, Zeisu hong gupna nasep teng khempeuh cingtakin hong musak hi.

**Mawhmaisak nani in, sisan pen thu laigil a hihlam
(Siampi 16) phawkin la, thukhenna pen eite a dingin
lungdamthu a hihna bangci theih ding i hi hiam?
Banghangin hih thu thupi mahmah hiam?**

THURSDAY
Teci Nihte

Feb 14

Mangmuhna 11 : 3 - 6 simin. Teci nihte pen, Siampi puantual a silh, Zerubbabel leh Joshua te a hihna bangci ki muh hiam?

Teci nihte cihpen, Jew ki-ukna thukhun sungah, tec iawmpen nih in thu kipsak ding (John 8: 17) cihpan a hong pai a hihi. Tua tec ihte in, Laisiangtho lui leh Laisiangtho thak zong hi pah a, tua geel kikhenkha theilo hi. Pasian mite in, tua Pasian thupiakte leitung khempeuh ah i tangko ding hi. Hih tec i te geel in, puansia silh ci hi. Kum 1260 hun (AD 538 - 1798) sunteng hi a, puansia in dahna lim (Piancil 37: 34) ciing hi. Laisiangtho thuman kiselcip a, mite' phuaktawm ngeina te a kizuih hunte a kawk a hihi.

**Mang 11:7- 13 simin. Ni/Kum 1260 tawpna ah,
teci nihte tung bangthu piang hiam gendih in.**

Teci nihte a that Sapi zong Satan pan hong piang hi a, tec ihte a thahna zong, Laisiangtho um nawnlo a, Pasian omlo cih upna hong piang in, Pianhit (France) gam kidona pi tawh kizom hi. Pianhit gam a biakna langdona hong omna in, Sodom ginatlohma te piangsak a, Egypt te kiphatsakna tawh Pasian uplohma te leh Jerusalem langdona te piang sak hi. Zeisu hun a Jerusalem a thupiangte mah, tulai ei hunah hong piang veve hi.

Teci nihte hong thokik cih penin, Pianhit kidona pi khit, biakna khanlawhna om in, nihveina hong kumkik ding thute ki tangko a, laisiangtho kipawlina (Bible Society) kibawl in, leitung khempeuhah laisiangtho kihawmkhia cih te a hihi. Hun bei madeuh in, leitungbup in laisiangtho bulphuhna (Mang 18:1-4) hong nei ding hi. Tua in, dawimangpa vanglatna khangsak ding a, leitung khempeuh

in, Sapi biakna tawh, Pasian mite dona lam ah makaih ding hi (Mang 16:13-16; 4:12).

FRIDAY
Ngaihsutbeh ding

Feb 15

Pengkul sagihna in, hun nunung thupiangte (Mang 11:15 -18) kawk hi. A langdo hih leitung in, Satan' khutnuai ah kum tultampi a om khit ciangin, Pasian kiang hong zuatkik ding hun hong tungta hi. Zeisu, singlamteh tung a sihna leh a vankah kikna te khempeuh in a gualzawhna (Mang 12:10,11) hizaw hi. Satan in, hun tomno bek neilai (Mang 12:12) a hih manin, a hih theihtawp in, suksiatna hong bawl ding hi.

Pengkul sagihna in, laibu sungah om pulak nailoh teng hong pulak hi. (1) Minamte heh mahmah : Mang 12 - 14, Satan hehlua (Mang 12:17); a kipawlpoh nihte, tuipi lakpan Sapi leh leilakpan Sapi tegel in, Pasian mite do ding in kithawisak hi. (2) Na hehna hong tungta hi : mipite hehna pen, Pasian in, Ama hehna, gimna sagihna tawh dawng hi (Mang 15 : 1). (3) Misisa te tung thukhenna (Mang 20:11- 15). (4) Pasian nasemte thaman kipia (Mang 21 - 22). (5) Leitung a susia te susia kik ding : (Mang 19: 2) Hun nunung Babylon in leitung susia a hih manin, amah ki susia ding. A nunungpen in, Satan leh a nungzui te khempeuh kidona lianpi sungah kisusia ding (Mang 19:11 - 20:15).

KIKUP DING DOTNA TE

1. Khat veivei lungdamthu tangkona in, kha thei hi (Mang 10 : 10). I genkhiat kammal te hong kisanglo, ki simmawh thei hi. Langdona khawng bang piangsak zawzen hi. Tuabang te a tuak kha

laisiangtho sungah kua na mu hiam? Bang pilna i ngah thei diam?

2. Hun ciangtanh te awlmawh ding, Topa'n hong lak denden hi. Hun ciangtanh thak omngei nawnlo ding hi. Khasiangtho hong kibuak ding hun, Zeisu hong kumsuk ding hun cihte ciangtanh omlo hi. EGWhite, Selected Messages bu 1 na, laimai 188. 1844 khitciang hong tungding thu te, hun ciangtanh piak mawkmawk bangzah in lauhuai hiam? Tua lauhuai thu te pan bangci kidoptheih om ding hiam?

Lesson 8

February 16 - 22

SATAN ZAWHCIPSA GALPA

Sabbath Nitaklam

Feb 16

Tukaalsung sim ding : Mang 12; Piancil 3:15; Isa 14:12-15; Dan. 7:23- 25; 2 Thess 2:8-12; Mang 13:13,14; Mang 19:20.

KAMNGAH: “I sanggante in, Tuuno sisan leh thuman a genna uh tawh amah na zo uh a, a nuntakna nangawn uh napia ngam uh hi.” Mangmuhna 12 : 11.

Mang 12 - 14 te in, hun nunung a dingin hong kiging khol theisak hi (Mang 15:1 - 2:5). Mangmuhna laibu a patna lampan a langbang in, Tapidaw hunsung a thuakssiatna teng vive pulaak khia a, a tawpna lam a lang in, Pasian gam hong piankik na'ng thu vive pulaak leuleu hi. A lian 12 na in, hun nunung leitung thupiangte nung a bang om cih lak hi. Khazih leh Satan in, a khang a khang a kidona te hong lak toto hi.

Pasian leh a mite' gal ci-phapen pa in Satan a hihna Mangmuhna in honglak hi. Siatna khempeuh nungah amah ding kinken hi. A galzawh theihna'ng nunungpen in, Armageddon hi cih thei a, a hih theihtawp in hanciam mahmah hi. Mang 12 na in, Satan cikmahin gualzo ngeilo ding cih lungmuanna hong guan hi. Satan in, hun nunung abeibaang pawlpi pen, a hihtheih zahin do mah ta leh, Zeisu sung ah gualzo veve ding hi.

SUNDAY**Numei leh Gulpi**

Mangmuhna 12:1- 4 simin. John in, mangsungah lim 2 mu hi. Lim masa in **Nau-gai Numei** leh a zom **Gulpi** hi. Tua numei kua hi a, bang hong hilh hiam?

Laisiangtho in numei a cih teh, Pasian' mite (2 Cor. 11:2) cihna hi. Numei gina in, thuman thutak a len pawlpi mite, leh, numei zualzang in, langdo Tapidaw te cihna hi. Mang 12 na a numei in, Israel te limpua (Mang 12:1- 5) masa a, tua khit teh, a neu 13 - 17 sungah, pawlpi maan pan a beibaang pawlpi hongpiang cih honglak hi. Tua numnei in, "Ni" puansilh in, "Kha" tungah ding hi. Laisiangtho in Ni a cihciang Khazih siangthona (Mal 4:2) hi. Amah "leitung khuavak" (John 8:12) hi a, a mite in tua khuavak lengkiksak ding (Mate 5: 14-16) uh hi. "Kha" in, khuavakneu (Piancil 1:16) a hih mah bangin, laisiangtho lui in, Khazih' lungdamna thu genkhol a hihna honglak hi.

John lim muh nihna ah, taanglai gulpi a hi, Satan, limpua "Gulpi" (Mang 12: 9) mu hi. A mei in, vantung aksi sehthum suah sekhhat a kaikhia hi ci hi. "Mei" cihciangin "khemna" (Isa. 9:14,15; Mang 9:10), zuau thu cihna hi. Kiphatsakna hangin vantungpan a kihawlkhia Satan in, vantungmi sehthum suah sekhhat (Isa. 14:12 -15) khemzo lai hi. Tua a khemsa vantung mite pen "dawino" te vive hi uh a, gupkhiatna nasep hong do den (1 Tim. 4:11) te hi.

Mangmuhna in, gulpi pen "lutang sagih leh kii sawm nei" ci in gen hi. Tua te in, Satan, Rome kumpi (Mang 12:4) leh Sikha biakna (Mang 16:13) a cihnopna hi. Gulpi

Feb 17

in "Satan" hi a, Herod tungtawnin i gumpa hong thahsak nuampa hi. Kum zalom masa lai in, Tapidawte tungah nakpi tak a gal a do pen, Satan mah hi pah hi. *E G White, Kidona Lianpi laimai 438.*

Mangmuhna 12:9 sim le cin, Satan pen "taanglai gulpi" na ci hi. Piancil 3:15 na leh, "numei in a suah peuh ciangin, susia pah dingin, gulpi kiging" cihte bangci kizop nasa hiam? Mang 12:4.

A kipatcil pan kipan, Satan in Messiah bawlsiat sawm tawntung a, Rome kumpi zang (Mang 12: 4), Amah suksiat ding hanciam (Matt 2:13-16) mah leh, Pasian in tua nau "Vantungah lato" (Mang 12:5) ci hi.

MONDAY**Satan Lei ah Ki Khiasuk****Feb 18**

Mangmuhna 12:7-9 simin. Vantungah gal om ci hi. Satan leitungah hong kikhiatsuk liang na dingin, tua gal in bang gal hiam?

Kidona lianpi kipat lai pekin Satan in Pasian langdo a hih manin, leitungah hong kikhiatsuk pah hi. Pasian tokhom iplah in "sangpenpa kabang ding" (Isa. 14:12 -15) ci hi. Pasian do dingin ding mah taleh, lehna tawh, leitungah hong kikhiatsuk hi. Adam leh Eve khem in, leitung ukzawkna aana (Luke 4:6) hong ngah hi. Hih leitung pum uk in, vantung kikhopna ah zong, leitung ai-awh in va paito (Job.1:6-12) hi. Singlamteh ah a gualleh pan kipanin, a mawhna daan uh a thuak masiah, hih leitung ah thongkia in ki omcipsak hi (2 Peter 2:4; Jude 6).

Sihna tawh Zeisu in a kimansuahsa khempeuh, tankik a, Satan' omzia taktak teng zong pulaakkha hi. "Satan' maituam kibalkeek sak hi. Ama' ukzawhna pen vantung leh a nungzui te mai ah, kilang takin hong om hi. Mithatpa, Zeisu sisan luangsakpa cih hong kitel ta in, amah, vantungmi hihna pan, a bul abaal in kilongkhia ta cih theita hi. Tua pan kipan a septheihna te ciangtanh in omta hi" EGWhite, Desire of Ages, laimai 761. Leitung mikhempeuh mit muh in, ukzawkna aana pen Satan kiangpan Zeisu tungah kipia ta hi (Eph. 1:20-22; Phil 2:9-11). Tua a hih manin Zeisu in, "Hih leitung thu kikhenzo a, leitung ukpa zong kilawnhia zo hi" (John 12:31) na ci hi.

Satan tung thu kikhen a, "gupkhiatna, tha hatna, ukzawkna leh vangliatna te Khazih in nei tawntung hi" (Mang 12:10) ci hi. Satan in Pasian' mite bawlsiat theihna ciangtanh in kipia lai a hih hangin, a hun tom mahmah ta hi (Mang 12:12).

Mangmuhna 12:11 in galpa langkhat ah i kidaltheih na ding, bang hong hilh hiam? (Eph 6:10-18).

TUESDAY
Leitung ah Gal om

Mangmuhna 12:13,14 simin. Vantunglam kikhak-tanzo hi napi, Satan in kum 1260 sung pawlpi do tangtang hi. Pasian in a pawlpi bangci daan in panpih den hiam?

Vantung aa mawhzong denpa Satan, leitungah hong kikhatsukna pen, Zeisu in ama nuntakna a piakkhiatna tawh kipsak hi. Satan in bangzah do taleh gupkhiatna nasep

kisem ngiatngiat lel hi. Ama ukzawhna aana pen ki lakik ding cih thei a, Pasian in ama limsuun a bawlsa mite bangzah suksistsak thei ding ka hiam cih hahkat mahmah hi. Khazih in, hehpihna tawh mite' mawhna maisak a, ama a ding lah lamet bei hi ta a hih manin, tua mite tam a khem theihtheihna dingin hanciam mahmah hi. E G White, The Spirit of Prophecy vol 3, p 194, 195.

Khazih in a ma itna hong buaksuk mahbangin, Satanin zong a hehna hong buaksuk hi. Himah taleh, Pasian in a mite hong kem in, kum 1260 sung sinsen, gamlak ah seelcip hi. Satan hong bawlsiat hun pen Mangmuhna in nihvei pulaak (Mang 12:6; Mang 12:14) hi. Tua te a nihmah in, kii no (Dan 7:23-25) huntawh zong a kituak hi. AD 538 pan AD 1798 sung teng Rome pawlpi in, biakna leh leitung ukzawkna aana hong nei hi. Napoleon' galkap mangpa Berthier in Rome kumpi a mat ciangin, tua aana tawmveisung a bei a hihi. Hih hunsungan gulpi in numei a taailum dingin, a kamsungpan tui a luangkhiasak hi ci hi. "Tui" in mipi cihna hi (Mang 17:15). Rome Kumpi in Tapidawte bawlsia dingin galkapte sawl hi. Hun bei madeuh in "Lei" in tua tui valh a hih manin numei a suakta hi. Tua pen America ah biakna suahtakna kingah na ah hongtangtung hi (Mang 12:16).

**Bawlsiatna kum 1260 sumgom cih ngaihsun in la:
Ei deihna sangin, Zeisu hong kumkik ding ziakai zawtham pek cihpen, banghang hi ding hiam?**

WEDNESDAY
A Beibaangte Do

**Mangmuhna 12:17 simin. Hun nunung ciangin,
Satan in kua dopen ding hiam?**

Tawnga/ beibaang cih kammal in, mipi te'n a langdo laitakun, a thuman a citakte cihna hi. (Kumpi masa 19:18; Mang 2:24). Hun nunung ciangin, mipi te in, Satan lam ah om ding uh a, mi tawmno khat 1798 khit a piang te in Khazih lam a om manun, Satan heh mahmah ding hi.

Mangmuhna 12:17 sung a beibaang te omzia thunih in bang te hiam? Hun nunung ciangin, Pasian lam a om i hihna bangci i theithei ding hiam?

A beibaang pawlpi in, Pasian thukham lenkip hi. Mangmuhna 13 in, Pasian piak suangpeek mah bulphuh kik cih hong lakzo hi. Amasa 4 tengpen, biakpiakna hi a, hun nunung ciangin kua bia ding hiam cih hipen hi. Leitung in, sapi bia hi mah taleh, a beibaang pawlpi in, Piangsakpa Pasian bia (Mang 14:7) uh hi. Thukham 4 na, Sabbath in, Pasian pen piangsakpa cih hong lak a, hunbei dongin, tua in thu laigilpi hi ding hi.

A beibaang pawlpi in, Zeisu tec i panna (Mang 19 : 10); “**Khasilpiak lai te**” nei ding hi. Mangmuhna 22: 9 tawh saikaak leng, John “sanggam” Zeisu’ tec i panna neite pen, Kamsang te hi a, John mahbang in tec i a pang (Mang 1:2) te in, **Kha silpiak laite** nei ding hi. Tua lai te in, hunbei dongin amaut makaih tawntung ding hi. Tua hi a, ei Adventist te in, tua Kha silpiak lai EGWhite lai te i nei hi.

Tua Kha silpiak lai te sungah muhna thukmah-mah te na nei hiam? Tua te in, eite pawlpi te, bang nasep mabaan hong guan hiam?

THURSDAY

Hun nunung Satan' Sepdaan

Feb 21

Mangmuhna 12:17 in, leitung mite leh, a thuman Zeisu nungzuite nangawn khemna dingin, a nasepdaan te puahpha hi. Tapidawte tangthu sungah, Satan in, pawlpi sung lungkimloh na, aana lakna, a pualampan bawlsiatna cihte tawh Pasian do hi. Hihte tawh gualzawhna tampi mah ngah hi napi, Pasian misiangtho te in, biakna puahphatna nakpi'n bawl a, thumaan thutak mukik ta uh hi. Tua a hihmanin, Satanin, a hun neihsun tomno sunteng, a beibaang pawlpi do dingin “gal” bawl hi (Mang 12:17). A beibaangte a dona ah, kha nasepna, na lamdang mahmah te (Mang 16:14) bawl ding hi. Tua in Satan' nasep daante sangsak semsem ding hi (Mate 24:24). “Khem” cih kammal pen (Mang 12 - 20) sungah om pahpah a, 12:9; 20:7-10) na te ah, Satan nasepdaan hi ci hi.

2 Thess. 2: 8 -12; Mang 13:13,14; 19: 20 cihte sim le cin, hun nunung a Satan hong khemna te bangte khawng hiam?

Mang 12 - 20 sung tengah, Satan in leitung a huzaap nopzia hong lak hi. Leitung kumpite zangin, Rome kumpi gulpi mah bangin (Mang 12:4,5) “tuipi sapi” in hong zui a (Mang 12:6,15; 13:1-8); a tawpna ah “lei sapi” (Mang 13:11) hong tun hi. Mangmuhna laibu a zom omlai teng ah, Satan khemna namthum **Sikha biakna - gulpi, tuipi sapi** a hi Rome pawlpi leh a langdo Tapidawte pawlpi - lei sapi tuuno tawh a kibang; tuate Pasian langdona in hong zang hi. Pasian kiangpan lampial a, Satan tawh mapang-khawm in, “vangkan Pasian galdo na ni lianpi” (Mang 16:13) a dingin

kigingsak hi. Tuate khempeuh, Zeisu hong kumkik ciangin, ki susia gai ding hi (Mang 9:20). Gulpi, Satan a hih leh, kumtul bei ciangin ki susia siang ding hi (Mang 20:10). Hih khemna te in nasia lua ding a hih manin, mi tampi te in kisiatna lam teel ding uh hi (Mate 7:13).

Satan' khemna te tel theih na'ng pilvang dingin, nihvei sitset hong kisam hi. (Mang 13:18; 17:9). Bang pilna hi ding hiam? James 1:5 na pan bang pilna i ngah thei diam?

FRIDAY
Ngaihsut Beh Ding

Feb 22

Kidona lianpi laimai 518 - 530 sung a, Satan' Thaang" thulu nei, E G White lai at na sim in.

Mangmuhna 12 na in, hun nunung ciang a. Pasian mite kiangah, Khazih leh Satan kidona hong telsak hi. Tuni a bangteng phukha a, a lauhuaizaw bangteng phukha lai ding cih hong theisak hi. Paul in zong, hun nunung ciangin, "Satan' vangliatna tawh a gilopa hong pai in, lim leh na lamdang a pawlpawlte bawlding a, gitloh khemna a nam tuamtuan zangin, siatna a thuak ding mite a khem ding hi. Tua bang mite in, a suahtak na dingun, thuman sang nuamlo, deihlo uh a hihmanun, siatna a tuak uh hi" (2 Thess 2:9,10).

Mangmuhna in, Pasian muang a, mailam thu awlmawh ding hong hanthawn hi. Satan pen gal thahat mahmah leh pilvang mahmah hi napi, Khazih zo zolo (Mang 12 : 8) hi. Pasian' mite a dingin, a beisa sung a Satan leh a vangliatna te a zocip khinpa tungbek mahah lam-etna i

nei hi. Ama'n zong a nungzuite tungah "a tawp dongin, kong ompih ding hi" (Mate 28:20) ci in hong kamciam zo hi.

KIKUP DING DOTNA TE

1. **Ei Adventist te, hun nunung a beibaang pawlpi i hihi. Hampha si hang. I mabaan te (Luka 12 : 48) en in. Eimau aituam gupna lungmuan omlo cih thei in bang kidop tuak hiam?**
2. **"Satan' thu tam genlua ta hang. Amah vanglian mahmah taleh, A lianzaw gumpa hongpia Pasian tungah lungdam ing. I galpa thu gen in, thungen in, amah ngaihsun in i omom ciangin, ei sungah amah hong lian semsem hi. Bang hangin Zeisu' thu gengen lo, ama vangliatna leh itna ngaihsunlo i hi hiam? Satan in ama vangliatlam i theih ding ut mahmah hi. Zeisu lamto zaw un. Ama tungah ki aap un. Amah en in, amah suunzaw un. EGWhite, Advent Review and Sabbath Herald, March 19, 1889.**

Tapidawte in, Satan, bangci bangin lamto uh hiam? Thukhat ah, a vangliatna hi lo a, a hihtakpi na i niallohnna in bangzah in lauhuai hiam?

Lesson 9**February 23 - March 1****SATAN LEH A PAWLTE****Sabbath Nitaklam****Feb 23**

Tukaalsung sim ding: Mang 13; Mang 17: 8; Dan. 7: 24; 2 Thess 2: 2 -12; Mang 12:14 - 16; 1 Kumpi 18:38.

KAMNGAH: “**Numei tungah gulpi heh mahmah a, tua numei suan leh khak lakpan a beibaang te, Pasian thupiakna zui in, Zeisu tecipanna a neite sim dingin a kuankhia hi.**”
Mangmuhna 12:17.

Mang 12 in, Pasian mite Satan in a dona, Rome kumpi in kum 1260 AD 538 pan 1798 kum dong, a bawlsiatna te, (Mang 12:6,13,14 leh Lesson 7, Tuesday ni) sim in. Alian 13 na in zong, sapi limpua nih panpihna tawh Tapidaw te a bawlsiatna te hong lak hi. Satan’makaih na tawh, gulpi leh hih sapi nihte kipawl in, gupkhiatna nasepte nakpi’n langdo in, leitung huzaap zawh ding hanciam hi.

Kihilkhhol zong kisam hi. A tangtungsa te khiatna khiatbajah zaw deuh hi. A tunglai dingte tungtang ah, Tuesday ni a sinna bangin, kidophuai mahmah hi. A hun hong tunciangin lamdang i sak vatlohma dingin, Pasian in hong hilhkhhol hi. I theihnop mahmah hang, a kim taktak in bel hong hilh tuan samlo hi.

I ciapteh dending khatah, hun nunung thupiang dingte hong ki hilhkhhol hang, a pian hun lian ding hong

ki hilhkhhol ngeilo hi. Tua a hih manin, genkhohlna te khengval in, bangmah gen hetkei ni. Mangmuhna lai in, tuni tuhun leh hong pai laiding hunte ah genkhohlna te i nuntakpih ding hong deihsak hi.

SUNDAY**Tuipi Sungpan Sapi**

Mangmuhna 13:1-4 leh Mang 17:8 simkhawm in. Hih sapi gamtatna bang teng hiam? Ama omlam bangin hong lak hiam?

.....

John in, a lauhuai sapi khat tuipi sungpan hong pusuak mu hi. Sapi in ukzawhna lim pua a, tui in mipi a hih manin, mitamna pan hong khangto kumpi cihna hi. Tua tuipi in mi tamna Europe gam limpua a, Roman Empire a tuukhit a hong khangto aana nei a hihi (Mang 17:15). Tuisungpan hong pusuak a, **lutang sagih** leh **kii sawm** nei (Mang 12:3,4) ci hi. Lutang te tungah **mindaisak** na om a, **kii** te tungah kumpi lukhu te khu hi ci hi. Lutang te pen Tapidaw te bawlsia ding a Satan khutzat a hi kumpi te (Mang 17:9-11) a hihi. Min daisak na cih ciangin, tua sapi zat min mah hi pah hi. Kii sawm te'n (Daniel 7:24) sung a, Roman Empire khit a piang gamsawm te cihnopna hi. Tua tuipi sapi in, Rome kumpi pan hong piang, pope vive kawk hi.

Tuipi sapi in, kamkei pumpi, vomkhe leh humpinelkai kam nei a hih manin, Daniel 7:2-7) sung a sapi 4 teng gawmkhawm : Babylon, Medo-persia, Greece leh Rome gamte gawmkhawm limla hi. Pa Pasian in, Khazih tungah

ukzawhna leh aana a piak mah bangin, taanglai gulpi Satan in ama' aana tua sapi a pia hi (Mang 2:27).

Mang 13:5-7 in, Tapidaw te tangthu sungah, bawlsiatna thuakhun "**Kha**" 42 hi a, numei siangtho a ki bawlsiat hun zong "hunkhat, hun nih leh hun lang" (Mang 12:13,14 leh Daniel 7:25) na ci hi. Kha 42 in, ni 30 kha 42 vei - ni 1260 pha a, hih te khempeuh a kibang vive a hihi. Tua hun pen, sapi' lu khat sidek a liamna a ngah ciangin, bei hi. Sapi' lu liamna a damkik ciangin, sapi nungta kik a, leitung huupzo kik in, mite'n, sapi leh a milim a bia uh hi.

MONDAY

Tuipi Sapi Gamtatna te

Mangmuhna 13:5 na in, bawlsiatna hunkhat thu gen hi. Kha 42 i cih penin, Ni 1260 (Mang 12:6,14) mah tawh kibang hi. Genkholhna ah nikhat in kumkhat hi (Gamlak 14:34; Eze. 4:6). Lesson 7 na, Tuesday ni sinna simkik in.

Mang 13:5- 8; Daniel 7:24, 25 leh 2 Thess. 2:2 - 12 cihte simkaak in. Tuipi sapi gamtatna te in, kii no leh thukham palsatpa gamtatna te tawh bangci ki zopna nei hiam?

Tuipi sapi in, kum 1260 sung tengin, Pasian min daisakna vive bawl hi. Thuciamthak sungah, min daisakna pen, Pasian tawh ki zakim a omna (John 10:33; Mate 26:63 - 65) leh ukzawhna aana sut (Maku 2:7) cihte hi. Tuipi

sapi in Pasian min direct in daisak a, Pasian ka hihi ci bekthamlo, a biabuk leh vantung a omte khempeuh (Mang 13:6) min daisakna bawl hi. Pasian pen van biabuk a maang hi a, Khazih in zong eite a dingin mawh thumsakna na hong sepsak hi. Tua pen tuipi sapi in sutnuam a, gupna leh mawh maisakna bawl hi. Pasian bekin a hihtheih khat, hihsawmna in, a min daisak hi pah hi.

Mang 13 in, Tapidaw pawlpi lampialna a gengen pen, Roman Catholic pawlpi ii, makaipi in, Pope a koihna mahmah hipah hi. Rome aana a nialmi peuhmah bawlsiatna leh sihna hilianlian hi. Tuhun teh tuate pen ngongtatna bangin kimuta hi mah taleh, tua tangthu luite kuamahin seelhei tuanlo uh hi.

Pawlpi tangthu tungah thumaan mahmah kawmin, mi tung i pulaak na ah, a zaknophuai awneem i zang thei diam?

TUESDAY

Leisungpan Sapi Hong Khangkhia

Feb 26

Mangmuhna 13 a patna pan a langciang in, kum 1260 sung a, RC pawlpi in kum 1260 sung a vangliatna te gen hi. Pianthit ki puahphatna hunpan kipan, Tapidaw pawlpi in, si dektak liangin liam hi. Tua liamna damkik in, a ngeina teng nungta kiksak dinghi. A tawpna lam, a lang in, tua sapi bangci liam cih hong lak sitset hi.

Mangmuhna 13:11 simin. Sapi nihna gamtatna bangteng hiam? Mang 12:14-16, a bang in, hih sapi in leisungpan a bangci daan a hong khangto thei hiam?

John in, sapi dangkhat mu leuleu hi. Amasa tawh kibang lo in, leisungpan hong pusuak hi. Hih sapi nihna in, sapi masa mah bangin, leitung vanliatna nei hi. Tuipi sapi in a kihtakhua, lipkhaphuai meelpua napi'n; hih leisung sapi in, ithuai, lauhuailo hi. "Kii nih nei in, tuuno tawh kibang hi" (Mang 13:11). Tuuno in Khazih limpua hi a, hih hun nunung leisung sapi in Khazih tawh kibang ding hi.

Hih sapi in, gulpi bawlsiatna tui luang panin, Pasian' pawlpi maan a kemcing hi (Mang 12:14-16). Tuipi sapi in, si dektakliang a, liamma a ngahkhit ciangin, hih leisung sapi hong khangkhia pen in, hun nunung a nasem ding a hihi. "1798 kum a bang kumpi hong khang a, vanliatna thahatna tawh leitung a huupzo kua kumpi hiam? Gamkhat bek om a, tua in United States of America gam a hihi." E G White, Kidona Lianpi, laimai 440.

Mang 13:11 in, America pen protestant hi napi, gulpi bangin pau a, Rome te mahbang in leitung mite huup ding hi. Ama vangliatna tawh leitung mite in sapi masa a biasak hi ci hi. USA in, a cillam in, bawlsiatna sungpan pawlpi hum hi napi, hun nunung ciangin, pawlpi bawlsia ding hi.

WEDNESDAY

Sapi i Milim

Mangmuhna 13 : 12, 13 simin. Kumpi masa 18 : 38 leh Sawltak 2 : 3 te in, vantungpan, mei nangawn a kia sak thei, tuuno a bang leisung sapi khemna thu te i teltheih na'ng bangci hong huhthei diam?

Feb 27

Tuuno bang sapi in, na lamdang mahmah te bawlin, laisiangtho tawh kituak kim lodiak in, mite huup mahmah ding hi. "Sikha nasepna tawh, na lamdang pipi bawl, cina te damsak, nial theihloh na lamdang tampi te bawl ding hi" EGWhite, Kidona Lianpi 588. Tua na lamdang te hangin, tuuno sapi in, liamma a nei a masa sapi, biak theihna dingin, leitung mite huupzo ding hi. Tuipi sapi liamma damkik cih zong Pope in biakna lam leh leitung lamah vangliatna ngahkik cihna hi. Tuuno sapi in zong gulpi leh tuipi sapi mah bangin hong pau ding hi. Tua a dik, a cinghkam, a thunem tuuno sapi in, gulpi pau bangin hong pau ding hi.

Leitung mite in, sapi masa milim a bawltheih na'ng un panpih ding hi. Hitengah leitung vang liatna ukzawkna aana nei ding cih pulaak hi. Tua bang a leitung a ukzo kumpi in, USA mah hi bek hi.

'Sapi' milim e leh, bang hi ding, bangci bawlsak ding hiam?' Tua milim pen leisung tuuno sapi in bawlsak ding a, sapi masa' lim hi ding hi. Pawlpi masa in, thuman thutak nusia in, lawki ngeina te a zuih uh ciangin, Pasian Khasiangtho makaihna mansuah uh a, mipi a kepzawh na'ngun, kumpi lamte huhna ngenzel uh hi. Tua ciangin, kumpi aana zong a nei pope hongpiang in, biakna ngeina palsat te daanthuak zel uh hi.

USA ah, biakna golte kipawlna hong om ciangin, amau thukim khopna bang a thukhen dingin, kumpi lamte hong zo ding uh hi. Tua bangin Tapidawte a dimna America in Rome pawlpi tawh a kibang, a milim bawlsak ding hi. "Sapi' milim" cih ciangin, langpang Christian Tapidawte in, amau thu a kimanh theihna dingin, kumpi ukna aana hong zang ding uh hi" cihna hi. EGWhite, Kidona Lianpi, laimai 442 - 445.

THURSDAY
Sapi Ciamtehna

Mangmuhna 13 in, hun nunung makai hi ding hi cih hong lakzo hi. Leitung kumpite in upna lamah mi khempeuh ki pumkhat dingin hong gawmkhawm ding uh hi.

Mangmuhna 13:16,17 leh Thuhilhkikna 6:4-8 sungteng simin. Taltang tung leh taklam khut tung a ciamtehna neihna leh, Pasian thukham kizopna bang hiam?

.....

Leitungmi namkim te in, a taltang tungah leh taklam khut tungah, tua sapi ciamtehna ngahsak ding uh hi. Taltang tungah **Seal** pen, Pasian in Ama' mite (Mang 7:3,4; 14:1) a cihna hi a, **Sapi Ciamtehna** zong Sapi a biate cihna hipah hi. Tua sapi ciamtehna pen, mit a muh theih zong hilo a, Moses in, Israel te kiangah, Pasian thupiakte na khut tung leh na taltungyuah omsak un (Thuhilhkik 6:8) a cihtawh kibangin, sapi thu a zuite a cihna hi. Taklam khutin sepana **zongsatna ngeina** hi a, taltang in upna **lungkimna** a hihi. Pawlkhat te'n, sihding lauman peuh a sapi thu mangin, pawlkhat te'n, lungsim takpi tawh umin zui ding uh hi.

Hun nunung ciangin, Pasian' thu mangin, thukhamzuihna tawh biakpiakna in, upna thu laigil hong hi ding (Mang 14 : 12) hi. **Sabbath** thukham in zong, a tuam vilvel in, Pasian tungah thumaan cihtakna hong hi ding hi. Sabbath in Pasian' mite kitheihna a hih mah bang in, sapi ciamtehna zong sapi tungah thumanna ki theihna mah hi pah ding hi.

Sapi ciamtehna in, Pasian thukham dinmun ah, mi bawltawm thukham tawh laih cihna hi. A kician mahmah khat ah, piangsakpa Pasian hong piak, ni sagih **Sabbath** ni dinmun ah, mi bawltawm **Sunday** kitang (Daniel 7:25) hi. Pasian ukna aana ciamtehna ni khawng, a ni dangkhat tawh kheksak cihbang pen, Pasian ukzawhna aana a sut hi lel hi. Sapi ciamtehna in, **Papal Sabbath** hi a, **Pasian'** **Sabbath** langdo a hih manin; vantungmi thumna tangkona ah, Sapi leh a milim biakloh ding hong hilhkhel zo hi, E G White, Evangelism lai. 234,235.

Mangmuhna 13:8 ah, "pilna a neite'n sapi nambat sim un, mikhat nambat hi a, 666 hi." Paul in zong, "mawhna bawlpa" (2 Thess 2:3) na ci hi.

FRIDAY
Ngaihsut Beh Ding

Mangmuhna in, hun nunung a ding in, Pasian tungah thumaanna sit telna pen, Sabbath hi cih hong lak hi. Tu ta dih a Sunday tanna in, Sapi ciamtehna hi nailo hi cih zong ciamteh ding hi hang. Biakpiakni teltheih mahmah khit, nidik nimaan teel taktak ding ciangin, Pasian lam panglo zaw in, a langkhat ah pangzaw a Sunday a teeltaktak te a dingin, "**Sapi Ciamtehna**" suak ding hi. Tua hunin mailam ah omlai hi.

"Kuamah'n Sapi Ciamtehna ngah nailo uh hi. Tua kisinkhiat hun hong tung nailo hi. Pawlpi khempeuh lakah, Roman Catholic pah hi tuanlo in, Tapidaw diktakte omlai hi. Thukham 4 na a teltheih taktak masiah, kuamah kimawhsak nailo hi. A hih hangin, Sabbath langdona taktak hong om a, vantungmi thumna tangkona aw hong gintak ciangin, **thumaan** leh **thukhial** kikaal ah, deidanna lam hong kigit ding hi, E G White, Evangelism 234,235.

Theih dingin, tu tadih in, Sunday tanh manin, gupngahlo cih khawng, Sabbath tanh man a gupngah cih khawng omnailo photphot hi. "Sapi Ciamtehna" hong tungin, biakna piakding ni teel taktak hun ding hong tun ciangin, thumaante leh thumaanlo te cih kikhen na hong omra ding hi. Mangmuhna in, Pasian' mi peuhmah laisiangtho zui in, genkholhna te a thei nailo te kiangah va puaksawn ding hong cial hi.

KIKUP DING DOTNA TE

1. Tu laitak leitung paizia etkawm in, biakna lamte leh kumpi lamte in Mangmuhna 13 hong tangtun theih na dingin bang ci septuak nasa hiam?
2. Hunbei ding i ngakkawm in, Tapidaw a hi pawlpi dangte tungah bang muhdaan i nei hiam? A nuai a te lungngai kawm in. "*Makaipi te in, pawldang makaipi te naih ding a, amau a ding zong Zeisu in Palai sepsak a hihna theisak in, deihsakna lianpi tawh zol ding hi.*" E G White, 6T, laimai 78.

Lesson 10

March 2 - 8

PASIAN' TAWNTUNG LUNG DAMNA THU

Sabbath Nitaklam

March 2

Tukaalsung sim ding: Mang 14:6-12; Mate 24:14; Thuhilhsia 12:13,14; Paikhia 20:2-11; Isa. 21:9; 34:8- 10.

KAMNGAH: "**Pasian thuhpiakna zui in, Zeisu tungah a citak mite adingin, thuakzawkna kisam hi.**" Mangmuhna 14 : 12.

Mangmuhna in, Satan nasepna te gualzo lua kisa in, leitung mite'n, Sapi leh a milim biakding teel ding uh ci hi. A hih hang, mipi nung a mawkzuih lo, a thumaan a beibaang pawlpimi Pasian in nei veve hi. A tawpna ah biakna piak leh piakloh hi lozaw in, **kua** bia ding cih khentatna om ding hi. Sapi a bia te in, Ciaptehna, taltang tung leh taklam khut ah ngah cih ciangin, **lungsim leh sepna** tawh a sang te cihna hi.

Tua hunlian mah in, pentecost nipan kipan a omngei nailo, lungdamna thu tangkona leitung in nasiatak in bawl ding hi. A langdo mite tungah thukhenna, a kipiak ma in, Pasian in, "mi namkim, pau namkim tungah" (Mang 14:6) hilhkholna thu hong pia ding hi. Khazih in mi khempeuh a ding a sihna hong thuaksak a hih mah bangin, kuamah kisia lo a, gupna ngahkim ding Pasian in hong deihsak hi.

SUNDAY
Vantungmi Thumte Thupuakte

Hun bei madeuh in, Pasian in hilhkhonla te hong puak masa hi. Van a leng vantung mi thum te in tangko sak hi. Greece pau in vantungmi pen angelos hi a, “**thupuakte**” cihna hi. A taktak in, Pasian thumaan a tangko misiangtho te a cihnopna hi.

Mangmuhna 14:6 leh Mate 24:14 simkhawm in. Vantungmi khatnathupuak pen, “tawntung lungdamna thu” (Mang 14:6) a hihi. “Tawntung lungdamna thu” tangkona in, vantungmi khatna thupuak sung a omteng leh a deihna bulpi hong lak hi. I upna thu te’ laigilpi a hihna gen in.

Hun nunung a tangko ding thu masa in, Pasian’ thukhenna hun hongtung ding hi cih thu a hihi. Lungdamna thu cihciang, Pasian’ thu hi a, “tawntung” cih ciangin, Pasian kikheel ngeilo cihna hi. Ei pian mapek in, Amah’n, na khempeuh geel khinzo hi (2 Tim. 1: 9; Titus 1: 2). Vantungmi khatna thupuak in, gupna leh thukhenna hi. Piangsakpa Pasian a bia mite a dingin, thupha leh : a piansakna nial a, hongpiaksa ni sagih Sabbath a nial mite a dingin, thukhenna a hi ding hi.

Vantungmi thum te’n, awging ngaihmahmah tawh tangko (Mang 14:7,9) hi. Tua thupuakte in, **phamawh** leh **thupi** a: mailam thu ding a hih manin, mikim zak kul a hih manin, mi namkim, pau namkim, gam khempeuh tungah genkul hi. Banghang hiam, cihleh, Sapi in zong mi

March 3

namkim, pau namkim leh gam khempeuh tungah ukzawhna aana hong la ding (Mang 13:7) hi. Satan’khemna nasepte mun-khempeuh ah ki mu kawikawi ding hi.

Satan leh a pawlte gulpi, sapi, kamsang zuau te, USA a om langpang mite khempeuh langkhat ah : Vantungmi thumte thupuakte, Pasian’ misiangtho te in tangko ding (Mang 13) uh hi. Satan in zong, ama’ vangliatna te pen, gimna gukna pan kipan hong zang (Mang 16:13,14) ding hi. Tua hun in, leitung ah, a ki lehbulh thupuak nih in, mite huup dingin kido ding hi.

SDA khat i hi a, vantungmi thumte thupuakte, leitungbup pha a tangko ding sawlna a om hi. Bangci in na sem a, bang sepbeh lai thei ding na hiam?

MONDAY
Vantungmi Khatna Thupuak : Khen Masa

Mangmuhna 14:7 leh Thuhilhsia 12:13,14 simkhawm in. “Pasian kihta” cihteh, bang a cihnopna hiam? Pasian kitakna leh lungdamna thu a kizopna bang hiam? Lungdamna thu in, Pasian thukham zui a cih, bang a cihnopna hiam? (Rome 7:7-13) enkaak in. Pasian kihtakna leh pahtawina bangci kizop hiam?

Mangmuhna 14:7 sung a, “Pasian kihta unla, Amah pahtawi un” cihpen “tawntung lungdamna thu” a hihi. Khazih in ei gupkhiatna ding a hong sepsak teng, theihtelna in, tua te bangmah haksa saklo hi. Laisiangtho sungah, kihtaakna leh pahtawina in ki naizop mahmah (Late 22:23; Mang 15:4) hi. Pasian tawh kizopna diktak (Job 1:8) leh thumannae nei te hi.

Pasian kihta cih ciangin, "Lau" hi lozaw a, Amah'n eite nuntakna sungah hong omsak ding hi zaw hi. Hun nunung aa Pasian mite in, Pasian kihta ding uh hi. Pasian in, Amah it ding deih (Thuhilhkik 11:13; Mate 22:37) a, A thu man ding (Thuhilkik 5:29; Thuhilhsia 12:13), Ama lim leh meel puak ding (Piancil 22:12) deih hi.

Ama' thukhenna hun hong nai a hih manin, Amah kihta in pahtawi (Mang 14:7) kul hi. Tua thukhenna cih pen, Zeisu hong paima a, dawpkholh thuhkhenna a hihi. A deihna bulpi in, lungsim takpi mahtawh, Pasian it i hih leh hihloh (2 Cor. 5:10) khentelna a hihi. Tua thukhen na a kizawh ciangin, mi khempeuh thu kikhen khinzo a (Mang 22:11), a gamtatna bangtek thaman pia dingin (Mang 22:12) Zeisu hong pai ta ding hi.

Mangmuhna 14 zong a phel lang, lungdamna thu mah hi. Pasian tawh kizopna hoih a nei ta dingin; thuhpha, gupna, suahtakna leh tawntung nuntakna hi ding hi. Pasian thu manglo ta ding in; a kisik kik kei nak vua leh, thukhen hun hi ding hi. Kisia lo a, ki sikkik ding Topa in deih hi (2 Peter 3:9).

Thukhenna mai ah, Nangbek ding zo ding maw? Na nuntakna in bang a lak tam? Na dawnna pen, lungdamna thu na kisapna a hi diam? Banghangin, tu'a leh vantungmi khatna thupuak kinaizop mahmah hiam?

TUESDAY

March 5

Vantungmi Khatna Thupuak : Khen Nihna

Hun nunung hun ah, Pasian thu manna leh, a thukham zuihna tawh biakpiakna in, kidona lianpi thu laigil (Mang 14:12) hong hi ding hi. Leitung mite in khen

nih hong pha ding uh a : Pasian kihta in a bia te leh, Sapi kihta a bia te cih hi ding hi.

Thukham masa lam 4 teng enkik in (Paikhiatna 20:2-11). Mangmuhna 13 zong simsuk in. Sapi in biakding bangci sawl hiam? (Mang 13 : 15), sapi milim khat a bawl pen (Mang 13:14,15), min daisakna tawh zom (Mang 13:5,6), Sapi ciamtehna zong ngah (Mang 13:16,17) in, Satan in thukham masalam 4 teng a dona a hihi.

.....

Thukham masa 4 teng i deihna bulpi in "biakpiakna" a hihi. Hun nunungah Pasian mite dinmun hi ding hi. Khazih leh Satan kidona bulpi zong, biakpiakna leh thukham masa 4 teng mah a hihi. "Vantung, leitung, tuipi leh ciktui te a piangsakpa bia un" (Mang 14:7) ci ngiat hi. Tua in (Paikhiatna 20:11) thukham 4 na a piaklai kammalte ngiat a hihi. "Sabbath ni a tawlnga a, biakpiakna pen, Pasian tawh a tuam vilvel a kizopna lim (Eze. 31:13; 20:12) a hihi. Vantungmi khatna in, Pasian bia dingin hong sam hi.

"Kumpite thu manna tawh Sabbath maanol tanhna in, thukham nambat 4 na langdo a, Pasian a langdopa lam a panna hi a : Sabbath maan tanhna pen, Piangsakpa Pasian tungah thumaan cihtakna a hihi. Pawlkhat te in, leitung aana nei te thu mangin, Sapi Ciamtehna sang uh a ; pawlkhat te leuleu in, Pasian tungah thumaan cihtakna tawh biakna pia uh a hih man un, Pasian Seal a ngah uh hi" E G White, Kidona Lianpi, laimai 605.

Piansakna leh gupkhiatna bangci kizop in na mu hiam? Pasian in Sabbath ni a tawlingak mah bangin, tawlingak ding banghangin thupi hiam?

WEDNESDAY**Vantungmi Nihna Thupuak**

Vantungmi nihna in, Babylon, pukna leh zual-zanna tawh, pawlpi maanlo lim hong laks hi. Mang 17:5 sungah “Babylon pen ‘numei gilo te nu’ na ci hi. Tana te cihteh, ama nung leh a ngeina te a zui pawlpi khempeuh, Pasian’ deihsna tawh kituak lopi, leitung mite tawh kipawlkhopna a nei hi, E G White, Kidona Lianpi, laimai 382,383.

Mangmuhna 14:8; 18 : 2 leh Isa. 21:9 simkhawm in. “A puukzo hi” cih kammal in, Babylon i langpanna leh gamtat hoihlohma te kawk hi. Babylon pen a ki cimh zo: leh mailam ah zong a kicimh lai dingin a genpen banghang hiam?

Hun nunung Babylon pen, RC pawlpi te ngeina te pan kipan, lampial protestant te upna maanlo tampi ki gawmna a hihi. Tua bangin, amaute Satan’ na sem in, Pasian’ mite a langdo uh hi (Mang 13:11-18; 16:13; 17: 5). Tua lampial biakna in, taanglai Babylon kampau daan teng hongpau ding a, Pasian bangin ki liansak in, leitung hong uk nuam ding hi.

Vantungmi nihna thupuak in, hih upna sungah, Pasian mite thumaan nial a, Pasian tawh a ki gamlat semsem lohna ding hong hilhkhon hi. “Pawlpi leh leitung hong kipawl theih taktak ciangin, Babylon puukna picing taktak ta ding hi” E G White, Kidona Lianpi, laimai 390.

Mangmuhna 14:8; 17:2 leh 18:3 cihte sim lecin, Babylon in, ama lenggahzu, leitungin a dawn theih na dingin, bangci hih hiam? Tua lenggahzu in bang limpua hiam?

Mangmuhna 17 na in, ama zualzangna lenggahzu, mipy te’n dawnsakin khamsak hi (Mang 17:2). Babylon’ lenggahzu cih ciang, upna maanlo, thuuhilhna maanlo,

March 6

biakna maanlo cihna hi. Protestant pawlpi tampi takte in, Roman Catholic pawlpi tawh kikhenna a piangsak ngeina kibanglo te khempeuh beisak in, laisiangtho nusia in, Babylon lenggahzu a hi, mi bawltaum upna te cihna hi. Tua Babylon lenggahzu in, leitung mite khimcip in, sapi ciamtehna ngahsak a, tuuno sapi aana sungah lutsak hi.

THURSDAY**Vantungmi Thumna’ Thupuak**

Mangmuhna 14:12 in, Pasian mi, a thumaante bangci lak hiam?

Pasian misiangtho te langkhat ah, Mang 14:9,10 a om, Pasian hehna a thuak dingte hong hilhkhon zo hi. Laisiangtholui hunlai in, Pasian hehna pen, hai sungpan lenggahzu dawn tawh (Jere. 25:15,16) genteh hi. Sapi a bia te a ding Pasian hehna pen, “bangmah a kihel lo” Pasian hehna lenggahzu (Mang 14:10) na ci hi. Tanglai mite’n, lenggahzu a peng zawdeuh dingin tui helzel uh hi. Bangmah a kihel lo Pasian hehna lenggahzu cih teh, Pasian hehna a dim sitset cihna hilel hi.

Mangmuhna 14 : 10,11; 20 : 10 - 15 simkhawm in. Isa. 34 : 8 -10 leh Jude 7 na te ah “Amaute kaatna meikhu in, a tawntungin kahto hi” a cih tawh bangci ki zawitawn hiam?

Amaute kaatna mei leh kaan cih pen, tawntung kisiatna cihnopna hi. Mei leh kaat pen thukhenna (Pian 19:24; Isa. 34:8-10) limpua hi. Meikhu kahto cih zong,

laisiangtho ah om mun hi. Isa. in zong Edom kisiatna ding pen, mei leh kaat na ci hi : meikuang khuk suak ding a, “sun leh zan kuamah’n sumit zolo ding a, meikhu kahto tawntung ding hi”(Isa. 34:10) na ci hi. Jude leuleu in, Sodom leh Gomorrah pen “tawntung meikuang” (Jude 7) na ci liang hi. Tua khua te gel a om nawnloh nungsang, hih munte in a kuang paisuak mei a gen hilo zaw in, a piangkik nawnlo ding beimangna a hihna leh, a kuangthei lai ding bangmah om nawnlo dong, vut leh vai a suak dong kangtum a cihna hi zaw hi.

Hell meikuang sungah, migilo te khawl theilo a kuang den ding a hihlohma hangin lungdamhuai phial mah leh, tua daan thuak dingpen kihtaak huai tham hi. Eite’n i sepkhiat ding, mite tung hilhsawn ding nasep siangtho tawh kisai bang hong hilh hiam?

FRIDAY

Ngaihsut Beh Ding

Kidona lianpi, laimai 603 - 612 sung a om “Hun nunung Hilkholna” cih, E G White kammal te simin.

Mangmuhna in, hun nunung ciang, Pasian mite peuhmah in, hun nunung lungdamna thu tangko ding in hong hanthawn hi. Nasepna bel patauh huai mahmah in, piantheih tuak khollo hi mah leh, Pasian in, A vanglitna hong kamciamzo hi.

“Lungdamna thuhilhna sepna lian pen a kipat tung a thu konghong ding a kilang, Pasian vangliatna sang a nasia zaw thupha hong kibua photlo in, nasepna kitawp lo ding hi.

Pasian Khasiangtho tawh telsakna neita a hih manin, gatang kaih bangin, thusuutna tawh tua thupuak

March 8

ki tangko nawnlo ding hi. Kinial theihna leh thu guisuit na ding teng hong ki laktel khinzo hi. Khaici kituh khinzo a, hongpo hong khangto in, a gah hong gah ta ding hi” E G White, Kidona Lianpi, laimai 611,612.

Pasian thupuak nunung pen in leitung mite khennih in hong khen ding hi : Pasian it a, a thu a mang te leh, Sapi nungzuih ding teel a, a thu a mangte ci in namnih pha ding hi. Hih kikhenna mah pen : Anlakna namnih tawh ki genteh lai hi. Ansaal sungah a ki seng **Buh** (Mang 14:14-16) leh, Lenggah gawina sungah a kituancil ding **lenggah** te (Mang 14:17-20) ci in kikhen hi. Hih a nunungpen kikhenna in Mangmuhna lai i thu bulpi (Mang 17 - 18) a hihi.

KIKUP DING DOTNA TE

1. SDA te lobuang, kuate in vantungmi thumte tangkona te hilh hiam? Hih i nasepna te a thupitna leh a phatmawhna bang teng hiam?
2. Tapidaw tampi takte in, thukhenna khawng phawk selo hi ci’n banghangin na um hiam? Dawpkholh thukhenna leh Tapidaw te bang kizopna om hiam? Na sanggam Tapidaw khat kiangah, dawpkholh thukhenna a deihna na hilh thei diam?

Lesson 11**March 9 - 15****A SAGIHNA GIMNA NUNUNG****Sabbath Nitaklam****March 9**

Tukaalsung sim ding: Mang 15:1; 7:1-3; 14; 9,10; 16 :1-12; 17:1; Daniel 5; Mang 16:16; 2 Thess 2:9-12.

KAMNGAH: “**Topa aw, Nang kua in hong kihta lo ding a, Na liatna hong phatlo ding a hi hiam? Nangbek na siangtho hi. Thumaan in na sepna te mi khempeuh in mu uh a hih manin, minam khempeuh nang kiangah hong pai in, Na mai ah hong bia ding uh hi.**” Mangmuhna 15 : 4.

Mangmuhna 11:18 na in, Armageddon galpi madeuh a thupiangding teng tomkaih in hong lak hi. “Minam te heh mahmah uh hi” cih kammal pen, Zeisu in (Luka 21:25) sung a, hun nunung a ding a genkholna hi a, Pasian’ hehna leh thukhenna a hi, gimna sagihte in a kisiklo mite a dingin hong zomto pah ding (Mang 15:1).

Mangmuhna 15 na pen, vantungmi sagih leh, a tawi uh Pasian hehna hai sagihte tawh kipanpah hi. Tua hai te a buaksuk madiak in, Pasian’ misiangtho te (Mang 15:1-4) mu masa hi. Tua misiangtho te in, sapi, a milim, a ciamehna leh ama’ nambat tungah, a galzo mite (Mang 15:2) a hi uh hi. Amaute in, limlang tuipi gei ah dingin, Moses leh Tuuno gualzawhna la thak a sa uh hi. (Hebrews te in, Santuipi gei a ding a, gualzawhna la a sak (Pai. 15) bang).

Hih a gualzo misiangtho te pen, 144,000 te (Mang 14:1-5) a hi uh hi. Sapi ciamehna nial uh a, gimna te lakpan amauta, Pasian in kembit hi. Zeisu hong kumsukni ciangin, amau sihtheihna pumpi in, sih theihlohna silh in (1Cor. 15:51-54), misisa a thokikte tawh a kibang in, vangliatna minthanna tawh hong kumsuk Zeisu, meeisung ah (1 Thess 4:17) a dawn dinguh hi.

SUNDAY**March 10****A Sagihna Gimna Nunung’ Khiatna**

Mite in, Pasian maw Babylon khat teitei, amau khatciat teelkhin ta uh hi. Khazih hong pai madiak in, vantungmite letcip, Satan’ hehna huihpi (Mang 7:1-3) kikhahta a, gimna sagih te’n zuipah hi.

Mangmuhna 15:1 leh Paikhiatna 7: 10 simkhawm in. Hong tungding gimna sagih te pen, taanglai Egypt te tungah a tung, gimna sawmte mahbangin, ki thuhilhna a hihlam na bangci gentheih diam?

Gimna sagihte in, leitung hun nunung penpen a hong tunguh a hihmanin, **hun nunung gimna sagihte** kici hi. Etkaak dingin, pengkul sagihte in, Christian te hun khempeuh huam gai hi. Lungdamthu a kihilh kawmkawm mah in tawntung (Mang 10:8-11:14), palai sepna zong kisem (Mang 8:2-5) toto hi. Hehpihna tawh kithuah a, Pasian’ galte kisikkik ding a deihna a hihi. Thukhat ah, gimna sagih te pen, Zeisu hong pai madiak a kibua a hihi. A kisik lo, Pasian langpanna tawh lungtang khauh, Pharoah kumpipa bangte tungah (Mang 16:11) a kibuak a hihi.

Pasian' hehna pen, a dik thukhenna hi a, mite'n, amau' lungsim khentatna om bangin (Rom. 1:26-28) a gah a aat uh hi.

Mang 15:5-8; Pai. 40:34,35; leh 1 Kumpi 8:10,11 simin. "Kuamah biakinnpi sung lut zolo" (Mang 15:8) a cih in, gimna sagihte hong tunhun ding, bangzah hong lamen sak tuam thei hiam?

"Kuamah biakinnpi sung lut zolo" (Mang 15:8) a cih in, hehpihna kong kikhak hong lak hi (Mang 22:11). Khazih in, a Palai nasep a zawh ciangin, kisik kikna kongpi, a tawntungin kikhak ta ding hi. Tua a hihmnain, gimna sagihte in, kisik kikhun kuamah pia nawnlo ding a, Babylon lam panglua kisa, Pasian bang mudah zaw sem lai ding uh hi.

Leitung a siat semsem, na mu hi. Pasian' hehpihna hangin, gimna te ki ziakai sak cih, bangci lak theih ding na hiam?

MONDAY

Gimna Nunungete Hong Kibuakna

Khazih in, a **Palai** nasep khawlta a hih manin, mi khempeuh' mailamthu khentatsa vive hi ta hi. Pasian' lungdamna thu a nial mite a dingin, Pasian' hehna a dimlet in hong tungta ding hi. Tua gimna sagihte pen, Egypt a tungte mah (Pai. 7-11) a hihi. Egypt tungah a tun hangin, Israel mite kihawi sese a hih mah bangin, tua hong tungding gimna pan in, misiangtho te, Pasian in kemtuam (Late 91:3-10; Kidona Lianpi 629, 630) ding hi. Egypt gimna te in Pharoah lungtang khauhna leh amau' pasian te in

bangmah hih zolo cih pulaak sak hi. Tua mahbangin, gimna sagih te in, sapi a bia te lungsim khausak semsem ding a, Babylon in a mau gumzolo cih musak ding hi.

Mangmuhna 16:1 - 11 sung simin. Bang thu piang a, bangci hong kilak hiam?

Gimnate, a masalam 4 teng pen, leitungbup hilo a, mi khempeuh in thuaklo hi, Kidona lianpi 628. A khatna gimnapen, sapi a bia te tungah meima tum piang hi. A nihna leh a thumna in, luitui, guntui leh tuipi tui te sisan suak hi. Dawnding tui a omloh teh, mite'n thuak zolo uh hi. A lina in Ni sukha a, ni sa mahmah in, mite kaanggawp in thuak-hak mahmah hi.

Tuabang a haksatna a thuakuh hangin, a lungsim uh nemsak tuanlo in, hihbang a gimna hong tunsak mahmah ci in, Pasian samsia lai uh a, kisik tuan mahmah lo uh hi. Mang 16:10, 11 leh Paikhiatna 10:21 - 23 sungah, gimna ngana in, Sapi' tokhom sukha (Mang 13:2) lian hi. Satan' vangliatna in zong, Pasian piak gimna te dozo tuanlo hi. A thuak kawmkawm un mite'n, Babylon in hong gum zolo cih muta mah leh, Pasian langdo na lungsimte kheel tuanlo uh hi.

I Topa tawh kinai takin tonkhawm in, haksatna te thuak kawmkaal ah, I Topa hong itna muang in i om thei diam?

TUESDAY

Euphrates Gunpi Kangsak

March 12

Mangmuhna 16:12; 17:1,15 sung simin. Euphrates gunpi in bang a cihnopna hiam? Gimna sagih te a tun

laitak in, Euphrates gun kangsak cihpen, bang cihnopna hiam?

.....

Laisiangtho lui hunlai in, Euphrates gunpi pen, Israel te galte a hi Assyria leh Babylon te a dingin, a kizang mahmah gunpi a hihi. Babylon khuapi kantan in luang a, annek tuidawn khempeuh a sik gunpi a hihi. Euphrates gunpi lotawh, Babylon nungta zolo hi. Mang 17:1 in, Babylon pen tui tampi tungah tuu ci a, Euphrates mah a cihna (Jer. 51:13) hi. Mang 17:15 in zong, “hun nunung ah Babylon tutna tui tampi cihpen, amah a um, leitungmi a lian, a neu, kumpite khempeuh a hihi” ci hi. Tuate in zong, amau’ huhna pia nawnlo ding ci lailai hi.

Gimna gukna in, tanglai Babylon pen, Persian kumpipa Cyrus in amatna (Dan. 5) kawk hi. Tangthu siampa Herodotus in, kumpipa Belshazzar leh a milian te’n, pawi a bawl zan in, Persia te in, Euphrates gun heikhia in, tui a kangkhin gundung panin, khuapi sung lut in, upmawh hetlohpri in khuapi susia hi.

A limlabek a hi, Mang 16:12 sung a, Euphrates kansakna zong hun nunung ciang hong piang ding hi. Mangmuhna Euphrates in, leitungmi a lian, a neu leh kumpite leh amah a thapia khempeuh hi a : Euphrates kangsak cih ciangin, amau panpihna khemepuh khawl in, anungciang Babylon lehdo kik phialzaw a, Babylon kicimh ding hi. Babylon pen belhtak hi ci in leitung mite in beel ding (Mang 16:3- 9) hi. Tua laitak gimna ngana hong kibuak ciangin, Babylon ukna aana tungah hong kibua suppah a (Mang 16:10,11), Babylon in nang zolo cih a hong thei ta uh

hi. Tua ciangin, mipi te in, khemna thuak a hih lamtak uh theitel ta in, Babylon hong lehdo zaw a, Babylon puklawh hi (Mang 17:16). A hihhang, theihsa mahbangin, amaute’n a lungtang uh khauhsak teitei uh a, lei maitang pan a ki hepkiatgaih mateng, Satan in amaute makaih in mainawtpih zel hi.

Mihingte leh miwing kipawlina te muan ding bangzah lauhuai hiam?

WEDNESDAY

Satan’ Khemna Lianpi Nunungpen

March 13

Mangmuhna 16:12 in, Euphrates gunpi a ki kansakna deihna pen, “nisuahna lam kumpi te” a ding lampi honsak ci hi. Laisiangtholui sungah, “nisuahna lam kumpi” a cih ciangin, Cyrus leh a pawlte, saklampan hong tuaksuk napi, khuapi sungah, nisuahna lam pan (Isa. 41:25) hong lut-uh hi. Amau galzawhna in, Pasian’ mite a gam zuanin ciahkik sak thei (Isa. 44: 27,28) hi.

Mang 16:12 sung a, nisuahna lam kumpite cih pen, Khazih leh vantungmite, nihvei kumkikna ah misiangthote puan (Mang 15:6) a hi “puanpaakte silh” (Mang 19:14) in hong tuaksuk ding a, Khazih in, a misiangthote a bawlsia Satan pawlte (Mang 17:14) thuhkikna pia ding hi (Mate 24:30, 31 sim kaak in). Zeisu hong kumsuk madiak a, tua gal kidona nunungpen, Armageddon kici hi.

Mang 16:13,14 simin. Armageddon a ding a khanin thum hong paikhia cihpen, bang a cihnopna hiam? Mang 14 sung a, vantungmit thumte tangkona te bangci in langdo hiam? (1Tim. 4:1 simbeh in).

.....

Hun nunung ciangin, hehpihna kong kikhak ding a hih manin, mikim in, Armageddon galsung ah, langnih omte khat, ama pannmun ding a teel kul hi. John in, Satan' khemna pen, a kihhuai **uiphuk** bang in, kha-nin thum paikhia kamu ci hi. Gulpi (pagan Rome leh sikha biakna), tuipi sapi (Roman Catholic), kamsang zuaute (lampie Tapidawte) khempeuh in, Satan' khutnuai ah hong kipawlkhawm (Mang 13:11,12) ding hi. Tuuno sapi bawltheih na lamdangte, sikha biakna te, Satanin, a pawlte bawlsak ding (Mang 13:13-17) hi. Na lamdang te bawlna pen, hun nunung a, Satan' mikhemna a khutzat thupi pen hi ding hi. Bangmah theilo pi in, leitung makaipi te in, Satan' khemna te umin, biakna lam tawh khimgawp ding hi (2 Thess 2:9-12). Amau kipawlna te tawh leitung bei dong kalsuan ding uh hi.

THURSDAY**Gal Nunungpen ading Kikaikhawm**

Mang 16:16 simin. Satan in, Armageddon gal a dingin, a nunung pen khemna tawh leitung mite a kaihkhop ciangin, bangzah lawhcing zo ding hiam?

Satan' khemna nunungpen in, leitung buppi mah khemzo ding hi. Laisiangtho thumaan te nusia zaw in, mihing te'n, khemna na lamdang kibawlte umzaw (2 Thess 2:9-12) ding uh hi. Hebrew pau in "Armageddon" ki ci, "Megiddo Mual" cihna munah ki kaikhawm ding uh hi. Megiddo cihmun in mual hilo zaw a, Carmel mualbul "Jezreel" zaangkuam a om galnan na "Kulhpi" hi zaw hi. "Esdraelon" zangkuam zong ki ci a, Israel tangthu sungah,

khemna tawh galdo na mun (Thukhen 5:19; 6:33; 2 Kumpi 9:27; 23:29,30) a hihi. Armageddon galpen, Khazih leh Satan kikal kidona lianpen hi a, leitung mite in, Satan lam pangin, Pasian do uh hi.

Megiddo mual cih zong, Carmel mual paina hi a, tanglai Meggido khuapi omngei na mun a hihi. Carmel mual bel, Israel tangthu sung a, Pasian' kamsangpa Elijah leh Baal kamsang zuau te kisualna mun (1 Kumpi 18) hi. "Pasian maantaktak kua hizaw hiam" cih ki sittelna a hihi. Vanpan in "mei" hong kia a hihmanin, Topa in Pasian taktak hi a, biak takcing taktakpa hi cih hong lak hi. Armageddon gal hong tun ciangin zong : Pasian lamah maw, Satan, gulpi, sapi leh kamsang zuaute lamah maw cih pen, gimna te hong kibuak ma in teelkholh kul (Mang 16:13) hi. Satan in, Judas a zat mah bangin, amau zong zang (Luka 22:3) ding hi. Mual aw suang aw kicimh in hong vuk un (Mang 6: 16; 2 Thess 1: 7,8) ci in kap ding uh hi.

Armageddon cih pen, nisuahna gam laizang lam a kido ding hilo hi. Taksa kidona hilo a, Khazih leh Satan, khalam a kidona (2 Kor. 10: 4) hi ding hi. Carmel mual mah bangin, Pasian in galzo ding a, munkhatbek hilo in, leitungbup khuamial tungah galzawhna hi ding hi.

Pawlkhawt te'n, nisuahna gam laizang lamah, Armageddon galpi hong om ding hi ci in um uh hi. A hun, a ni khawng hih mawkmawk uh hi. Hi bang khawkkhat sung thusia piang lel khawng pen, Pasian genkholna tangtunna a hihloh zia i bangci lak thei diam?

FRIDAY**Ngaihsut Beh Ding****March 15**

"Laisiangtho sungah bulkip tak a dinglo kuama peuhmah, tua hun nunung haksatna sungah thuakzolo ding

uh hi. Mi khatsim kisinkhiatna hong tung dinghi : Pasian maw, mi, kua muangzaw ding? Paul in, "Mite in thumaan a ngaih nophloh hun, amaute' deihna bek a zuih nophun, amaute' zaknop thubek a gen ding sia a cialnop hun hontung ding hi" (2 Tim. 4: 3). Mipi te'n, amau deihna a kawkkawk, laisiangtho deih nawnlo ta, Satan in, amau'deihte tawh khemta hi. Pasian in, laisiangtho tungbek a ding ngeungau mi pawlkhat nei veve hi. Mipilte' pilna te, biakna makaite' khentatna te, pawlpi sung mipite' deihna te, tuate peuhmah biakna upna dik hi ngeilo hi. Pawlpi upna bullet ding ciang, Topa'n ci hi' cih kammal i kisam hi.

Khemna lianpen dingin, Satan in, Khazih hong kineih ding hi. Sawtpi pekpan a gumpa hong paikik ding i lam etet, zuaukhempa in, Khazih hong paikhin in kineih ding hi. Leitung mun tuamtuanah, a taang mahmah, John in a muh (Mang 1:13 -15) Pasian Tapa bangin, hong kilak ding hi. Tua vaangtaan na bel, mihing' mittang muh ngei vaang sang in, taangzaw lolel ding hi. "Khazih hong pai khinta hi" ci in phatna aw gingin, mite'n zahtakna pia ding uh hi.

Awnem tak leh, itna kidimtak aw tawh, vantung thumaan te hong gen ding a, Sabbath pan Sunday in kilaih khinzo hi, tua ni pahtawi zaw un hong ci ding hi. Ni sagih ni bekmah pahtawi tentan a, vantung mite' tungpan khuavak tawh hong kipia ni a nialte in, ama' min a daisak hi ci ding hi. Tua in khemna lianpen hi ding hi" E G White, Kidona Lianpi, 593,595, 624.

KIKUP DING DOTNA TE

1. Mang 16: 15 sim lecin, Armageddon aa lut ding te, Zeisu hanthotna om hi. Laodicea pawlpi tungah a ngetna te lungngai in (Mang 3: 18). Laodicea pawlpi

tung a thupuak in, Armageddon gal a ding kigin-kholhna dingin bangzah thupi hiam? Nangma a ding bangzah na zangthei diam?

2. Puanpaak in Khazih hoihna hi a (Mang 3: 4,5; 19:7 -9). Tua Khazih' puanaap a silhte bekin, hun nunung haksatna te lakah dingkip zo bek ding hi. Zeisu' sisan sungah, i puante a paak theih na'ngin, bangci sawp ding hiam?

Lesson 12**March 16 - 22****BABYLON TUNG A THUKHENNA****Sabbath Nitaklam****March 16**

Tukaalsung sim ding: Mang 17; Jer. 51:13; Paik 28:36 - 38; Mang 13:1-10; 13:5 - 8.

KAMNGAH: “Keima mite aw, a mawh gamtatna ah kihelkha in, a gimthuakna thuakpih kha ding na hihmanun, hong paikhia un, Ama mawhna in vanbaan a, a gamtat hoihlohnna te Pasian in phawk gige hi.” Mangmuhna 18:4, 5.

Gukna gimna in, Euphrates gunpi kangsak hi a cihmah bangin, khemthuak mipi te in, Babylon panpih nawnlo ding uh hi. Satan in, Armageddon gal a, Pasian’ mite do dingin, migilo te a kaihkhop lawhcing mahmah hi. Kidona nunung lamah, sagihna gimna kipat na’ngin, nakpi takin zinliing a, tua zinliingin Babylon khen thum in khenkhamh (Mang 16:18) hi. Hun nunung Babylon pen, Pasian’ mite a langdo dingin, kumpi lam leh biakna lamte ki pawlra hi a, Babylon khuapi tawh genteh a, tua khuapi puk in bei ding hi.

Mang 16:19 na ah bel, Babylon kumpigam beina hi a, a lian 17, 18 sungah, a pukdan taktak teng hong gen hi. Babylon khuapi a pukna leh a hangthu (Mang 17:12 - 18:24) te a gen ma in, a lian 17 sungah, Babylon zual-zangna, langdona te pulaak masa hi. Tua sungah, sapi san a tuang, numei gilo khat, ama gitlohnna tawh leitung kumpi te a mawhpih nu (Mang 17:1- 11) tawh hong lak hi.

SUNDAY**Angzuaknu Babylon****March 17**

Mangmuhna 17: 1 leh Jeremiah 51: 13 simkhawm lecin, Babylon tutna “ tui tampi “ a cihin, Euphrates gunpi a hihi. 17: 15 na bangin hi leh, ‘ tui ‘ in bang cihnop na hiam?

.....

Numei in ‘Pasian’ mite cihna hi. Mangmuhna in, Pasian’ pawlpi manpen ‘numei siangtho’ tawh (Mang 12:1; 22:17) lak hi. Numei angzuaknu a hih leh, pawlpi maanlo hipah hi. Tua angzuaknu pen (Mang 17:5) in, Babylon cisuk pah hi. Tanglai Babylon khuapi in, Euphrates gunpi tawh nungta a hih mah bangin, tuhun Babylon in zong, amah a thapia mipi mah tawh nungta hi.

Mang 17:2; 14:8; leh 18:2 te simkhawm in. Bang mipi namnih in kizopna nei a, hun nunung Babylon in, amau bangci zol hiam?

.....

Mipi masa pen in, leitung ukna aana nei kumpi te a hihi. Amau te in, angzuaknu Babylon tawh, zualzang uh ci hi. Laisiangtho lui hunlai in, zualzanna pen, Israel te’n Pasian nusia in, biakna dangkhawng a zuih uh ciangin a kammal zat (Isa. 1:21; Jer. 3:1-10) a hihi. Kumpite leh angzuaknu a kizopna a cih ciangin, biakna leh kumpi kipawlhop na neihna a hihi.

A nihna, Babylon angzuaknu tawh kipawl mipawl a hihleh, leitung mite hi uh a, amau te pen, Babylon in ama’ zualzangna lenggahzu khamsak hi ci hi. Kumpi aana neite

tawh a kibanglo in, tua mipi te in, angzuaknu Babylon thuhilhna maanlo um in, tua Babylon in, hong gumzo ding hi ci in muanna a neihna pen, ama' zualzanna lenggahzu kham ci hi. Mi peuhmah zu a kham ciangin, thuman thukhial, hoihtakin khentat thei nawnlo (Isa. 28:7) hi. A beibaang mipawlte lobuang, leitungmi khempeuh in, tua Babylon nung zui uh hi.

Tulai hun mahmah in zong, mipi peuhmah, paikhial denden hi. Tua a hih manin, bangzah in minthang mah taleh, mipi nung zuihding a lahuai zia bangci theih ding i hi hiam?

MONDAY

Sapisan a Tuang Angzuaknu

Mangmuhna 17: 3 simin. Vuntungmi sagih lakah khat in, gimna nunung tawh a kidim hai sagih tawi a cih teh, tui tampi tung a tuu angzuaknu a cihna a hihi. John muhlai in, sapi san a tuang hi. Tui leh sapi in Babylon lam a pangte lim bangci puakthieh hiam?

John in, tua numei, sapisan tungtuang in mu hi. Angzuakna in biakna kipawlna hi a, sapi in ukzawhna aana limpua hi. Biakna kipawlna in, kumpi ukzawkna aana tungtuang cih ciangin, biakna leh kumpi aana kigawmkhawm cihna hi. Genkhohna in, hih nihgel hun nunung ah kigawm ding cih genkhol hi. Sapi tuang cih limlim ukzawhna hi a, hih sapi a tuang nu, hun nunung pawlpi in, kumpite leh mipite tungah ukzawhna nei ding cihna a hihi.

Mang 12 leh 13 sung a, angzuaknu gamtatna te in, gulpi, tuipi sapi leh leisung sapi, hiteng thum omdan bangci kawk nasa hiam?

Angzuaknu in, puansan puandup leh suang-manpha, kep cihte tawh uangtakin kizeem in om hi : tuabang kizeemna te pen, angzuakte in, mite a huupna (Jer. 4:30) a hihi. Puansan cih zong, biakna bawlsiatna ah a luang sisan te cihna hi lai hi. Angzuaknu puan meel, a san, a dup leh khamte in, (Paikhiatna 28:5,6) na sung a, Pasian' Siampite' puan meel te a sut a hihi. Angzuaknu' taltang ah min daisakna om a cih zong, Pasian Siampi te taltang tungah "Topa a ding Siangtho" (Paik. 28:36 - 38) cihpen a laihna a hihi. A khutsung a hai in, kumpi Belshazzar zudawn na hai, Pasian' biakbuk pan a kilakhia te hong phawksak hi (Dan 5:2 - 4). Tua hai in, thumaan kiseelcip in, zuau thu bektawh, leitung mite, Pasian kiangpan kaikhia ding cihna a hihi. Angzuaknu in, Pasian a ding thuman tec i a pang misiangtho te' sisan kham in om hi. Hih sisan luanna zong, pope makaihna tawh, thuman a zui mitampi takte in, thahna a thuakna te a cihna hi.

Angzuaknu Babylon tawh kisai in, Thyatira pawlpi ah Jezebel milimpi kisuang (Mang 2 : 20 -13) hi. Tua te geel in kizopna bang nei hiam?

TUESDAY

Sapisan thu Suutna

Mang 17:3 in, 13 sunga, Pasian mi siangthote do a, a zo (Mang 13:5 -7) tuipi sapi tawh a kibang sapisan thugen hi. Bawlsiatna kipatna lam hi a, numei zong ni 1260 sung AD 538 -1798 dong gamlakah bucip (Mang 12:13,14) hi.

Mang 17:8 simin la, 13:8 tawh khaikaak in. Sapi i omdan namthum bangteng hiam gen dih in.

Sapisan pen bel, omngei, om nawnlo, mong neilo dumsgungpan hong kahto kikin, kisiatna ah tunghi ci hi. Hih khenthum phakna zong, Pasian min langdona, “omngei, tu’n om, omlai ding (Mang 1:4; 4:8) cih tawh a kidim a hihi. Sapi omzia khenthum a phakna tawh saikaak leng;

1. Sapi “omngei” hi. Kha 42 a kici, ni/kum 1260 (Mang 13:5) sungteng bawlsiat hun.
2. “Omlo”. Si dektakin liamna ngah a (Mang 13:3), 1798 pan kipan, Sapi in kuamah bawlsia zolo in omcip a, khatvei hong thokik hi.
3. A tawpna ah, a liamna teng damkik in, Satan vangtawh hong nunga kik ding hi.

Mang 17 in zong, 13:1-8 sung a sapi liamna damkik mah gen hi. Tua liamna damkik sapi tungah, Babylon tu hi. A thakin, khatvei, biakna leh kumpi ki gawmhopna, tanglai a mahbangin, tawmvei hong om ding a, bawlsiatna zong om ding hi.

Langdona, aana zatna, bawlsiatna te a omnop leh omtha hen la, thulang upte’n, thumaan nusia ding uh a, Christian taktak te’n bel, a upna khauhzaw semin, nopsakna hunte sangin, suangtumpi bangin dingkip ding uh hi. E G White, Kidona Lianpi laimai 602.

WEDNESDAY
Sapi’ Lutang Sagihite

Mang 17:9 - 11 leh 13:18 simkhawm in. Lutang sagih thu theihelna in pilna a hihi. Bang pilna lam hiam? Mikhat in tuabang Pasian piak pilna bangci ngah theih ding hiam?

.....

Vantungmi in, lutang sagihite pen, mual sagih ci hi. Lailet te in, tua mual sagihite pen, Rome khua kilamna mual sagihite hi ci hi. Greekpau in “oroi” hi a, “mualbawk” cihna hi. Kumpi sagihite zong om a, mual sagihmah kici hi. Hih mualte in, omkhat a om ngeingai lo a, khat khit khat kizom in omzaw uh hi.

Hih mualte pen kumpi a mal a genna hilo zawhi. Mangmuhna in, mimal thu genlo a, ngeina, sepdaan (system) te genzaw hi. Laisiangtho sungah, mual cih limlim in, kumpigam te a genna (Jer. 51: 25; Eze. 35: 2,3) hi zaw hi. Genkhohlna ah “kumpi” cih teh “Kumpi gam” hi denzaw hi. Mual sagih a cih ciangin, tangthu sungah a kizom a hong khang kumpi sagih hi a, Satan in Pasian’ mite a bawlsiat na’ng a khutzat te a hihi.

John muhna ah, nga puk khin zo a, khat omlai a, khat hong pai nailo hi ci hi. A pukkhin sa nga teng pen, Egypt, Assyria, Babylon, Medopersia leh Greece cihte hi a, khat a omlai a cihpen, John hun laitak a om Rome kumpi hi. A sagihna pen “hong pai nailo” a cih mahbangin, Mang 13 na sapi, a liamna damkik pen, a vang neikik pope, John sihkhit Rome kumpi gam om nawnloh khit ciang a, Pasian’ mite bawlsia ding a hong piang kumpi hi.

John in, a giatna sapi a hi, sapisan khat mu a, tua in, lutang sagihite lakah khat hi bek hi. Sagih lakah koipen hi ding hiam? Liam a damkik pen hi ding hi. Hih a giatna kumpi uk hunsung in, sapisan hong khang a, angzuak Babylon nasepna te mainawtsak hi. Tuni tuhun in eite in, liamna damkikpa hun a om i hi a, lutang giatna hong khang ding a, kisiatna ah tungsuak ding hi ta hi.

March 20

THURSDAY
Babylon tung Thukhenna

Mang 17:12-15 leh 16:12-16 simkhawm in. Kumpi sawmte thu bang teng na mu hiam?

Lailet tampi takte in, kumpi sawmte minlo in genmah leh, Mangmuhna in tuazah genkhol lo hi. Angzuaknu a thapia, sawt a mang khollo kumpite a hihi. Nambat 10 cihin, sapi tung a thuman kumpi te cihna hi. Mang 17:13,14 in, 16:12 - 16 sung a, Armageddon galmah gen phapha hi. Satan vangtawh gulpi, tuipi sapi leh kamsang zuaute tawh kipawl in Tuuno galin do ding uh hi. Armageddon i cihpen, galkapte kidona gal hilo zaw a, Zeisu nihveina hong kumsukni ciang a, Satan leh a pawlte khempeuhin Zeisu leh a vantungmi honpi te, dohuan dinguh hizaw hi.

Mang 17:16 - 18 na sim teh, 16:2 - 12 sung a kumpi sawmte in, Babylon tungah a lungsimpuak uh khel na dingin bang om hiam? Babylon tung thupiang i nungah kua om hiam?

Europe gam a kumpi sawmte in, hehna lianpi tawh, angzuaknu Babylon (hun nunung pope) lehdo kik a, tangguakin koih in, a sa ne in, meitawh haltum dinguh hi. Angzuak Babylon tung a thupiang dingte, John in a gen ciangin, a zualzang Jerusalem (Jer. 4:30) thu a genna kammal te zangkik hi. Siampi khat i tanu zualzang ahih manin, mei tawh haltum ngei hi (Siam 21:9). Babylon in

March 21

gimna te panin gum zolo cih, leitung kumpi te in theita uh hi. Khemthuak a hihlam uh thei ta a, lehdo kik uh hi. Hun nunung lampial biakna leh amau a teel mite khempeuh in, Pasian thukhenna maan hi ci in teltaktak ta uh hi.

Hun nunung vai dotna tampi takmah, kidawng nailo in om a, i lungsim buaisak zo hi. Mangmuhna 17 : 14 na in, bang kamciam hongpia a, tua kamciam eite a dingin, bangzah thupi hiam?

FRIDAY
Ngaihsut Beh Ding

March 22

Babylon a cip mediak in a sung a omlai te kiangah, vantungpan aw khatin, “**tua nu sungpan hong paikhia un, ka mite aw**” (Mang 18: 4) ci hi. Pasian a bia mi tampitak in, thu tuamtuan tawh, tua Babylon sungah om gige lai hi. Pasian in, tua mite ama mawhna sungah a kihel loh na’ng, samkhia dingin, a pawlpi mite hongsawl hi. A suahtak na’ngun hong paikhiat uh kul hi. Pasian in mi khatpeuh kisiat khakding deihlo (2 Peter 3:9) hi. Mang 19:1-10 sungah zong, Babylon sung a omlai, Pasian a itmi tamptak, tua sapna dawng dinguh ci hi. A beibaang, Pasian’ pawlpi mite i hihna tawh, maban lian mahmah nei i hihlam ngaihsun in. I lungsim sungah, Pasian’ thumaan paai a i om ding leh, Khasiangtho hong kibuak ding i kisap mahmah zia i thei hiam?

KIKUP DING DOTNA TE

1. Mang 14 in, Pasian a kihta mi tampitak omlai te “Ka mite” ci hi. “Hih thupuakte i puak ding a, eibang a khuavak ngah nailo te, mawhsakna leh lauhthawnma tawh hihlo ding hi. Catholic pawlpi zong, kosia gawplo

ding hi hang. Catholic sungah zong Christian taktak na om kha ding a, Pasian in, amau sungah nasem ding hi. Thumanlo upna sungah kiptak a omte sangin, thuman taktak deih a, kipuahphat theihna ding a lem theilo mi pawlkhat om a, tuate kisiat khak ding Pasian in lauhuai sazaw hi. EGWhite, Evangelism 575. Tua a hih manin, mite bangci kizoppih thei ding i hi hiam?

2. Mangmuhna 17 in, angzuaknu pen sapisan tungah tuang ci hi. 12 na a numei in, Pasian' pawlpi maan hi a, 17 na numei bel, a lampial nu a hihi. Amaute geel, a kibatna leh a ki lamdanna gen in. Hi bang saikaakna pan bang theihbeh na nei hiam?
3. Tukaal suntengin, Zeisu in gualzawhna lianpi tawh hong tuaksuk madiak a leitung kumpi te tung thupaing ding teng i sin hi. Pasian thuman thutak ah citak, siangtho thuman a omna bangzahin phamawh hiam? Mang 16 : 15 simin. Lampial langdona lak ah, thumaan ding hong kisam hi. Hilhkhonla te lakah i bangci kidoptheih ding hiam?

Lesson 13**March 23 - 29****NA KHEMPEUH A THAKIN KA BAWL HI****Sabbath Nitaklam****March 23**

Tukaalsung sim ding: Mang 19:6- 9; John 14:1-3; Mang 19:11-16; Mang 20:1,3; Jer. 4:23-26; Mang 20:4-15; 21:2,8

KAMNGAH: **Tokhom tungah a tupa in, “Tu in na khempeuh a thakin kabawl hi,” ci hi.** Mangmuhna 21:5.

Hun nunung Babylon kisiatna pen, a nasep khoppih lampial pawlpi biakna' a dingin **thusia** a hi ding hi. Pasian' mite a dingin, thupha lungdamna (Mang 19:1-7) hi. Leitung kumpi te in, misiangtho te a bawlsiat na dingin, Babylon in lamhonsak in (Mang 18:14) hi. Hih gal lianmahmah a kisiatna in, a thuman Pasian' mite a dingin suahtakna hi. Tua Babylon kisiatna in, Seal ngana sung a Pasin' mite'n a thungetna uh a ngah uh hi. **“Aw Topa aw, bangtan sawtlai ding hiam”** (Mang 6:10) ci a, Abel hunpan kipan hunbei dong a Pasian' mite kahna (Late 75:5; Hab. 1: 2; Dan. 12:6,7) aw te a hihi. Mangmuhna lai in, Pasian mite' thuakna bawlsiatna te tawp taktak ding cih hong kamciamzo hi. Khazih in, a mite tawntung vantung gampan hongmuak ding hun hi ta hi. Mangmuhna lai a zomtengah, Hun nunung Babylon kisiatna, Satan leh gitloh khempeuh a kisiatna hong lak hi. Tua baanah, Pasian tawntung vantung gamthak lim leh meel zong i mu ta hi.

SUNDAY
Tuuno Mopawi Nitak An

Mangmuhna 19:6-9 leh John 14:1-3 simkhawm lecin, Mopawi nitak an in Khazih leh a mite sawtpi tak kinga a hihna hong bangci lak hiam?

A beisa kum 2000 lai in, Khazih in, a mopawi ah nungzui sam dingin, vantunginn nusia (Mate 22) hi. “Khuapi siangtho Jerusalem thak pen ‘**Monu Tuuno**’ zi ki ci hi. Mangmuhna in Pasian’ mite pen, mopawi siim **Lengla** (Mang 19:9) ci hi. **Lengla** a hih leh, “**Mo**” hi thei lo ding hi.

Mate 22, gentehna ah, tua mopawi vaimah om a, mopawi madiak in, dawpkholh thu khenna om phot hi. Mopawi kipatma in, kumpipa hong pai a, lengla te’n mopawi puan, Tuuno sisan sungah sawpsiang leh sawploh sittel dingin (Mate 22:11; Mang 7:14) hongpai hi. E G White, Kidona Lianpi, lai 426 - 428. Mo **man** Calvary mual ah a piakkhit ciangin, a **lengla** te a ding inn (John 14:2,3) bawlsak dingin ciahkik a, Lengla te’n, ama hong paikik ding ngakin om uh hi. Leitung bei ciangin Amah hong paikik in, a Pa’ inn ah hong ciahpih ding hi.

Mang 19:8 ah, Khazih in, puanpaak sitset a Mo pia hi. Hih i muh teh, mopawi siim lengla peuhmah in, gamtat thaman bangmah ngenlo uh hi. “Puanhoih a siangtho, a taang” cihciangin “mi siangtho te’ hoihna,” Khazih tawh kipawl a, amau sung anuntak manin a ngahuh a hihi. Amaute in “Pasian thukham lenkip in, Zeisu tec i panna nei uh hi (Mang 14:12). Mopawi hongsuum Lengla khatpa

in, mopawipuan silhlo a, ama puanmah silhlel a hih manin, kumpipa in amah hawlkhia (Mate 22:1-14) hi.

Mangmuhna 3 : 18 na in, Khazih’ dikna puanpaak, upna leh Khasiangtho Mitzaa te pen, hun nunung Pasian’ mit i kisap penpen a hihna hong lak hi. Laodicea pawlpi in, tuate Zeisu kiangpan lei ding a, eite kicinlohma khempeuh tawh khek in, ama’ thu mang in agupkhiatna muang ding hi hang.

I sepna in hong gumlo hi mah taleh, na nuntak hunsung bang hoihna teng na bawlbawl hiam?

MONDAY
Armageddon Tawp

Mangmuhna 19:11-16 simin. Sakolkaang tuangpa min bang hiam? A kamsungpan namsauhiam paikhia cih in bang a cihna hiam? Hun nunungah i zaghna ding thu bang hong theisak hiam?

A khang a khang a, Pasian’ mite in a lamet uh a hi Zeisu hong kumkik ding kamciam tangtun na i mu ding hi. Zeisu mahbangin, a upna uh Pasian’ thu siksan hi. Mang 19:11-16 pen, Zeisu galzaghna : vantungah Satan a zaghna, gamlakah zo leuleu, Singlamteh ah zong zo, hong kumsukkik ciang zo lailai ding hi.

Nisuahna lam ah, khutpeekcia meeilum kkhat hong kidawk hi. Gamlapi ah mee i tuamcip bangin mial bang hihi. Pasian’ mite’n theipah uh hi. Gamdai dide in en gige uh a, hong nai semsem tang semsem in, meeilum golpi hong suak hi. Meikuangpi zong hi a, a tungah sakhituihuup om hi. Galzopa hi ta a, a dah a kappa hi nawnlo

hi. Vantung leitung zo a, a si a nungta te thu a khenpa a hihi. Thuman takin thukhen, galdo hi. "Vanutng galkap honpi in, Ama nungzui (Mang 19:11,14) hi. Simzawhloh vanmi siangtho te'n a kiimah phatna la sa uh hi. Van kawhawm sungah, a tulsawm sim tulsawm, a tul sim tul in a tam vanmite dim hi. Mihing laikung' gelh zawhloh, mihing' ngaihsutna' phakzawhloh in vanglian lua hi." E G White, Kidona Lianpi, 640 - 641.

2 Thess 1:8 -10 sungah, Paul in, gualzawhna lianpi tawh Khazih nihveina hong kumkik a, a langdo biakna kipawlina khempeuh leh leitung kumpite khempeuh ki susia ding a, Ama' mi siangttho te a hihleh, suakta tawntung ding hi.

Mangmuhna 19 sungah, nitak an namnih om hi. A neu 9 na ah khat leh, aneu 17, 18 na ah khat om leuleu hi. A masa sungah na neek khak leh, a nihna ah zong nekik thei ding hi. Hih kidona lianpi sungah, misim bangci ding cihbel ngaihsut hak mahmah hi. I upna kiplet ding a thupitna leh, i sep dingte bangzah thipi hiam cih, hite'n hong hilh hiam?

TUESDAY
Millenium (Kum 1000)

Mangmuhna 20:1-3 leh Jer. 4:23-26 simkhawm in. Millenium sung in, leitung bangci om ding hiam? Satan, sikkhau tawh kihen cihipen bangci daan hi ding hiam?

.....
.

Millenium (kum 1000) hunpen, Zeisu hong kumkikna tawh kipan hi. Satan leh a pawlte sikkhau in kihen hi. Kihen cihipen limpua hi a, khalam peuhmah sikkhau a hentheih hilo hi. Gimna te in migilo khempeuh sulum khin a hih manin, leitung in, Pasian bawlcil lai a hawmpa mah bangkik (Pian 1:2) hi. Tuabangin kum1000 sung, Satan ki omsak hi. Khem ding bawlsiat ding mi khatzong omlo hi. Tua sunteng in, a beisa a Pasian a langdo na te a gitlohma te uh thaman ngah a hihlam uh phawk kik hi.

Mangmuhna 20:4-15 sim lecin, Millenium sunteng misiangtho te koi ah om ding hiam?

Misiangtho te in, millenium (kumtulkhat) sung vantung Khazih bawlsa innpi sungah mang dinguh hi. Kumpi leh Siampi hi ta uh a, leitung mite tungah thukhen uh hi. Zeisu in, "tokhom sawm leh nih tungah tu in, Israel minam sawm leh nih te tungah thu khen uh hi" (Mate 19:28) ci hi. Paul in zong leitung thu a khen ding (1 Cor. 6:2,3) ci hi. Hih thukhenna in, Pasian thumaan a hihna honglak hi. Pasian muanlahna, lunghianna cihte, Satan in, a khang a khang in, mite' lungsim sungah omsak den hi. Millenium suntengin, gupngahlo mite vai, telohna, lunghianna, dotnop khempeuh, kicingtak a kikupna om ding hi. Millenium beikuau ciangin tua kikupna sa bangin, Pasian in, thumaantak tawh thukhen ding hi. Satan hong khelbawlna khempeuh leh lunghianna khempeuh misiangtho te'n telmuh mahmah dinguh hi. Pasian in thumaan hi ci in misiangtho te'n tec i pangta ding uh hi.

Dotnop neilo om se ding maw, tu laitaklian in i dawntheihloh phial ding te? Tua ni ciang in, Pasian in tua dotna khempeuh hong dawngkhin ding cih Pasian omzia bangci muh na hiam?

119

WEDNESDAY
“Vanthak leh Leithak”

Mawhna a beisiang khitciangin, hih leitungpen, misiangthote omna dingin kipuahpha ding cileng, bang cidaan a hi tam maw?

John inbel, “Vanthak leh leithak” (Mang 21:1) mu hi. Laisiangtho in vantung thuapthum in khen a : vandumpi, aksi te omna van, Pasian omna van (2 Cor.12:2) ci hi. Mangmuhna 21:1 na ah Johnin lei’ maitang mu a, a kisia leimaitang pi in, Pasian omna’ng piang theilo (Mang 20: 11) hi. “Thak” cih kammal pen Greekpau in “**kainos**” hi a, a luiripi puahpha hilo, **quality** thak a bawl ci hi. Meitawh nasiatak a, sawpsiang khitteh, a pialcil lai a banglian a (2 Pet 3:10,13) bawlrik ci hi.

A masapen a John lunglut mahmah khatpen, tuipi om nawnlo hi. Tuabang a hih theihna ding a, John pen, Patmos tuikulh tung a ki omsak a, tubekin amah kiium cipin, mipi te tawh tua tuipi in khenkhia a hih manin, tuipi mah lunglut masapen pah hi. Tuipi om nawnloh pen, John a dingin, a unau sanggamte tawh kikhen na thuksiatna te vengsak hi.

Mangmuhna 21:2-8 leh 7:15 - 17 sim lecin, leithak leh Piancil 2 sung a Edenhuan tegeel kibatna bangtneg hiam?

Pasian eite tawh omkhawm in, thuksiatna leh sihna omlo nuntakna, hong kamciam ngiat hi. “Pasian

120

March 27

biakinn” eite lakah om ding a, (Mang 21:3) Pasian eite lakah a ten manin, nopna kidim ding hi. Pasian omna hingin: khitui luanna, sihna, dahna, kahna, natna cihbang mawhna guu khempeuh beisiang ding hi. “A lui nate beimang khin hi” (Mang 21:4). Hihvai pen, Mary leh Martha te in, a theihkhit lam, a sanggampa Lazarus sihlai in amau te in, ‘Topa aw, nang om lecin, ka sanggampa si lo ding hi” (John 11:21) na ci uih hi. Khazih omna munah sihna omtheilo cih tua numei unau te’n theikhin uh hi. Tuamah bangin, Pasian omna leitungthak ah, tuate khempeuh pan suahtakna lungmuan om hi. Tua in eite a dingin lametna lianpi hi a, Khazih’ sisan tawh seal a kitumsa a hihi.

Leitungthak ah a thak in omtheih ding cih thu in, eite a dingin, banghangin i upna laigil hi thei hiam? Tua omlo in ei a ding bang hoihna om thei ding hiam?

THURSDAY
Jerusalem Thak

Leitungthak i khuapi pen, Jerusalem thak hi, John in ci hi. Jerusalem khuathak sungah mite a teenuh teh, omdan, tendan te khempeuhpen, mihiung lungsim ngaihsutna i bat zawh (1 Cor. 2:9) hilo hi.

Mangmuhna 21:9-21 sim in. Jerusalem pualam a kimkot omzia bangci dan hiam?

Jerusalem thakpen, Tuuno’ zii “mo” kici hi. Khazih in, a misiangtho te a ding a bawlkhohl mun (John 14:1- 3) a hihi. Khuapi umna sang mahmah a, kiu khatah konpi 4,

kiu 4 ciang kongpi 12 hi a, mun khempeuhpan lut theih kawikawi hi. Leitung khempeuh huamin, Pasianin hong ompih cihna hi.

A dung, a vai, a tung kikim sitset in, kibik (cubic) hi sisen a : a kimkot furlong 12,000 pha hi. Tua kibik in, ninghiam 12 nei a, tua ninghiam 12 tengin, sihna ciam hetlo in laktohna a ngah ding misiangtho 144,000 te limpua hi. Laisiangtholui hunlai in, biakbukah siangthopen mun in, cubic (1 Kumpi 6 : 20) hi sisen hi. Tua khuathakin, Pasian biakna munlai pi hi ding hi.

Mangmuhna 21:21-22: 5. Khuapi sunga om bangte khawngin Eden huan hong phawksak hiam? Tua khuathak ah samsiatna om nawnlo ding cih kamciamin bangzah in kician nasa hiam?

.....

Jerusalem khuathak ah a kician penpen hoihna in, Pasian tokhomnuai pan a hong lungkhia nuntakna guntui (Pancil 2:10) a hihi. Babylon gungei a, sila a kiman, Pasian' mite in lungzuang khawngai a, a tut uh (Late 137) tawh enkaak leng : nuntakna gungei ah, Pasian' mi siangtho te in, a innte uh lam dinguh hi.

Nuntakna gunpi langkhat tuakpan, nuntakna singkung po a, a tehte in, "mihingte a ding damna" (Mang 22:2) a hihi. Natna omlo ding cih nungsang, damna hi cih teh, natna tawh kisai khollo hi. Khang tawntung a mawhna i suksiasa na khempeuh dam khinzo hi cihna hi. Gupngah mite khempeuh in, Pasian innkuuan te hi ta uh hi.

FRIDAY
Ngaihsutbeh Ding

March 29

E G White lai "Mopawipuan silhlo" cih thulu simin, Christ Object Lesson laimai 307 - 319. "Kidona Tawp" thulu Kidona Lianpi laimai 662 - 678.

Mangmuhna lai sung a, Zeisu' nihveina vangliatna minthanna tawh hong pai ding, a gam hong tungding a, a mo tawh Amah, a tawntung a ding kigawm ta ding cih thu in, a thu laigil a hihi.

Zesisu hong paibaih ding cih thu in, a masapen thupipen hi a, a nihna ah, tua hong paikik ding eite'n ngak i hihna a hihi. I ngak kawmin, Mangmuhna khatna te ngaihsun in, a tangtun gaih mateng simpapha ding hi hang. Tua hun i ngak kawmin, leitung nate enlo zaw in, eite' lam-eta tungah i mit suanzaw ding hi hang. Mangmuhna Khazih in, mikhempeuh a dingin, a kician mello nuntakna sungah lam-eta kidimsak hi. Leitung mailam thu te, Amah'n len a, i mailam thute Ama' khut sungah om hi.

Amah leitungah hong kimsukkik madeuh in, lungdamthu i tangko ding zong hong phawksak hi. Amah i ngak pen, thu beisa hilo a, thu nungta a hihi. Khasiangtho leh Mo in "Hong pai un" (Mang 22:17) ci in hong sam hi. Tua sapna dawngciat ni. Tua in lungdam na thu hi a, leitung mite tungah i tangko ding hi.

KIKUP DING DOTNATE

1. **Millenium leh migilote tung thukhenna te ngaihsun in. Gupngah mi siangtho te'n, a dotna khempeuh a ngah uh hi. Guploh te bek in a mawhnadaan uh thuak ding uh hi. Tua in, Pasian' omzia bang hong lak hiam?**

- 2. Mangmuhna 1:3 in, thu a za, a sim, a don, a zui mite a ding thupha hong kamciam hi. Hih Mang-muhna lai nasim ciangin, na don na zuih ding bang khawngteng na mu hiam?**

MORNING WATCH <u>January , 2019</u>			
1.	Tuesday	1 Korin	6:7
2.	Wednesday	1 Korin	10:13
3.	Thursday	Thuhilhna	4:9-10
4.	Friday	2 Timoti	2:24-25
5.	Saturday	Marka	4:40
6.	Sunday	Hebru	10:24-25
7.	Monday	1 Johan	2:5
8.	Tuesday	James	4:8
9.	Wednesday	Joshua	1:9
10.	Thursday	Zechariah	7:9
11.	Friday	Johan	6:37
12.	Saturday	1 Samuel	12:22
13.	Sunday	Isaiah	41:13
14.	Monday	Hebru	4:15-16
15.	Tuesday	Late	37:24
16.	Wednesday	Paunak	3:6
17.	Thursday	Paunak	12:22
18.	Friday	Late	37:5
19.	Saturday	2 Korin	1:3-4
20.	Sunday	Jeremiah	29:11
21.	Monday	2 Korin	5:9-10
22.	Tuesday	1 Johan	2:6
23.	Wednesday	Isaiah	26:3
24.	Thursday	Paunak	14:29
25.	Friday	1 Piter	2:9
26.	Saturday	Gamlak Vakna	11:23
27.	Sunday	Mangmuhna	3:11
28.	Monday	Late	55:22
29.	Tuesday	Late	37:7
30.	Wednesday	2 Korin	4:17
31.	Thursday	Rom Laikhak	8:38-39

125

126

MORNING WATCH
February , 2019

1.	Friday	Sawlak	20:35
2.	Saturday	Matthai	7:1
3.	Sunday	Late	126:2
4.	Monday	Paunak	27:2
5.	Tuesday	Paunak	10:9
6.	Wednesday	Matthai	5:10
7.	Thursday	Paunak	10:28
8.	Friday	Isaiah	41:10
9.	Saturday	Late	34:13
10.	Sunday	Sawlak	3:19
11.	Monday	Kha La	3:22
12.	Tuesday	Late	119:105
13.	Wednesday	Paunak	16:3
14.	Thursday	Matthai	6:34
15.	Friday	Paunak	24:16
16.	Saturday	Paunak	15:23
17.	Sunday	Habakkuk	3:17-18
18.	Monday	Filippi	4:11
19.	Tuesday	Filippi	2:4
20.	Wednesday	2 Timoti	3:16
21.	Thursday	Rom Laikhak	5:3-4
22.	Friday	1 Thes.	5:16-18
23.	Saturday	2 Korin	7:10
24.	Sunday	James	1:5
25.	Monday	Johan	3:16
26.	Tuesday	Mangmuhna	21:4
27.	Wednesday	Matthai	5:16
28.	Thursday	Paunak	13:11

MORNING WATCH
March , 2019

1.	Friday	Filippi	4:6
2.	Saturday	Kolose	3:1-2
3.	Sunday	Late	139:8-10
4.	Monday	Galati	6:9
5.	Tuesday	Paunak	16:9
6.	Wednesday	Gamlak	Vakna 32:23
7.	Thursday	Rom	Laikhak 8:28
8.	Friday	Marka	16:15
9.	Saturday	Late	27:1
10.	Sunday	1 Johan	5:14-15
11.	Monday	Late	68:19
12.	Tuesday	Late	51:10
13.	Wednesday	James	1:17
14.	Thursday	Johan	8:7
15.	Friday	1 Korin	13:4-7
16.	Saturday	Luka	10:19
17.	Sunday	Late	85:13
18.	Monday	Luka	6:27-28
19.	Tuesday	Hebru	4:16
20.	Wednesday	1 Timoti	2:1
21.	Thursday	Hebru	11:1
22.	Friday	Galati	5:1
23.	Saturday	Hebru	4:12
24.	Sunday	Paunak	2:8
25.	Monday	Johan	9:31
26.	Tuesday	Isaiah	30:21
27.	Wednesday	Kolose	3:9
28.	Thursday	Late	25:8-10
29.	Friday	Isaiah	54:10
30.	Saturday	Late	34:19
31.	Sunday	Late	54:4